

# *MWAHA KIKHALENLYAAKA*

## *OOVIRIKANYA ETIINI*

### *YOOTTTHOKIHIWA*

 Kooxukhuru, Munna Neville.

Mukilaathiki. Yoopacerya, nkaareere muteko olelo mpakha waahaleela ooraami kamosa-kamosa a retta. Yaahikhala atthu kamosa-kamosa mwa miyaha s'omeekha wira evekeleliwe, yaathuneya wira kikumanane. Masi vano akina wa... nimosa wa makhuru, kookupali wira Billy ohimmye wira naari na oCanada, mapuro maili wala mararu oovirikana. Vano, awo anoorwa nno, moosuwela, ni okhala mooteelini ni mmoteelini voohihiyererya okathi woethene. Nto miyo kinoorowa okumana ni yaawo, okumana ni yaawo ni waavekelela anrwa ekhumaka mapuro othene molumwenkuni, ni wAsiya, Europa ni mapuro othene. Nihiku ti nihiku, hiyo nakhala va, atthu animoorwa. Eyo ti yooreeraxa ovikana imiya thanu na mosa valiistanti, elipelelaka o... mivaanelo s'omeekha, nto siiso ennikhalihia yoolipa vakhani. Masi atthu anwvereiwa vekeekhai ni myiha soowaakuveya wira evekeleliwe, vano, kinnilipiha wira kikumane ni yaawo.

<sup>2</sup> Paahi, ahe, okhuma okathi waary'aka weiwo ni nikhuru na maatinministaratoore, voowiriyanan i vakhani nnikhuru naka na maatinministratoore va okereja, naahaana okumana okathi vakhani ovinre. Nto okathi ene yoowo yaahikixeeliha ntoko ewoora emosa ni nuusu, ni yaahikhala atthu kamosa-kamosa yaathuneya wira ekhale va okathi yoowo wira evekeleliwe. Vakhala wira awo ari vaava, kaatthuna kaavekelele yaawo okathi yoola. Tivo, awo yatthuna vale, atthu ale yaari wira avekeleliwe, ahe, awo yaattamelaru nno paahi naanaano okathi mulipa-onoopa epiyaano, onakhaleru pani, onrwaawe ni—ni anirumihele vakhani “Meetiku muulupale vano ori vakhiviru, Yesu ookhupanyerya.” Vano ale ari wira avekeleliwe, yatthuna vale, yaari akavi miyo nkisuwenle. Nto nyuwo mwa axinna, woona waka. Axinna, miyo nkireere ohaawa mw'erutthuni mwaka. Yesu aahivilela mw'erutthuni Mwawe, ohaawa, wira Owo okhale enamuna ya Mulipa-oolapelela eekeekhai, okhala wira Owo oryeene Muluku aahiipaka erutthu wira Owo awerye ohaawa. Owo aaniwerya woona owereya wa eretta. Nto mwaha wa yeeyo Owo aarwenly'awe opaka ettipiheryo ya itampi. Nto mwa yeela Owo oorumaa Ekereja Awe wira ethhikele muteko Awe.

<sup>3</sup> Ni kihaana—kihaana nttittimiho muulupale wa muteko wa omeetiku, wooperari ni sikina, yaawo—yaawo ni irattelo Muluku aavanhe—awe wira yiiriheke itthu khata erutthu, wira yooperariki ni okumiha maino ahikhanle saana, ni sikina. Miyo kinnixukhurela yeeyo. Masi onniphya okathi awo ankhalaaya woovikana o—osuwela waya, awo—awo ahinsuwelaaya ethtu yo wira. Munnona? Nto miyo kinoona wira, nto, hiyo nookhalana ehaakhi yooreera, ntoko naarowaahu okhalana mw'erutthuni, vaakhanle wira naarowa wa meetiku ahu a mw'emosini, khino me—meetiku okuluttuni wu, meetiku mmosa mulweene oosuwela onkuxa muthuko ni weetta mukuluttuni ohiyu, wira oophwanyeni, wira oocaleleni. Nto owo avonya vale osuwela, owo onoomurowela mutthu okhanle musulu vakhani onvikana owo. Owo onimoorumaní orowa wa muratti a muteko. Nto vano vakhala wira muratti oomeekha khonsuwela, miyo—miyo kinnitthapa okhalana ntthyawelo nikina, Meetiku muulupale.

<sup>4</sup> Ni Owo khonivonya, Ola khonivonya, okhala wira Owo ti Mpattuxa Mwaneene. Ni Owo oonipakela ephiro. Vano, waakhanle owerya wo ovoniha mwa miyo wira kiire, miyo—miyo kaamurowa iwe kiire. Miyo—miyo kaamutthapela paahi wira. Masi, owerya wo ovoniha, nkirina hata mmosa, khaavo hata mutthu mukina orina owerya wo ovoniha. Masi hiyo noorummma, moone, wa Kristu, wira naavekelele aretta, Yoowo opwenhe esukeryo ya owerya wo ovoniha. Munnona? Nto hiyo nnimoorwa paahi, ntoko saaryaaya, wira nilepe exeeke ya yeeyo. “Ni sothene sinrowaanyu waavekela Atithi mwa Nsina Naka,” eyo exeeke yoohikhala’ethu, “sothene sinrowaanyu waavekela Atithi mwa Nsina Naka, Miyo kinimwiira.” Natiri xeeni! Vekeekhai khokhanle ovonyaka. Ni kinnaakhaliheryaka axinn’aka alopwana n’athiyana, mulaponi mothene, opweha isukeryo iya... ahiiso okumiha inoota iya Mpango mwa Muluku, Mphomeni mwa Yesu Kristu. Ni ennikhalaka yoottotteleya muraarelo saana. Owo okathi wo thene ooliva, ni okhala wira esukeryo eri vaavo, moone. “Owo—Owo—Owo ti onyakatteliwe soottheka sahu, makhwatta Awe ti anivoninhe.” Moone, sothene soomala. Nto hiyo ninniteeliwa murima ohiy’ula mwaha wo waamini wanyu.

<sup>5</sup> Kookupali wira Billy aakileela wira munna mmosa onoorwa okhuma oCanada wala nipuro nlo. Nto eyo ekeekhai? Nyuwo mwa munna a oCanada? Nto—nto nyuwo mwa a vayi, munna? [Munna oniira, “Epantte onkela epheyo wa oFort Wayne, oKendallville.”—Mol.] Kendallville, Indiana, a oFort Wayne. Miyo kithenle oFort Wayne. Kinnuupuwela oratta-ene. Naahikhalana mithukumano sinci-ene iwe oRediger Tabernacle. Kinoona wira nyuwo munnisuwela vary’aya. Ni kinnuupuwela, kiryeene mwammiravo, kikilanthi-ene munawoni mwa Paulo Rader, muRediger Tabernacle, ntoko murumeyi mmiravo aaxutta. Owo mutthu muulupale, Munna Paulo aari, ni Munna

Rediger, atthu a waamini. Minepa saya siitthyuuwe ohiy'ula. Nto vano, okhala wira kaari mwammiravo, kimphavela otthikela ele awo ahiyanse-aya, ele Yesu ohiyenryaaawe Ekereja Awe mukwaha wothene.

<sup>6</sup> Vano, ni waamini wothene orinaaka, kinoorwa woovekelelani. Nto miyo—miyo nkinrwa piswapiswa paahi. Hiyo khinnatthuneke waattamela siiso. Nnari, eyo kahi yoolikana. Hiyo ninoorwa, naaminiki wira ninoorowa waakhela ele nivekenly'ahu, moone, nisuwelaka wira Muluku oolaiherya. Ni ninoorwa ni nroromelo mmurimani mwahu wira Kristu oommana natiri, ni nyuwo axinna moophavela ohela waamini wanyu waltaari, muhiira sothene sinwery'anyu, miyo kinrowa ohela wawaka ni nyuwo ohiy'ula. Munnona?

<sup>7</sup> Nto, vano, nookhalana altaari muulupale onaataleleyea wirimu wothene, ni valtaari vaavo omphwanyaneya Mukuttho ahu, Mwaana a Muluku. Munnona? Ti Mukuttho yoowo onvvuva ephome. Muluku khonwerya oweha eyo ohitttimihaka Yeeyo, moone, maana Awo Masu Awe, “Ola Mwan'Aka onimphentexaaka, mmwiweleleke Yoowo.”

<sup>8</sup> Miyo kinrowa onvekela Munna Neville, humu ahu, owo orwe ohoole nno naanaano va ni miyo okathi onrowaahu. Kintthuna wira ekereja yothene... Ankhi ula aari munn'inyu, aiy'anyu, mwan'inyu, atithi anyu? T'a mutthu, muupuwele. Nrowe, n'ixariya yothene hiyo nrin'ahu, nimwaattamele Muluku vano mwaha w'axinna ala.

Nuuramihe muru ahu.

<sup>9</sup> Tithi ooreera murima a Wirimu, hiyo ninruuha Ohoolo Wanyu vano, waltaari wa mahala, ninaamwi neemenle-ene vakhukuluni yaamukhaani ya mwiri, p'uhimya wene, elapo ela ya vathi, masi waamini wahu woowela mpakha waltaari muulupale onivarela iwe, weiwo Yesu (Yoowunkhela yoosivela ohoole wa Muluku, Mukuttho wa Ephome wa oKalvario) Yoowo oxinttale iretta sothene, ikwerere sothene, okhwa, omooronii, ni mahiye, khuhihimuwa khuwela Wirimu, khukilaathi moono woolopwana wa Omwene Awe. Nto hiyo, mwaha wo waamini, ninnoorwa, niwelaka osulu wu mwa mahala a Muluku, wira nihimye vasulu valtaari va, wa Mpattuxa muulupale a Wirimu ni vathi, “Munaakhele, Pwiya, okathi onaattamel'ahu mwa Nsina na Pwiya Yesu.”

<sup>10</sup> Va ari axinn'ihu, nto mmosa aya a oFort Wayne wu, nno mustaatu, ni mukina okhuma oCanada nno, orweela okathi ula woottittimiheya saana. Ori eriyari ya okhwa ni ekumi, Pwiya. Va aakhala alopwana aili, akhanleru amiravo, woohala muteko munci-ene mw'awo wa Nyuwo, Pwiya, anakhotto aili, aKristu aniwaaminini Nyuwo. Nto nwanani ohoopa ntthere, ni ntthere nle na eveneno noovara nipuro nlo mw'erutthuni mwaya, ni awo aaththika,aatthikelasa oxipiritaali ya mahala a Muluku, wira

yaataanihiwe, wira evonihewe, wira ewerye waattamela oholo emaara ekina, ni nikula nowisaakiha-no, arowaka okhottoni. Awo ahoorwa wira etakanihie ikuru sa mavekelo ni hiyo, Pwiya. Nto hiyo ninrowa okumana ni nwanani.

<sup>11</sup> Mwa Nsina na Yesu Kristu, mwaataphule. Hiyo ninnoovirikanyani mwa Nsina na Yesu Kristu, mwaahiye erowe.

<sup>12</sup> Awo t'anakhotto a mukhottoni. Nto, ntoko murumeyi Anyu, kinnirowa vano owiixaatherya matata, ni waamini, kaaminiki wira, "Ithoonyeryo iya sinimwaathara ale anaamini," ohimmye Pwi'yahu, Mukhulupale ahu Oomalela a ekhotto, "awo yawiixaatherya matata aya arettta, awo anoopenuwa."

<sup>13</sup> Ela miyo kiniira mwa Nsina na Yesu Kristu. Owerya w'eretta ontthuka erutthu ila ya munn'ola, omuhiye, mwa Nsina na Yesu Kristu.

Owerya w'eretta ontthuka erutthu ila ya munn'ola, omuhiye. Mwa Nsina na Yesu Kristu, okhume.

<sup>14</sup> Muluku Oowerya sothene, Mpattuxa a Wirimu ni vathi, Mwaneene Ekumi ehiminala, ni Nanvaha a yoovaha yothene yooreera, mwaaruuhelle iparakha Sanyu ala hiyo naareerihaly'ahu. Ni yoolempwa mwa Soolempwa, wira, "Mwairela mwaak'ola, 'Othaame-vo,' muhihoveryaka mmurimani mwanyu, masi mwaaminiki wira ehimaly'anyu enimwiiraneye, munimwaakhela ehimaly'anyu." Miyo kinnaamini wira iretta saya sookhuma mw'erutthuni mwaya. Vano yoohimmwa; vano yiiraneye. Amen.

<sup>15</sup> Mwa Nsina na Pwiya Yesu miyo kinnaaminini wira mootaphuwa. Mwa Nsina na Yesu Kristu kinnaaminini wira nyuwo mwa ootaphuwa. Amen.

Ekereja ennaamini siiso? [Muthukumano oniira, "Amen."— Mol.] Vano yiiraneye.

<sup>16</sup> Vano, yaamukhala akina mu yaatthuna paahi wuupuweliwa mmavekeloni, munnithuna ovenxa ntata? Vaareera, nrowe nimwaattamele Yoowo vano okathi muniixaatheryananyu matata mmosa ni mukhw'awe iwo. "Ithoonyeryo iya sinimwaatthara ale anrowa waamini."

<sup>17</sup> Muluku oowaaryaxa, mwaha wo waamini hiyo ninnimoona Yesu, hiyo ninnaamini wira Owo ori vaava. Owo onnikhapelela Masu Awe. Ni Owo ohimmye wira, "Nipuro ninthukumanaaya aili wala oovikana mwa Nsina Naka, Miyo kiri eriyari aya." Vano, Tithi a Wirimu, muhiye owerya wa Muluku Oowerya sothene waakwannye atthu ala, Pwiya, ntoko yiitakaninh'aya matata mmosa ni mukhw'awe, yiixaatheryanaka mmosa ni mukhw'awe. Oruma wookiserya Nyuwo muhimenryaanyu Ekereja, "Ithoonyeryo iya sinimwaatthara ale anaamini. Awo yawiixaatherya matata aya arettta, awo anookhala...awo anoopenuwa." Nyuwo moohimya, ni hiyo ninnaamini yeeyo.

Nto vano ehiiriwa, ni hiyo nnimoottottopelani Nyuwo mwaha wa yeeyo, mwa Nsina na Yesu Kristu. Amen.

<sup>18</sup> Ni mwa Nsina na Yesu Kristu owerya wa Muluku ottikitthele maleeso ala w'arett a n'ale oothoiwa. Ni okathi anveleelihiwaaya ni opweheriwa arett a, yiiraneye wira anoovonihiwa. Hiyo noosoma mBibiliani wira yaanikuxiwa mwa Paulo Oowaary, maleeso, ikuwo; irooho sootakhala saanaahiya athu, ni iretta saanivonihiwa. Nto, Tithi, hiyo noosuwela wira khanihiyo Paulo Oowaary, masi hiyo noosuwela wira Nyuwo nlelo mwa Yesu. Nto hiyo ninvekela wira Nyuwo munivahе yoovekela ela wa ovuwa Wanyu. Amen.

<sup>19</sup> Nkisuwenle sinto yookhala...ifiita nlelo soothukuliwa, wala mnari. Sootthukuliwa? Vaahikhale siiso, kaatthuna wira awo attukule okathi ula. Kookupali wira epattihelo yootthukuliwa. Vano, kinwehererya wira nkiniwooceihani ohiy'ula. Kimpacerya ntoko ewoora nuusu ni munuutu miloko miraru vahinatthi. Nto miyo...Nla nisomi na exikola ya Ttiminku, ni kihuupuwela wira khino yaamukhala yooreera kaarina ela yookaravariwa eri vamurimani vaka. Ni nihanle okela e—enamuna esya, etapernakulu esya, sothene isya.

<sup>20</sup> Nto vano kaatthuna kisome kamosa-kamosa sa Soolempwa. Nyuwo mwaaththunaka osoma ni miyo, kinthuna kisome mwa Samuweli Oopacerya, kapiitulu 8, ni ninthuna opacerya versiikulu 4 mpakha 10; nto numal a, wira nikhalane okathi, 19 mpakha 20. Ni miyo kookhalana ipaphelo sinci-ene sa Soolempwa ni ihimyelo silempwe va, wira nyuwo mwakhalana ekaneta ni elaapi, wala ethu, epaphelo, mwaaththunaanyu ohimyana seiya wala okweretha, mulepeke, wala, Mwenye Maguire onookhalana e—e—efiita.

<sup>21</sup> Ni kintthuna wira efiita ela evahereriwe arumeyi, axinn'aka, arumeyi ahikiiwale oratteene, vanci-enexa axinna a ikereja sa muromolelo. Ni kiireke sothene miromolelo.

<sup>22</sup> Nto mwaha aka ohiy'ula ti: *Mwaha Kikhalenlyaka Oovirikanya Etiini Yootthokihiva*. Nto kinrowa osoma vano wa mulipiheryo, wala osoma Yoolempwa, wira kikhalihe vekekhai ya Yoolempwa, kintthuna kisome mwa Samuweli Oopacerya 8:4-10, numal a 19-20. Wa muthukumano aka ononeya, kinniroromela wira mwarowa owaani munoolepa Soolempwa iya n'usoma oratta-ene. Nto w'axinna anrowa wiiwa efiita, kinroromela wira ni nyuwo khamunrowa omaaliha efiita yahimmwa ethu khino muhinrowaanyu wiiraana-no, masi munomphavela Muluku mwa yeeyo, moone vakhala wira ti Yoolempwa. Kinoona wira nihaana wa hiyo ni Mutthaka wa nihiku.

<sup>23</sup> Miyo kinnaamini wira ikereja sothene sookhalana aKristu mwemmo, ni miyo vekekhai nkinlavula vowaapwapwela aKristu. Masi mwaha miyo kiirenlyaka ethu kiiralyaka, ni

ohimya ele ehimaly'aka, mwaha wa muupuxeryo wa Erooho Yoowaarya mwa Masu.

<sup>24</sup> Vano nrowe nisome mwa Samuweli Oopacerya, kapiitulu 8, opacerya eversiikulu 4, nisomaka versiikulu 10, nave, toko.

*Sioso makhulupale othene a wIsarayeli yaahikumanela, enarowa okumana ni Samuweli oRaama,*

*Vano emuleela wira, Moone, nyuwo muhuuluvala, nave an'inyu khaneettela...khaneettela ephiro: vano munithanlele mwene onrowa oniphukaka ntoko ilapo sothene.*

*Masi etthu iyo khiyaamusivenle Samuweli, okathi awo yaahimale-aya wira, Munivahe mwene onrowa oniphukaka. Nto Samuweli aahaavekela APWIYA.*

*Vano APWIYA yaahimuleela Samuweli wira, Mwiiwelele nsu n'atthu mwa sothene anooleelaayani: okhala wira khahiyo anookhoottani nyuwo, masi anikikhooatta miyo, wira kihikhale mwene aya.*

*Vootthariha miteko sothene sivanre-aya okhuma nihiku miyo kaakuminhe-aka wEjitu mpakha olelo, aakihiya miyo, enaarumeela amuluku akina, ti siiso-tho awirenenlaayani.*

*Vano tivo mwiiwelele nsu naya: nnya mwaalopole toko, ni mwaalakiherye enamuna mwene owo onrowaaawe oweettiheryaka awo.*

*Vano Samuweli aahaaleela moolumo ala othene a APWIYA atthu yaanvekela mwene.*

<sup>25</sup> Vano eversiikulu 19 ni 20 mpakha omaliha.

*Nnya atthu yaahikhootta wiiwelela nsu na Samuweli; nto khwira, Nnari; masi ninookhalana mwene ahu;*

*Wira hiyo-tho nikhale ntoko ilapo sothene; ni mwene ahu onrowa oniphukaka, ni onrowa... oneettiheryaka, ni owana ikhotto sahu.*

<sup>26</sup> Apwiya yincererye iparakha Saya osoma wa Masu Aya. Vano, ntoko nisomi na exikola ya Ttiminku, miyo kaatthuna kihimye wira nintthuna niphavеле okhala ntoko—owiriyana saana ntoko sinweryaahu Masu.

<sup>27</sup> Ni hiyo noosuwela wira—wira imaara sikina itthu sinnihimmwa, (ni ikereja kamosa-kamosa), simmukkwattula mutthu oixuttihiwe voovirikana ni ele awo arinaaya... aniiwaaya. Mwa nlikanyiho, mulopwana mmosa aahikileela nihiku nlo, yoowo okhanle mpatthani aka mmosa okilanthe vaava naanaano, owo khwira, "Okathi mwaahimme-anyu, Munna Branham, ni waamini wunci-ene kinkhalanakaaka wa nyuwo, ni kinnaamini, okathi nyuwo muhimaly'anyu wira

khiwaakhanle ‘omooroni Ohinimala,’’ khwira, “Kaahala omora vakhaterani vaka. Nto miyo khwira, ‘Vekekhai mulopwan’ovo oovonya.’’ Vano nto khwira, “Nyubo munihin’ye siiso okathi munci-ene. Vano nto nyubo muhimmye wira, ‘Eri enamuna emosa paahi y’Ekumi Ehinimala, nto eyo enkhuma wa Muluku.’’ Ni eyo t’ile hiyo othene nimpahvelaahu, moone.

<sup>28</sup> Ni kхиivo hata Yoolempwa enihimya wira wookhala omooroni Ohinimala. Okhala wira, Ehinimala khenatoko opacerya, ni khenkhalakhala emalaka. Vano Bibilia ohimmye wira “omooroni opattuxeriwe xetwani ni malaikha awe,” vano owo khuhiyo Woohimala. Waahikhala okathi wahaakhaleaya, ni onookhala okathi ohinrowaaya okhala, emaara ekina. Masi awo pooti ohukhumma mmwe, mmooroni ni esofiri, ni moowiixani mwa mooro, mwa ivirelo sa okathi, masi vookiserya onoomala okhala wira omooroni khuhiyo Woohimala. Ni waakhanleru omooroni Ohinimala, mwaamukhalana Ekumi Ehinimala wira mukhaleke omooroni Ohinimala. Ni waakhanleru Woohimala, vaakhanle wira kweekwe waari siiso, ni nyubo okathi woethene mwaari omooroni nto kweekwe munookhala omooroni. Moone, tivo kхиivo ethu ene eyo.

<sup>29</sup> Tivo, moone, *Ehinimala* ti “khenatoko okhalana epacerelo wala emalelo.” Ni eri enamuna emosa paahi y’Ekumi Ehinimala, nto eyo eri mwa Muluku, enrwa mwa nuulumo n’Ekereku *Zoe*, yeeyo enihimya “Ekumi ya Muluku Mwanene.” Nto okathi oniyariw’ahu vasya ni Erooho ya Muluku, hiyo ninkhala Oohimala ni Muluku, okhala wira nookhalana epantte y’Ekumi Awe, yeeyo ennikhalicha hiyo aana alopwana n’athiyana a Muluku, nto hiyo nookhalana Ekumi Ehinimala. Nto Ekumi eri mwa hiyo, Muluku onoohihimuxa erutthu ni Ekumi nihiku nookiserya, masi eyo Erooho ya Muluku eri mwa hiyo enivenya, okhala wira eyo Erooho ya Kristu yaari mwa Kristu, enkhaliha ekumi irutthu sahu ni onivenxa nave, ni Yoowo, wira nikilaathimo—Moovuwani ni oruma ni Yoowo.

<sup>30</sup> Vano nikelele mwaha, vano, kinnikhalaka mwa iyaakha iya, ni etapernakulu ila ennikhalaka. Kinaamwi, miyo kikhalihiwe mulaleyi ekereja Patista Misiyonaariya, ni Totori Roy E. Davis, miyaakha soophiyaka miloko miraru ni miraru sivinre, oJeffersonville nno. Vano miyo, okhuma vaavo, miyo kaari mmutthenkesoni okathi vakhani paahi, miyeeri vakhani, mpakha ethu emosa okhumelela yaari yoohilempwa ni ekereja, vano miyo khimuleela wira nkaakhanle wiiraka yeele. Nto siiso, tthiri, khuvekeliwa wira “kaamwiira wala nnari,” nto miyo khwira nnari. Tivo eyo yaari ethu emosa kinaamini aka, wira ala Masu a Muluku. Nto miyo kaahimuleela mulopwana aari mu—mwiixuttihi mukhulupale, “Nyubo mwakooniharu iyo muhina mwa Masu a Muluku!”

“Masi waari,” owo khwira, “owo mwiixuttiho ahu.”

Miyo khwira, "Masi kintthuna ekumihiwe Mmasuni, moone, Masu a Muluku."

<sup>31</sup> Ni kahi mwaha wo wira nkiniira mpantte wa mutthenkeso kinikhalelaaka oovirikanya mutthenkeso, okhala wira miyo kinnaaxukhuru axinna aka, yaawo kinlavulaaka-no olelo, kinkhalanaaka olattuliwa wa yaawo, kinoona wira, ntoko khula muromolelo, vanci-enexa mwa makhuru a Ehapari yooreera Yoomalela, ni hata mwa anci-ene a ikereja sikina. Koovekeliwa wira kikele mopatthanani mwaya ni wiitakanxa ni yaawo, masi kinnikhalaaka ootaphuwa. Okhala wira, okupalihia orin'aka, miyo nkintthuna ohelela nikhuru nimosa n'atthu. Kintthuna kihelele ele Muluku okivahalyaawe, waavekelela aretta, wira ottotteliwe muraarelo ni aana a Muluku outhene mwa khula mutthenkeso. Owo khonakikoheke wira kihivekele, wala *ola* okhala wira oniira mpantte wa *Lexe ni elexe*, Muluku onnilamula murima wa mutthu.

<sup>32</sup> Nto vano, voopacerya, ethu kihiniirelaaka mpantte wa awo ni olavulaka kivirikanya, ti, yoopacerya, okhala wira nkinaamini wira mutthenkeso w'oKristu ti Yoolempwa. Kinaamini wira ti yoohilempwa. Nto ti yeeyo enrowaaka ophavela, ohiy'ula, wiiliipiha ni mahala a Muluku, wira kwooniherenyi wira ti yoohilempwa, kahi yoolikana okhalana mutthenkeso.

<sup>33</sup> Vano, yoopacerya, hiyo nniihana "etiini." Nuulumo *etiini* ti "ekhuneelo," enihimya okhuneela ethu. Vano, Atamu aahikhala etiini, masi vekekhai owo aapanke mmansawe, ya makukhu a efiiku, nave kхиyaavan'ethu. Owo aapanke eyuupuwelelo awe mmansawe khweererya opaka ephiro ya ntthyawelo, wira ophwanye woopowa mwa ethu owo aapanke-awe mmansawe, nto Muluku aahikhotta, okhuma Atamu mpakha eyeettiheryo ya mutthenkeso wookiserya. Khenakhaleke, nto ni mahala a Muluku hiyo nnimooniherya olelo ni Bibilia. Etiini yaari ekhuneelo. Atamu aaipakenle ekhuneelo mmansawe ya makukhu a efiiku, khupaka, mmansawe, wira eererye opaka ethu mmansawe.

<sup>34</sup> Masi Muluku aatthuna okhwa, eliveloo. Vano, wookhala ovirikana wuulupale wa etiini ni woopowa, moone, woopowa. Etiini ekhuneelo. Munnona? Woopowa Oyariwa, yoovaha ya Muluku. Woopowa Oyariwa, yoovaha ya Muluku, ni khivanweryaneya ophwanyiwa ni mutthu wala hata nikhuru n'atthu. Ti mutthu mmosa Muluku onimuruuhelaawe yoovaha ela. Ni soovaha iya sa Ekumi Ehimala sikhalihiwe ni Muluku wa khula mutthu hiyo nihinathhi hata okhalana olumwenku, voottthariha Soolempwa. Bibilia oohimya, mwa Wiisuupulula, wira nwananani a Kristu aarowa orwa mulaponi, aarowa owoototha outhene ankhala mulaponi, yaawo masin'aya ahilempwe muLiivuruni mw'Ekumi ya Mwaapwittipwitthi ohinathhi opattuxiwa olumwenku. Munnona? Muluku, mwa

osuwela Wawe khalayi ene, aahoona t'ani aarowa orwa ni t'ani ahaarowa orwa, Kristu khukhuruwa wira akhalihe ephiro w'ale yaarowa orwa. Moone, aasuwelaka akina.

<sup>35</sup> Vakhala wira Owo Muluku, voomalela, Owo ohaana okhala oohimala. Ni vakhala wira Owo t'ohimala, Owo khokhanle okhalaka oohimala ohikhanle oowerya sothene. Owo khokhanle okhalaka oowerya sothene oohikhanle ookhala mapuro othene. Owo khokhanle okhalaka ookhala mapuro othene ohikhanle oosuwela sothene. Tivo, moone, sothene iyo sinnimukhaliha Owo Muluku.

<sup>36</sup> Tivo, Owo aanisuwela emalelo okhuma woopaceryani. Owo aanisuwela t'ani aarowa ni t'ani ahaarowa, ni Owo aanisuwela wira yaahikhala anci-ene yaarowa orwa, tivo Owo khunveleeliha Kristu wira okhalihe ettipiheryo w'ale yaarowa orwa. Vano, khiivo eniiraahu erina-vo ethu ni yeeyo. Yesu ohimmye wira, "Othene Atithi akivanh'aya," aki, okathi ovinre, "onimoorwa wa Miyo. Ni khaavo onwerya orwa vahikhanle wira Atithi Aka anoomuruuha." Munnona? Vano, moone, sothene siri mwa osuwela wa Muluku.

<sup>37</sup> Nyuwo muniira, "Munna Branham, miyo kiri muhina?" Miyo nkisuwenle. Miyo kinwehererya wira kookhala. Hiyo ninvarela muteko woopowa wahu ni nttittimoho ni woova. Vano, Ekereja ti yootthommwa wira ekumane ni Muluku ehirina nlepa wala ninnyaari. Vano, hiyo nakhala Mukereja mwemmo, hiyo nitthommwe ni Ekereja yeeyo. Vano mwiiwehe mmansinyu ni Masu, vano munowerya oweha ottaiwene xeeni oryaahu.

<sup>38</sup> Vano, vano, oKristu wootthokihiwa khonwerya ovaha elipelo eyo. Nnari. Akina wa awo aniira, "Nyuwo murwe muhimye wira Yesu ti Kristu ni mpatisiwe mukereja." Xetwani onniira ethu emosaru. Owo onnaamini, mmansawe, wira Yesu ti Kristu, ni onnithukumela. Moone, eyo ekeekhaii.

<sup>39</sup> Muluku khonarumeke, hata nipuro mwa Soolempwa, wira okhalakhale mutthenkeso. Khanivo hata nipuro mBibiliani wa yeeyo. Atamu aahipacerya mmosa nto khuvonyeya.

<sup>40</sup> Nto nuumala Nimurodi aaheererya opaka mutthenkeso. Nyuwo mwakhala mulipa-oolepa ihantisi, ni munamusuwela wahala a Papilooniya, musome *aPapilooniya Aili* a Hislop, munoophwanya waarya wowaatta wuulupale. Wira, Nimurodi, mulopwan'ola a etampi, aamukunxe Papilooniya ni ekerej'aya yothene yaamukhaani y'oxinna, wala mapuro vakhiviru, yeeyo yaari muthinto wa-wa oKristu ula wookhootta waamini wa nihiku nookiserya, khupaka nipuro nuulupale n'ale othene akina a yaawo khurukuneya...khuliva mpoosito wa yeeyo. Nto mwemmo owo aamutenke namukattha ni khweererya waatthokiha atthu vamosa, masi khuvonya. Yaahivonya. Eyo yaahivonya.

<sup>41</sup> Kore, Mothakoni 16:1, mwaaththunaka osoma, Kore aaheererya ethu emosaru. Owo aathukumannye aLevi othene vamosa, ni aahithukumanya e...amosa-amosa w'atthu oottottopeliwa, atthu a mukhalelo muulupale, atthu oowaaryya, vano owo ni Datani khutakanxana khwira, "Khelikanne, mutthu mmosa weereryaka okhala vasulu va hiyo othene." Nto siiso awo khweererya opaceriha mutthenkeso vamosa, nto awo khurwa wa Moise ni Aroni, yaawo Muluku aathanlenly'awe muteko, ni khuwiirela wira awo khiyaareere wiihelana mmansaya, wira muthukumano wothene waari woowaaryya, ni awo yaahikhala ehaakhi ya... "Variyari va muttitthi wa akhulupale wookhala olipa," tthiri, awo annihimya. Eyo khenihimmwa oKristu. Eyo enkhala mukhottoni. Nwehe, khereere ovirikana.

<sup>42</sup> Nyuwo pooti okuxa Yoolempwa, ni wira, "Yuta aahirowa wiihophaa," nto "murowe mwaire siiso," mwatthuna vale, masi eyo kheniiriha okhala oratta-ene.

<sup>43</sup> Muluku aamuthanlale Moise ni Muluku aamuthanlale Aroni, ni waari mutthaka wa nihiku. Nto khivancala oreera xeeni wooneyaaya epantte ekina, yaari yoovirikana ni muupuwelo wa Muluku. Ni nihaana ohiya muupuwelo wa Muluku okhala muupuwelo ahu. "Muhiye muupuwelo waari mwa Kristu okhale mwa nyuwo." Ni Bibilia ola onnuupulula muupuwelo wa Kristu. Ni Eliivuru yothene ya Wiisuupulula, eniihaniwa Apokalipise, ti Wiisuupulula wa Yesu Kristu. Ni hiyo ninoowerya woona moota Owo onipwapwel'awe ethu iyo, moota Owo oniroihelaawe epante emosa, ni hiyo ninoophiyerya yeeyo okathi vakhani. Vaareera.

<sup>44</sup> Kore, kookupali wira aari naxariya mwa yoowiira awe. Kookupali wira mulopwan'ovo kha—khaatthuna wira ethu yoonanara. Kookupali wira waari ohisuwela wa mulopwan'ovo wahoonale ntata na Muluku neetteettaka ni osuwela Soolempwa, nto mwaha wa yeeyo aaruuhenlyaawe mootthokelelani.

<sup>45</sup> Ni eyo eri ipursento soophiyaka miloko mithanu na mixexe wa mulattu olelo, wira hiyo nineererya okeliha-mo mmuthokiheryoni mwa Muluku, akhili ahu. Ni khivanththuneya hiyo wuupuwela, mnakhala. Owo t'onuupuwela mwa hiyo. Entthuneya hiyo ovahererya muupuwelo ahu wa otthuna Wawe. Munniwiwa saana vano?

<sup>46</sup> Kore, ni ethunelo yooreera, aaheetta ni mwiixuttiho woowootha, aahimeeryaka axinna ala, ni owooniherya mwaha wo otthokelela, wira Muluku khaamureerinhe Moise paahi, profeta, namitthaka, ni wira aamureerinhe yoowo paahi, masi wira, "Muthukumano wothene waari woowaaryya," owo iirale, "nto vano muthukumano wothene ohaana ehaakhi yo wira yeela, ni muthukumano wothene ohaana ehaakhi yo wira ele."

Nto siiso awo yaahaaphwanya axilopwana ooloka, aLevi. Vano, iwo p'uthanla wa Muluku, yoowo waaroowa wiihaniwa olelo, "arumeyi," muLevi aari murumeyi a mpaami m'olompa. Moise khaapwapwenle mwaha wa yeeyo? Nto, va, owo khonatoko wira oh-... voohittittimiha. Owo aahimeenrye wira ekuxe muhaasa woopahiwa-mo erupani, ni ahele mooro wooreerihiwa, ni ahele muhasa wa erupani vasulu vaya, ni wira attikinye muhasa ola wa erupani, yeeyo yaari yoorama ya Muluku. Vano awo khuphiyerya opaka nikhuru n'atthu wira yeettiheke ekereja, vaavo Muluku aamurumme-awe mutthu mmosa wira aire siiso.

<sup>47</sup> Nto, okathi awo yiiralyaaya yeeyo, Moise aahuuramela vathi wiitho wawe maana owo aanisuwela wira Muluku aahimuruma wira aware muteko ole. Nto Muluku khwira, "Nwiirihe awo erwaane mihasa iyo sa erupani oholoo wa muxaaxa nno." Nto siiso awo vapacenryaaya ottikinya mihasa saya sa erupani soosareya mooro, erupani epattaka, Muluku khimuhimeerya Moise ni Aroni, "Mwiivalaanye n'awo! Mukhume eriyari aya!" Maana, oholoo waya Owo aawiihanne "anatampi, oohaamini."

<sup>48</sup> Nto etampi ohaamini Masu a Muluku. Nyuwo muniiya okhala wira khimunaamini. Nyuwo munootha okhala wira khimunaamini. Munraruwa okhala wira khimunaamini. Nyuwo mwaari mulipa-owaamini, khimwaarowa wira ethu iyo. Ari malaya maili paahi, okhanle waamini wala ohaamini, nyuwo muneettiheriwa ni emosa wala ekina.

<sup>49</sup> Vano, Muluku, woopaceryani, aari Nsu, nto Owo khwiipaka erutthu khukhala ni hiyo. Owo aari Masu, Owo ti Masu! Nto okathi Muluku onkhala-awe mwa nyuwo, awo Masu a Muluku ankhala mwa nyuwo, vaavo munweryanyu omaliherya sothene Owo onihimy'awe ni "Amen." Owo ti Muluku onkhala mwa nyuwo.

<sup>50</sup> Vano nyuwo mwaweha vale, atthu ala oohittheka ni mihasa sa erupani mmatatani mwaya, mooro wooreerihiwa mmatatani mwaya, Muluku aahihula ethaya khwaamiry, khwaavalanya ni Moise okhala wira Moise aahiivalaanya ni yaawo. Nto Moise aahlilopa muthukumano, "Muhirkuneye nnikhuru ntoko nlo. Mukhume eriyari aya!" Vano, nyuwo munnisuwela Soolempwa, musome 16, 17, 18, hata, ekapiitulu, nto munophwanya. "Mwiivalaanihe ni anatampi ala, anatampi oohaamini. Mukhume eriyari aya, okhala wira awo aneetta arowaka opweteya, ni sothene awo arin'aya." Nto okathi awo... ethaya yaahikurumuwa khumora n'atthu ala yaavarenle mooro wooreerihiwa. Atthu oohittheka yootothiwe n'atthu.

<sup>51</sup> Vamosaru olelo! Aakhala atthu anci-ene oohittheka ammorela matapha a ilimalelo, evarenle Masu Oowaarya mmatatani mwawe, ni yaanyiheriwaka wira anlaleya Yaawo. Miyo kihonna ekhalelo emosa wiitho wa murumeyi mmosa okathi ene yoowo, murumeyi mmosa Metotista, aari murumeyi

Metotista mpakha Ettiminku evinre ohiyu. Nto vawehalyaaawe, kinoona wira ennihimya etthu vanci-ene wa nyuwo, munna, okhala ota.

<sup>52</sup> Vano, moone, ovarela mihasa sa erupani, wowunkhela woopahiwa woosivela oholo wa Muluku, nto matata ale evarenle-ene yeeyo, nnakhala vo yaahipweteya ni muhasa wa erupani mmatatani mwaya, okhala wira awo yeererya wira etthu mwa exariya, nnakhala vo, voovirikanya Masu a Muluku, yeereryaka opaka mutthenkeso. Khwira, “Nyuwo khamunreere wiihimya mmansinyu. Nyuwo mw’ani wira muhimye wira murina Masu othene a Muluku?”

<sup>53</sup> Awo yaahivonya woona wira Moise aari na—namitthaka a okathi ule. Moone, owo aarina SIISO ANIHIMYA T'APWIYA. Khaakhanle hata mutthu elapo ya vathi ntoko yoowo. Owo aahikhalaana Mutthaka, nto atthu khuvonya woona Yoowo. Ni Moise aari voolekana ni SIISO ANIHIMYA T'APWIYA. Vekeekhai. Vaareera.

<sup>54</sup> Vano ninniphwanya etthu emosaru olelo, atthu ooreera murima, atthu aalupale, atthu ooreerexa murima aneererya olaleya Masu a Muluku (mmatatani mwaya) mwa ikano kamosa-kamosa soopakiwa ni mutthu. Ethikilaka *va*, ni ethikilaka *va*, ni ekhalihaka *ela*, ni “murwe mwiitakanxe ekereja ni murukunxe omempuru anyu,” ni okhwa muroohoni ni Masu awo mmatatani mwaya! Munnona?

<sup>55</sup> Awo khiyawerya omwaamini namitthaka a Muluku wala Mutthaka Awe wa nihiku nle. Awo khiyawerya osuwela mwaha wa xeeni Muluku muulupale ahaavaraawe muteko nnikhuru nothene n’atthu, nto khuhela mwa mutthu mmosa paahi.

<sup>56</sup> Akavi a yaawo kilavunlyaaka-no olelo, “Ninrowa wira exenee, Munna Branham? Hiyo noosuwela wira mookhalana exariya, masi ninrowa wira exenee? Mutthenkeso onooniikara, hiyo khanaarowa okhalana nipuro nikina n’orowa.” Kinniwoonela othunku; masi nookhala Nipuro. Nyuwo muniira, “Ahe, naamookhwa etala.”

<sup>57</sup> Davidi oohimya, “Kaari mmiravo, nto vano kihuuluvala, nkinamoone naxariya onyanyaliwe, hata osuulu awe ovekelaka esimola ya yoolya.”

<sup>58</sup> Eyo vekeekhai eri mwa mulipiheryo mmosaru awo yaamukhoottale-aya Yesu. Awo yaari ooputaputeleya mmuormoleloni mwaya, ni anamukutho oowaarya ni ipa soowaarya, ni ikereja soowaarya ni ipa moolompa-mo soowaarya, awo yaahivonne-aya omoona Muluku mpaani mw’Awe ya mutthu. “Nyuwo, muryeene mutthu, muniikhaliha Muluku.” Moone, awo yaari ooputaputeleya mwemmmo! Atthu ala yaari ooputaputeleya wira Datani n’akina yaahikhalaana exariya. Nimurodi aari ooputaputeleya wira aamuwerya opaka etthu yaarowa waaviriha atthu vasulu va oviruwa wa Muluku.

Atamu aahikupali wira aakhunenle-ru epwitipwiti awe Muluku khaawerya woona. Khamunwerya okhuneela, Muluku ohaana okhuneela. Munnona? Munnona? Mutthokiheryo wa Muluku onnikhuneela, kahi wawinyu. Kweekwe enikhalaaka siiso, awo anoovonya omoona Yesu mpaani mwAwe moolompa, Muluku owiisoniherya mw'erutthuni.

<sup>59</sup> Olelo moota enikoonihaaya owereya koonaka wira Masu a Bibilia aathikilasiwa vanci-ene ni ilimalelo. Ni atthu a murima wa xariya aneemela vale ni wiiwa Masu awo, ni ansuwela wira Eyo Ekeekhaii, masi awo khaniileva wira yiittikinye, okhala wira ilimalelo saya siniwiixuttiha voovirikana. Murapihe miyaapu ni makapu, nto, axinna, mukeleleke oholo. Masi wa hiyo, ni wa miyo ni ethhoko aka, hiyo nimmukuxa Kristu, Masu. Munnona?

<sup>60</sup> Nrowe nimukuxe Yohani 3 okathi vakhani paahi, Nikotemo, mwiixuttihi ni mulipa-oorumta a muromolelo mmosa muulupale oniihaniwa Sineetriyu. Awo yaahithukumana vamosa, khupaka ilimalelo saya. M—mmosa a aFarisi ni mmosa a aSatukhi, nto awo yaahikhala muromolelo aya okathi uwo, ivirikanelo saya, nto siiso awo... Mulopwan'ola aari mwiixuttihi, mulipa-oorumta a Esineetriyu ila yuulupale, mulopwana mmosa oosuweleya mwa mwiixuttiho. Owo aanisuwela Soolempwa, owo uupuwela siiso. Owo aasuwela eyo ni elimalelo aya. Yesu kohimmye wira, "Nyuko, mwaha wa ilimalelo sanyu, moohonona Sooruma sa Muluku"?

<sup>61</sup> Moone, mwaha wa ilimalelo saya! Exeeni iyo? Ohelamo otaphulela waya mmansaya mwa Masu, ohikhanle ohiya Awo, ethu Awo anihimy'aya. Awo aniira Eyo khenihimy yeela. Nyuko mooweha wira, nlo nsu nimosaru xetwani aarumeenlyaaawe wa Hawa, wira opacerye mutthenkeso woopacerya, moone. "Vekeekhai yaarowa okhala *sa*. Muluku khaarowa wira eyo, nyuko moosuwela." Moone, eyo ethu emosaru. Eyo ethu emosaru olelo.

<sup>62</sup> Vano hiyo ninniweha, mulipa-oorumta ola aahirwa wa Yesu. Ethu yoopacerya, vano, owo aarweenle ophavela Ekumi Ehinalima, owo aarweenle ophavela woopowa. Nnakhalo vo, mutthu a mukhalelo awe, mwiixuttihi wIsarayeli, masi mwiixuttihi wIsarayeli aarwiyye wa Mutthu hiyo nihirinaahu yoolempwa wira ootoko okhalana nihiku nimosha oxikola. Mulopwana mmosa oowuuluvala, namukuttho oowuuluvala, oosuwela, aarwiyye wa Mmiravo. Awo yaari atthu oosuwanyeya, mulopwana thaaciri aarwiyye wa Mulipa-oolola ahaarina nipooro wira uuramihe muru Awe, wira amukohe Yoowo ephiro yo woopowa ni Ekumi. Yoopacerya, awo a Esineetriyu ile, siiso aahihimy Nikotemo, awo yaahoona ethu mwa Yesu atthu akina a mutthenkeso aya yaahaarin'aya. Awo yaahoona wira yaahikhala etthu mwa Yoowo, okhala wira owo iirale, "Rabbi, hiyo noosuwela wira Nyuko..." "Hiyo," ayo, awo

khayaahimya eyo, okhala wira awo yaamoomoliwa. Munnona? "Hiyo noosuwela wira Nyuwo mwa Mwiixuttihi mukhumme wa Muluku, maana khaavo aakhanle wiiraka itthu iya Nyuwo siniir'anyu ehikhanle wira Muluku ori ni yoowo. Hiyo noosuwela eyo!" Oh, wulu! Mutthenkeso!

<sup>63</sup> Vano, hiyo nиннона wira Yesu aari wiisooniherya wa Muluku. Vano, "Khaavo onwerya wira itthu iya Muluku ahikhanle ni yoowo." Awo yaanisuwela wira yaahikhala ethhu yoovirikana mwa Mulopwan'ole. Owo aari Waarya wa nihiku. Owo aari Namoona a Muluku.

<sup>64</sup> Siiso-tho Kore aahoona etthu emosaru mwa Moise. Awo khayaarina mutthu nihiku nle ntoko Moise. Owo aari namoona a oMuluku a Muluku, a nihiku nle, wa owerya wa Muluku. Kore nnikhuru nawe naahoona eyo mwa Moise. Awo yaahisuwela wira khivaaweryaneya okhala Moise; Moise khaawerya otthukula Ephareya Yooxeerya, Moise khaawerya oveleeliha ihasara mulaponi. Aari Muluku mwa Moise, nto, okhala wira Muluku aahiisooniherya Mmansawe mwa namoona wala waarya wa nihiku, awo khuvonya woona Yeeyo. Kore aathuna opaka nikhuru nimosa nothene n'atthu, okeliha-mo etthu p'ithtu.

<sup>65</sup> Ti yeeyo ereerelo ya mutthenkeso, omukeliha-mo khula mutthu oohureya okhanle, ni wiihana "oKristu." Animuroiha mmiravo oxikola ohinsuwela-tho etthu ya Muluku onvikana Hotentote aarow'awe osuwela ohiyu wa wEjitu, anoomuroiha iwe ni onvaha esomelo ni omwiixuttiha pisikoloxiiya, ni onvaha Ph.D., ni ekharawu ya etotori wala ekharawu ya erattelo, wala etthu wala ekina ntoko yeeyo. Ni omuruma olaleya Ehapari yooreera, ohinatoko hata woopowa, onrowa okhootta eyareliwo ni harusi ni ohiimuwa, okhootta ovoniha wa Muluku, okhootta Owerya wa Muluku, okhootta ipacerelo sene seijo Yesu okhwenly'awe, okhootta wira Marku 16 t'owuuupuxeriwa ni Muluku, okhootta "ithoonyeryo iya sinimwaatthara ale anaamini" Yesu ohimmye-ene Masu Mwaneene, okhootta Miteko 2:38, onnikhootta khula emosa wa Soolempwa wira ti soowuupuxeriwa ni Muluku. Ni weererya okuxa elimalelo ya mutthu awo ahinsuwel'aya hat'etthu ya yeeyo, ni onyaanya ni yeeyo. Nto mwaaleela-ru Ekeekhai ni owooniha Ekeekhai, awo annuuliwa muru wiittikinya, mwaha wa mutthenkeso aya.

<sup>66</sup> Kore aairale etthu emosaru. Owo aahimoona Muluku mwa Moise. Owo aahoona wira aari Nanvara muteko a Muluku avaraka muteko mwa yoowo. Ni Nikotemo aahimoona Muluku mwa Kristu, "Khavo mutthu onwerya wira itthu iya ehikhanle wira Muluku ori ni yoowo." Nikotemu aari mmutthenkesoni, ophavelaka okhuma. Kore aari ota, eereryaka opaka mukina wira okele-mo. Eyo ti yaari evirikanelo. Nikotemo aaphavela ophwanya woopowa, wira akhume mw'etthu iyo; owo aahikhala mmo okhuma mmiravo, owo aahooceya n'iyo. Owo

aatthuna woopowa. Masi Kore eererya wiipakela ni—nipuro owo aakhanlyaaawe okhalaka muulupale.

<sup>67</sup> Ti siiso eryaaya n'atthu olelo. Owo ti mulattu ni oKristu, hiyo khinreerane itakiheryo sinci-ene soowootha. Nto atthu ahu aPentekosite, kileveleliwe nuulumo nlo, ari oonanaraxa ni yeeyo, elikanyiheryo ya mw'erutthuni! Muluku anvenxe mutthu anvahé etthu, nto atthu othene mulaponi animweererya omutakihá mutthu uwo. Khamunsuwela wira nyuwo muniiva nikhuru nanyu? Mwaamuttikhaka mphira . . . “Nto mahala,” ntoko Paulo saarow’awe ohimya, “nrowe nitthimakele mutek’owo ni ovilela.” Mutthu orina mphira, muhimukumihe mmatatani mwawe, mphavele omukhapelela. Masi ohiya vo, okhala wira owo khoniira mpantta wa mutthenkeso anyu, nyuwo muneererya omwaakha yoowo. Mutthu mmosa okhanle oohikasoopa, owo khaawerya, aamwiikwattula ni maluwa vatapetini, vano nto ophavela okumiha Nenlo mwa nyuwo. Ti yeeyo. Vano, olavula wa muroohoni, kinihimya. Kileveleliwe, miyo . . . Ahe, owo onimwiikwattula mw’etthu emosa yaamukhaani ntoko Miteko 2:38, owo vekeekhai onoomora. Owo akhalakhalaru aikwattulaka mwa Marku 16, owo onrowa owerya sayi? Munnona? Ha. Masomi oyoyevaxa a Kristu. Nto etthu ene yeeyo yaavaanyihaniwe Omuthukumanoni w’oNicea, awo nlelo anniikwattula mwa yeeyo nuuvira miyaakha iya sothene.

<sup>68</sup> Yeereryaka, Kore eererya opaka mutthenkeso, wira okelemo. Nto Nikotemo aahikhala mwemmo, aphavelaka okhumamo. Nikotemu aahikupaliwa, khukhuma. Kore aahipweteya mwemmo, ni ikuru sawe, owo aahipweteya mwa ikuru sawe. Oh, wulu!

<sup>69</sup> Mutthenkeso Nikotemo waary’awe-mo, waanisuwela wira Kristu aaveleelihiwe ni Muluku, ohimmye siiso. Nikotemo, ekapiitulu 3 va, onnihimya, “Rabbi, hiyo noosuwela wira Nyuwo mwa Mwixuttihi oveleelihiwe ni Muluku, maana khaavo onwerya opaka miiriiryia iya Nyuwo mumpakaanyu ehikhanle wira Muluku ori ni yoowo.” Nto nikhuru nimosaru, mwaha wa mutthenkeso aya, naamwiihanne Owo “Pelizepuli,” mwaha w’owerya Wawe wo owoomola axetwani, nto khwira, “Owo oniwoototha atthu ahu ni Mwiixuttiho Awe.” Eyo ethtu emosaru olelo. Woototha exeeni?

<sup>70</sup> Yesu ohimmye wira, “Miyo kiniira paahi itthu sinaasivelä Atithi, Miyo kinsuka Masu a Muluku paahi,” okhala wira Owo aari Masu. Owo khaakhanle wiiraka ethu ekina woohikhala Masu.

<sup>71</sup> Masi, mwaha wa mutthenkeso aya, mwaha wa enamuna aya, awo yaahikhala atthu ootthukiwa. Mmurimani mwaya awo yaanisuwela, masi mutthenkeso aya khuwaahiya osuka. Vano, opaka ephiro y’ovuluwa, wira yaakhottiherye atthu ohiya mutthenkeso (“atthu othene ehimutthare Yoowo”), wira

yaakhoottiherye atthu ohiya mutthenkeso enatthara Ekeekhai ya Muluku (yeeyo Owo aary'awe Ekeekhai "Miyo ka Ekeekhai, Waarya"), wira yaakhoottiherye awo othara Yeeyo, awo yaahimya wira Owo aawoototha atthu. Nkuupuwelani yeeyo! Mutthu, mmurimani mwawe aasuwela wira Owo aari Muluku, wira Muluku aari mwa Yoowo ("khaavo onwerya ohimya itthu iya, wala wira itthu iya, vahikhanle wira Muluku ori ni yoowo"), asuwelaka yeeyo ni ahimyaka yeeyo ni alipiheryaka yeeyo, vano nto khunarukunuwa ni omwiihana Owo "Pelizepuli, ni namaawoka atthu," atthu aya, "ni Mwiixuttiho Awe." Oh, wulu!

<sup>72</sup> Nikotemo aanisuwela wira Ole aari Profeta. Vano, owo aari mmosa mmuthenkesoni aamphenta Muluku voophiyerya ni aamoova Muluku voophiyerya, ni aasuwenle ni Waataana wa Khalayi wira Mulopwan'ola aahikhala soophaveleya ni aahooniheriwa ni olipiheriwa, Profeta aaveleelihiwe okhuma wa Muluku. Mulopwan'ovo, miyo kinoomuttittimiha vakhala wira owo aarwiye ohiyu, owo aahiphiya vale. Owo t'ophwanelaxa waavikana anci-ene wa awiixuttihi ahu olelo, awo khanrwa nnakhala. Nikotemo vookiserya aahiphiya. Vano, muhimulamule, vakhala wira nyuwo khimumaphiye nlelo. Nikotemo aanisuwela wira Ole aari Profeta, tivo owo aanimoova Muluku. Owo khaarowa omuhiya Mulopwana ole omuhiya owo, Waarya wa nihiku nle. Khivancala moota xeeni Eyo yaary'aya yoovirikana, moota xeeni mutthenkeso awe waahimyaaya wira Eyo yaari yoovirikana, owo aahimoona Muluku amulipiheryaka Mulopwana ole ni aanisuwela wira Ole aari Profeta. Nto vakhala wira Owo aari Profeta, Masu a Apwiya animurweela profeta, ni Owo aanisuwela ethu Owo aahimy'awe. Munnona? Vano owo aahirowa wa Yesu, owo aatthuna osuwela moota w'ophwanya woopowa. Vakhala wira Mulopwan'ola aari Profeta, Masu a Muluku yaari ni Yoowo, ni Owo aamusuwela ephiro yo woopola.

<sup>73</sup> Masi ele Nikotemo aarinaawe wiixutta t'ile atthu anci-ene olelo, a miromolelo sa nihiku nla, arinaaya wiixutta. Nikotemo yaarinaawe wira osuwenle, t'ile atthu olelo antthuneyaaya wira esuwenle, a miromolelo iya. Owo aahinvikana Profeta. Owo aarwiye wa Yoowo wira osuwele, omuleela Owo wira amuhimeerye ele ekhanle ephiro y'Ekumi, nto Yesu Mwaneene aari Ekumi. Ole orina Mwaana ohaana Ekumi. Tivo owo khaa, khaarina orwaaka ophavela wiixutta mwiixuttiho, owo aahaana orwa omukupali Mutthu uwo. Eyo t'ile ekhanle ohiy'ula! Nluku Nikhulupale Noolipihia ninookhoottiwa-tho. Exeeni Nluku Nikhulupale Noolipihia? Awo ti Masu, vekeekhai. Kristu, Owo ti Masu.

<sup>74</sup> Owo aahaana wiixutta ethu. Owo aahuupuwela, "Ahe, vano, Mulopwan'ola Profetaa, Owo Profeta paahi."

<sup>75</sup> Vano, nyuwo mooweha wira, Yesu khaakhunle yookoha awe, Owo aarompwapwela paahi mwaha w'ohoona wawee. Onvikana Profeta, Owo aari Masu ni Muthuko wowaary

wa Masu! Owo aari Muluku aaryaka ovira muhina mwa ekaruma, ooniheryaka wira aari Muluku mwa Mutthu. Owo aari Masu. Yohani Oopacerya, kapiitulu 1... Yohani Oowaarya, kapiitulu 1, kiireke, onnihimya “Wopaceryani naari Nsu, nto Nsu naari ni Muluku, ni Nsu naari Muluku. Vano Nsu nihiipaka erutthu, khukhala ni hiyo.” Nto va yaari Masu a Muluku yaaryaka mwa erutthu ila yaamukhaani ni yootteettheya ya Mutthu, nto Eyo yaahiiriha mutthenkeso ohoona. Masi Owo aarwiye wira aakuxe atthu v’omeekha. Oonvikana Profeta, Owo aari Masu! Owo Ekumii. Kahi... Owo khaarina owiixuttihani w’Ekumi enoorwa, Owo Mwaneene aari Ekumi yeeyo! Owo aari Ekumi. Owo aari Waarya. Owo aari Ekumi. Owo aari Ekumi Ehinimala, yaari mwa Yoowo, ni Owo paahi t’ori Nanvaha Ekumi Ehinimala. “Ole orina Mwaana ohaana Ekumi.” Tivo muhaana... khamukhanle okhalanaka Masu paahi yiixuttihaka sa Yoowo, muhaana okhalana Yoowo.

<sup>76</sup> Nyuwo muniira, “Oh, atthu anookilaathi ni omwiixutta Bibilia owo ni moolumo othene a Ekereku, ni iye sikhanle itaphulelo, ni imaliheryo, ni sikina.” Ni ohisuwela hat’ethu ya Muluku ovikana hat’ethu! Munnona? Nnari! Ole orina—ole orina mu—mu—mukhalelo, ole orina ethkoheryo? T’ule orina Mwaana, orina Owo, Mutthu ene. Owo ti Ole orina Ekumi.

<sup>77</sup> Nikotemo aanisuwela wira Owo aanisuwela ya Ekumi, masi owo khatonko osuwela wira Ole aari Ekumi Ehinimala. Ti yeeyo, Mutthu aalavulanaawe, Namithtaka, Waarya wa nihiku, Waarya wa mulaponi. “Waarya ommwaleela mw’epiphini, vano epiphi khuhisuwela Owo. Owo aaveleeliheriwe Awawe nto Awawe khuhimwaakhela Owo.” Mwaha wa xeeni? Mwaha wa xeeni? Okhala wira awo yaari oowiitthokicha, oowiikhaliha n’urapiha miyaapu ni makapu, ni ilimalelo, mpakha awo yaavonyale-aya woona Masu oowipaka eruthu.

<sup>78</sup> Eyo yootthikela. Eyo yootthikela-tho. Ehangisi iyo enooththikela imaara kamosa-kamosa. Ayo, owo aanisuwela wira Owo ahi—Owo aanisuwela sa Ekumi, masi Nikotemo khaasuwela wira Ole aari Ekumi. Ti yeeyo ekhanle olelo. Atthu anci-ene aneererya omukhaliha Yesu, oh, Mwiixuttih muulupale, awo hata aneererya ohimya wira aari Profeta. Masi nyuwo mweereryaka ohimya wira Owo aari Muluku, eyo ti yoowaattaxa. Munnona? Masi Owo aari Muluku, ni Owo Mulukuu, ni Owo okathi wothene onookhala Muluku. Ti yeeyo. Ti yeeyo.

<sup>79</sup> Nwehe, Owo khaamuhimenrye Nikotemo, vano, okathi owo orwiye-awe wa Yoowo, Owo khaahimmye wira, “Vano, Nikotemo, Miyo kookhalana nttittimihi muulupale wa nyuwo, wira nyuwo mwa mu—mu—mwiixuttih wIsarayeli. Kinimooleelani wira, nyuwo mumphavela Ekumi Ehinimala, khino mwaahaana olokiha osoma wanyu. Nyuwo khamunihimya moolumo anyu oratteene.” Ethiru. Wala, “Khino nyuwo

muhaana ophavela muteko muulupale mmuromoleloni mwanyu, wira mukhalane Ekumi Ehinimala.”

<sup>80</sup> Ti yeeyo atthu anci-ene aneerery’aya wira olelo, uh-huh, muteko muulupale, awo anthuna okhala okhuma pa—pastore ekhale humu a estaatu, wala—wala wa pixipu wala etthu ntoko yeeyo. Eyo kherina naata ni Muluku.

<sup>81</sup> Nkawehani etthu Owo iiraly’awe ohoolo wa mutthu uwo. Owo aahimpwapwela mwaha w’ohisuwela wawe okathi owo aakhalaawe, “Munthuna okileela wira nyuwo mwa mwiixuttihii w’Isarayeli nave khamunwerya osuwela itthu iya, okathi,” Owo iiralyaawe, “mutthu ohaana oyariwa vasya?”

<sup>82</sup> “Vano,” owo khwira, “miyo mulopwana mmosa owuuluvala, okela mmirimani mw’ame aka?”

<sup>83</sup> Owo khwira, “Nto nyuwo mwa pixipu, karteyaale, humu a estaatu mukereja ya Pentekosite,” wala mutthu mukina tho, “mutthu mmosa muulupale mmutthenkesoni, nave khamunsuwela Yoolempwa?”

“Oh, hiyo nookhalana Moise.”

<sup>84</sup> “Mwaamusuwenle Moise, mwaamukisuwela Miyo, okhala wira owo t’ule olavunle sa Miyo.” Munnona? Masi kahi voottariha ilimalelo saya, waway—a mutthenkeso aya, owo waari woovirikana. Masi Moise aahilavula sa Yoowo, ni Owo aari Ole Moise aamuhimmyaawe, nnakhala vo awo khayaasuwela. Mwaha wa xeeni? Awo yaarimwiithukaxa ni ilimalelo, awo khayaasuwela.

<sup>85</sup> Nto axinn’aka ansoma, ankuxa efiita ela, muhittipihe vano. Minuutu mmosa paahi, nrowe niwehe ni etthu ila wiitho wene. Miyo kinnoophentani, nyuwo mwa makhampusi. Ni nkineererya okhala oosuwela sothene. Kaaruuhelaka moonelo owo, weeso mmaalihe efiita mukivekelele. Miyo kimphavela paahi wooruuhelani etthu ekhanle Ekeekhai. Muhihiye eyo woovirani.

<sup>86</sup> Vano, miyo kinnittimiha nlamulo na mutthu, ni sikina, masi nyuwo mwaapakaka mitthenkeso iya... Nkaaweheni aFarisi, khiyaarina nnata ni aSatukhi, okhala wira aSatukhi khiyaamini ni—hata nlaikha wala—wala erooho, wala ohihimuwa, wala etthu, ni aFarisi yaanikhalaan soopiili, nto awo yaari mukhottoni mmosa ni mukhwaawe. Vano Maunisista anaamini etthu emosa, Oraaru onaamini ekina, ni Metotista ekina, nto aPrespiteriyaano ekina, ni nyuwo munikweretha mikaaano sikhaani. Nto murina exeeni? Ovalaana wa oxinna. Mwa vaavo, ninoophwanya nipuro nenlo mBibiliani okathi vakhani paahi, etthu ekhanle, ni etthu Muluku onihimy’awe eyo okhala.

<sup>87</sup> Vano, nnari, Owo khonamuhimeeryeke wira airattelihe. Owo aamumpwapwela paahi mwaha wo ohisuwela etthu y’ekkekhai.

"Nyuro mwa mwiixuttihi w'Isarayeli, nave khamunsuwela itthu iya? Vakhala wira kooleenleni itthu sa vathi, nave muhinawerya osuwela saana..." Muupuwele! "Mwiixuttihi, a enamuna yuulupale mukereja Ortotookisa, pixipu, karteyaale, nave khumunwerya hata osuwela mwa enamuna y'enamwane ya itthu sa erutthu Miyo sinooleelaakani, munrowa osuwela sayi itthu sa erooho sinkhuma Wirimu?"<sup>88</sup>

<sup>88</sup> Masi mulipa-oototha ihopa oohisuwel'etthu mutokweene ahaawerya hata olepa nsina nawe, aahisuwela Eyo, moone, ni aahikhalihiwa muru wa ekereja o'Yerusalem, Petru. Munnona? Oh, "Othene ole Atithi akivahaly'aya, onimoorwa." Munnona? Awo annoona Eyo. Awo annaamini Iyo. Awo anniira eththarihaka Yeeyo, esuwelaka wira khipi etthu enrowa waakhoottihha.

<sup>89</sup> Siiso ntoko mulimi. Kehiyo yootthunyea ohimya eperwa, masi ohelela eyooniheryo. Ehimmwe wira mulimi mmosa aahimuhela mwalyakhu, nto khipiarina mooce oophiyerya, owo khuhela nooce na nrattha vathi vawe. Okathi nrattha naamukhaani nitothonle-aya, nlo naari etthu yootheihaxa alyakhu ale yaatonko aya woona. Nlo naarina wiitho wootheiha woorakama, ni naarowa nirettehaka ohiya wiipa, ni-ni alayakhu othene yaanilya ni oworokhola mweehilini. Nto iwo khipiarai olya wawe, vekeekhai. Nto nihiku nimosa muhore khumweettiherya mpakha wiithela wa ehili, wira aattotte anasope kamosa-kamosa, nto vasulu vantumuxa naahikhala n-ntthiya. Nto khwiiraneya wira eththetu yaavekhulela epantte ya ntthiya, nto nlo naahoona wunkhela maasi. Eyo ti ephattu awe tu. Muhore khwira, "Koo, koo, koo, koo, hokolowa!"

<sup>90</sup> Owo khwira, "Kwa, kwa, kwa," mpakha mmaasini. Mwaha wa xeeni? Owo aari nrattha, opacerya wene. Voohicala moota xeeni mwalyakhu aarettehaawe, ole nlelo aari nrattha.

<sup>91</sup> Nto ti siiso ery'aya wa mutthu otthomeliwe Ekumi Ehinimala. Okathi onoonaawe Waarya wa Muluku, khasivo mitthenkeso soophiyerya molumwenkuni wira simurettehele simuhokoloxeryaka mwemmo. Nnari. Mwaha wa xeeni? Ti ephattu awe. Owo pooti aakhanle olyaka n'awo okathi munci-ene, ni olya ikokhola saya ni ipathanelo, masi owo onniphiyerya nipuro owo ophwannyaawe etthu yoovirikana, vano owo onnisuwela. "Ipwittipwithi Saka sinnisuwela Nsu Naka," ohimmye ti Yesu, "mmalapo iyo khasimmuthara." Siiso iyo saakhanle sittharaka etthu yootikiniha, masi muhina mwaya yookhala etthu yoovirikana. Mwaahiye yiwe Ekeekhai emaara emosa, nto nwoonase. "Othene ole Atithi akivahaly'aya onimoorwa."

<sup>92</sup> Ayo, Owo aahimpwapwela mwaha w'ohisuwela. "Nyuro mwa mwiixuttihi w'Isarayeli, nave khamunsuwela itthu iya? Muhaana oyariwa vasya!" Vano, mutthu eephattu, miyo kintthuna o...nyuro nwehe etthu emosa va, "Nyuro muhaana oyariwa vasya."

<sup>93</sup> Vano, ekumi y'ephattu, vakhala wira nookhalana ekumi y'ephattu, wira nikhale ookhomaalela mwa ekumi ila y'ephattu, mwa itthu s'erutthu, nihaana okhalana oyariwa w'ephattu. Awo khanoorkumihani paahi vamvirini nipuro nlo, moone, khaniweemexani vaavo mwa enamuna emosa. Awo yaahilipiha, masi khuhivar'ethu. Ohaana okhala oyariwa wa vano, oyariwa w'ephattu, wira wookhaliheni ookhomaala wira mukhalane miyoonelo mithanu, weetta, olavula, woona, olawiha, waapapela, woona wunkhela, wiiwa, wiittikinya, sikina, okhala wira nyuwo vo mwa mutthu, ni nyuwo mwa—nyuwo munikhala oovahereriwa itthu iya sothene okhala wira iyo sinkhala epantte ya ekumi y'ephattu.

<sup>94</sup> Nto, mwa eyareliwo yeeyo, imaara sikina hiyo ninkhala oosuwelaxa mwa osuwela wa molumwenkuni wala itthu sa molumwenkuni, nimphiyerya okhala Akhulupale ni—ni asomi aalupale, ni mamekaaniku aalupale ni anasiyensiya, ni sikina. Ni nyuwo kweekwe munnisuwela, okhuma woopaceryani wene, yaari aana a Kayini yaarina enamuna yeeyo yo osuwela; kahi a Sethi, awo yaari amakhampusi oowiiyeviha. Masi aana a Sethi yaari atthu oothunku. Masi aana a Kayini kweekwe yaari oosuwela, oosulu, a siyensiya, matothoro ni atthu aalupale. Ti yeeyo. Bibilia ohimmye siiso, nyuwo moosuwela, Owo onniixuttiha eyo. Ni anatiini saana, masi yaahipweteya wookiseryani. Hiyo ninkhala aakhili mwaha wo orowa oxikola, okuxa isomelo, ni sikina, hiyo ninkhala oosuwela saana, oocencerya, ni ninniwersya wira itthu ni ohimya itthu, ni imaara sikina olavula onvikana mutthu osareiye Erooho. Yesu khohimmye wira, “Aana a olumwenku ula t’osuwelaxa waavikana aana a Momweneni”? Tthiri, okhala wira awo, ni isuwelelo saya awo anniwersya—anniwersya olavula ni okhala oolavilavixa ni ooweryaxa olavula, ni okuxa Soolempwa n’urukunxa Iyo ni wiiriha Iyo ohimya itthu sihinihimyaaya.

<sup>95</sup> “Oh, Eyo khenihimya siiso vene.” Mutthu aahimyaka yeeyo, mmuhuluwe. Muluku onnikhapelela Masu Awe, nyuwo moosuwela, Bibilia oohimya. Awo alempwe voolikana ene enamuna yaatthunyeaya wira Awo ekhale. Munnona? Vano, Awo aniheliwa mwa enamuna emosa wira yootothe, wala emukwattule mulipa aakhili mwa Yaawo. T’okhwayaxa, tivo awo anikwattula aya Vaavo. Munnona? Vaareera.

<sup>96</sup> Osuwela nno wothene ni itthu awo anweryaaya othukumanya, nnya, masi ti mwa...oyariwa iwo ti wa vathi, elapo ela. Owo ti wa vathi, ni ti woovirikanya Erooho ya Muluku. Oyariwa woopacerya, wira onikhalihe ookhomaala mu, onnikhaliha atthu ankhwa, mwaha wa mwiirelo wa etampi omatta, yoomwiiriha mutthu orwa molumwenkuni oviraka mwa muthiyana. Nto mutthu oniyariwa ni muthiyana t'a mahiku vakhani, masi mutthu oniyariwa ni Kristu t'Ohimala. Yobi iirale, “Mulopwana oniyariwa ni muthiyana t'a mahiku vakhani

ni oowaatta mikattyamiho.” Nwehe, masi mutthu oniyariwa ni Kristu, ohaana oyariwa okhuma Osulu. Vano, masi mutthu oniyariwa elapo ya vathi, oniphiiyerya okhala oosuwela ni onnihalela okhala oolavilavixa.

<sup>97</sup> Nkawehani moota xetwani aaryaawe oocencera, owo aanimoototha khula namukuttho orwiye mulaponi. Tthiri owo ohiira. Owo aanimoototha, owo nlelo onniira. Ayo, vekeekhai ohiira. Owo aari oocencera, masi owo aahivirikanya ni musewe awe, nihiku nimosa, Yoowo aamuxinttale. Nto ethu emosa paahi erinaahu wira omulipana Yoowo paahi, Owo oomuxintta. Munnona?

<sup>98</sup> Masi ti okhuma vathi, ni eyo, osuwela nno mutthu onthukumanya-awe wira alipiherye ni wooniherya itthu iya sothene mwaha wa xeeni mutthu aarinaawe wiiraka *ela* ni mutthu aarinaawe wiiraka *ele*, ti yoovirikana ni owanani (muupuwelo w'erutthu) wa Muluku. Yoolempwa ehimmye siiso. Ekeekhai. Voohicala moota xeeni, awo anwery'aya ohonyokola. Kintthuna wira mutthu okoonihe vatthu Muluku otokonko awe okhalana mutthenkeso wala otokonko awe orumiha mmosa, woohikhala opwapwela mu mBibili. Voohicala moota xeeni awo anweryaaya weererya okhala anaakhili, ti yoovirikana! Moota xeeni osuwela okhanlyaya ovenyaka ni woxinttani ovaanyihana ni nyuwo, ni owiirihani nyuwo wiisoona okhala mukhaani *siiso* mwaha wo wooleelani sa yoowo, masi ti woovirikana ni Soolempwa.

<sup>99</sup> Ookhala aakiirenle, “Munna Branham, yookhala etthu emosa miyo enoovirikanyaakani.” Khwira, “Nyuwo mwa Yesu Paahi.”

Miyo khwira, “Miyo nkiihiyo. Miyo nkiniira mpantte wa hata mutthenkeso.”

<sup>100</sup> Humu mmosa a estaatu emosa aarummwe, nihiku nlo, nto khwira, “Ookhala okihimenrye wira nyuwo mwaari Yesu Paahi, Munna Branham.”

Miyo khwira, “Eyo ti yoovirikana. Ti yovonyeya.”

<sup>101</sup> Khwira, “Awo akileenle wira nyuwo munnaamini ophenta wootaphuwa, wira alopwana yaahaana waahiya axaar'aya n'uphavela...” Vano, moone, iwo wootha paahi wa xetwani. Nyuwo moosuwela eyo.

<sup>102</sup> Miyo khwira, “Vekeekhai kinnivirikanya itthu iyo soohilempwa! Miyo kinnaamini ereerelo murima ni oloka. Kinaamini wira mulopwana t'ophitaana ni mwaar'awe awo yaakkhalakaru wira akumi.” Khimwaakkhanle omukuxaka muhivekenle toko.

<sup>103</sup> Nto Yesu Paahi, nikhuru na Yesu Paahi, hat'etthu ya nthowa n'awo, awo t'oloka saana ntoko khula nikhuru, wa miyo. Masi awo anipatisa voovonyeya, awo ampatisela oyariwa

waneenli. Kinnaamini wira hiyo niniyariwa vaneenli ni Erooho Yoowaarya, kahi ni maasi. Miyo kinrumeela Nsina na Yesu Kristu moopatiisuni, ni kхиivo hata Yoolempwa ekina mBibiliani wira elipiherye...wira yiire voovirikana. Khaakhanle hata mutthu mBibiliani aatonko opatisiwa ni nsina “n'Atithi, Mwaana, Erooho Yoowaarya.” Kinthuna mutthu orwe okoonihe nipuro nimosa mutthu mmosa otonko awe opatisiwa siiso. Vano, vakhala wira ti yoohilempwa, muhiye wira yeeyo!

Nyuwo muniira, “Eyo khenvirikana hata vakhani.”

<sup>104</sup> Eyo yaahivirikana wa Paulo. Owo aahaaruma opatisiwa emaara ekina, ni Nsina na Yesu Kristu, vano nto waakhela Erooho Yoowaarya. Nto Paulo ohimmye wira, “Nakhala nlaikha ninkhuma Wirimu,” aKalasiya 1:8, “ninrwa, wiixuttiha ehapari yooreera ekina,” ohiya ele owo iixuttihaly’awe, “nitakhaliwe.”

<sup>105</sup> Moone, eyo elimalelo. Miyo kaalavula ni mulopwana mmosa muulupale woohikhala khalayi. Khwira, “Munna Branham, nkinwerya. Miyo koosuwela wira Eyo ekeekhaili,” owo khwira, “masi kiireke exenei wa Yeeyo?”

Myio khwira, “Mwiiwelele Yeeyo!”

Owo khwira, “Vano, miyo—miyo kookhalana nttittimiho eriyari y'atthu ahu.”

<sup>106</sup> Myio khwira, “Masi kintthuna nttittimiho ni Muluku, tivo mwiiwelele Masu Awe. Nyuwo muhaana okuxa ethanlelo anyu, nyuwo munrowa omurumeela Muluku wala mutthu?”

<sup>107</sup> Masi awo amphwanya mutthenkeso aya, okhaliha-mo ihmeryo iya mwemmo, khunathara. Emaara yoopacerya otonko aya orumeeliwa waari mukereja Katolika y'oRoma. Ti yeeyo. Kimmuthuna mutthu onrowa okooniha eththu ekina yoovirikana. Miyo kinnimusoma wahala, nave, nyuwo moosuwela. Vano muupuwele, owo opatiiso w'Ekatolika, ni atthu othene ampatisiwa siiso ampatisiwa mopatthanani w'Ekatolika. Miyo kinimooniherya ohiyu ohinatthi ovira, Apwiya yatthuna vale. Ti yeeyo. Mwaha wa yeeyo murin'anyu otthika.

<sup>108</sup> Kahi Yesu Paahi. Vano, aakhala atthu anci-ene ooreera murima mukereja Yesu Paahi. Atthu anci-ene ooreera murima a Asempelya a Muluku, Ekereja ya Muluku, Metotista, Patista, Prespiteriyaano, ni Katolika. Masi kхиivo hata emosa wa seijo Ekereja, hata emosa wa seijo. Aakhala atthu mmwe aniira mpantte wa Mukereja. Masi kuhiyo muromolelo owo onaakhaliha awo Ekereja, ntoko atthu aneererya okhaliha eyo siiso. Ti yoovonyeya. Minuutu mmosa paahi hiyo ninoorowa woovahani Yoolempwa emosa mwa okathi vakhani.

<sup>109</sup> Ayo, wira mukhale ookhomaala mulaponi, muhaana oyariwa veephattu wira mukhale ookhomaala, nto eyareliwo eyo enninikhaliha oosuwela ntoko sihimaly'aka. Munnona?

Ni hiyo ninkhala anaakhili, osuwela wahu onnninivaha yeeyo. Masi muupuwele wira eyareliwo eyo, woopaceryani waya, ti yoovirikana. Ti ya vathi ni yoovirikana ni Masu a Muluku, oolo vamaithoni va Muluku ni ethunelo Awe, wohisuwela ethunelo ya Muluku. Vaahaari siiso, Nikotemo aamwiira osuwelanxe onvikana Yesu saasuwelaawe wa Yeeyo. Munnona? "Nyuko mwa mwiixuttihi wIsarayeli?" Munnona? Munnoona vatthu miromolelo sanyu sinrowaaya, vatthu atthu anyu aalupale ni anaakhili anthukumanaaya n'upaka itthokiheryo saya, ni okhaliha?

<sup>110</sup> Mukhiye kooleeleni ila. Khula okathi Muluku oniveelihawa Waarya elapo ya vathi, wa etthu emosa mwa Soolempwa, awo anootthimaka naanaanoru ni yeeyo. Nto mutthu uwo omalakaru orowa, awo ampaka mutthenkeso wa yeeyo. Ni emalakaru otthokiha, kintthuna kinvekele khula nammulepa wahala (vaava naanaano, wala ori mufitani) orwe okoonihe. Khula okathi mutthu otonko awe otthokiha ekereja, eyo ekhwiyiye vaavale vene ni khenatthikele ovenya-tho. Eyo ti yoovirikana ni Muluku. Eyo ti yoovirikana ni Soolempwa. Tivo miyo kir'yaka oovirikanya ni yeeyo. Etthu p'itthu Muluku okhanlyaawe oovirikanya, vakhala wira Muluku ori mwa miyo, vano miyo kinvirikanya ele Muluku envirikany'awe. Nwanani Awe ti nwanani aka. Ekereja Awe ti Ekereja aka. Ekumi Awe ti Ekumi aka. Owo oovaha Ekumi Awe, Owo ohiikhaliha miyo wira mwa mahala Awe kiwerye okhala ntoko Yoowo. Munnona? Hiyo noorukunxa mapuro. Owo ohiikhaliha natampi ntoko miyo ni ookikhwela, nipuro naka, wira kiwerye okhala mwaana a Muluku siiso Owo saary'awe.

<sup>111</sup> Vano munnoona vatthu miromolelo sanyu siphin'ye-aya? (Hiyo khinnapacerye.) Oosuwela mwa akhili a molumwenkuni masi ookhwa wa ethunelo ya Muluku! Vano nrowe niwehe ottuli, neemele vaava okathi vakhani paahi.

<sup>112</sup> Atamu aari oovirikana ni ethunelo ya Muluku, okhala wira owo khaaiwelenle Masu. Eerenrye wiipakela ekhuneelo, etiini. Eyo khuvonya, ni kweekwe ennivonyaka, etthu mutthu oneereryaawe opaka. Nimurodi aahivonya. Kore aahipweteya. Exeeni awo yeereryasaaya wira? Opaka mutthenkeso.

<sup>113</sup> Nto nuumala yeeyo, vookiserya awo vaitthokihalyaaya, Yesu aaphwanny, ookhwa ene! Khwira, "Mookhalana maitho nave khamunwerya woon. Mookhalana maaru nave khamunwerya wiwa." Munnona? Khwira, "Nyuko mw'alipa-oohoona, muniweettiherya alipa-oohoona. Mulipa-oohoona amweettihaka mulipa-oohoona, owaili aya khammorela mulittini?" Owo khwira, "Nyuko mwa mwiixuttihi wIsarayeli, nave khamunwerya hata osuwela ele ekhanle oyariwa vasya? Okathi, nyuko mwaakhanleru ottaiwene wa ilimalelo saya, khuvarelala Masu, nyuko mwaamwiira musuwenle wira Miyo kaarweenle waavaha atthu oyariwa vasya. Mwaamusuwela

nihiku Naka. Mwaamusuwenle Moise, mwaamukisuwela Miyo. Moise aahilavula sa Miyo ni aahihimya wira Miyo kaamoorwa, nto Miyo kiri va! Nto kaahuireke itthu Moise ni maprofeta ahimmye-aya wira kaamwiira, weeso muhikaaminiki. Kaahivareke miteko sa Muluku, weeso muhikaaminiki. Masi nyuwo mwaahiweryeke okaamini Miyo, kiri-ene Mutthu, nto mwaahiwerye okaamini Miyo okhala wira Miyo ka Mutthu ni kinvara miteko sa Muluku, mwaamini miteko maana seiyo sinnikhalela onamoona etthu Miyo kiniir'aka." Munnona?

<sup>114</sup> Masi nto, ntoko olelo, Owo aakhanleru elapo ya vathi olelo, Asempeleya a Muluku yaamukhalana mmosa, Maunisista yaamukhalana mmosa, nto atthu othene yaamukhalana Yesu mmosa. Vekeekhai, muromolelo aya ohaana omukuxa mphira. Munnona? Waahikeleleke oholo, nto awo khanrowa. Ovalaaniha oxinna.

<sup>115</sup> Kinnimuupuwela mwammiravo mmosa oniihaniwa "Davidi mwaamukhaani." Owo mulopwana, oothela vano, kinoona wira ookhalana emusi. Miyo kinniuupuwela okathi owo opacenry'awe tu. Miyo kaahirowa oSt. Louis. Miyo kinniwaka sa aximiravo alaleyi, yaaphiyaka iwe ni wira, "Yesu, mwammiravo, aayariwe mwaalelya inama. Maama, t'evi ehanle ya yeeyo?" Masi kahi mwammirav'ole. Owo aarihela ekhasako awe, khukuxa yoosoma khulaleerya. Masi owo aari exeeni? Yaarimwiiraneya owo okhala Yesu Paahi. Atith'awe, Mwenye Walker, yiira mpantte wa Yesu Paahi. Vano, Asempeleya khayaawerya ovilela eyo. Awo yahaana omphwanya Davidi mwaamukhaani. Vano, akina aya yahaana omphwanya Davidi mwaamukhaani. Nto emaara emosa okathi mwammiravo aarinaawe muthukumano oFlorida, owo aahikihana wira kirwe kimukhaliherye. Nto Munna Moore ni miyo naahisoma makukhu maili epantte y'oholo w'epaphelo ya ihapari, ni hat'etthu woohikhala Davidi mwaamukhaani, khula ekereja yaahikhala Davidi mwaamukhaani. Oh, Muluku aka! Vano, vaakhanle wira nikhuru n'ahumu a Muluku yaahisuwela yoovaha mwa mmirav'ole mwaamukhaani, owo aamukeliha minepa ikonto sene Momweneni, moone; omuleela wira olivyale elimalelo awe ya mutthu ni ela siiso. Muluku aahikhala yoovaha mw'ekumini mwawee, murumelee!

<sup>116</sup> Okathi ovoniha wa Muluku okumiheriwaaya emaara yoopacerya, atthu othene yaahikhala moonelo mmatatani mwaya ni yaaniwerya woona wunkha iretta. Nto, oh, wulu! Mwaha wa xeeni? Awo yaahaana wira yeeyo, mutthenkeso aya waari ottuli mmutekoni. Moone, nyuwo munikhalaana mitthenkeso sanyu oholo wa ethunelo ya Muluku, nyuwo munuuupuwela wira ti yoowo. Masi Muluku ookhalana Ekereja Awe ekelelaka oholo mwa inamuna sothene, Erutthu ya siiri. Nyuwo khamuniitakanipa Mmo, nyuwo munooiyariwa-Mo.

<sup>117</sup> Anaakhili mwa osuwela wa molumwenkuni, masi ookhwa mwa itthunelo sa Muluku. Kileeleni, nto. Kileeleni, nto. Nyuwo

pooti waahimeerya ni owooniherya wira awo aavonya, ni Masu a Muluku ni natiri, nto nnakhala vo awo khanrowa woona. Miyo pooti okilaathi n'ukuxa Masu ni owoonihani wira muromolelo ti woovonyeya. Miyo pooti owoonihani wira iyaaminelo sirin'anyu olelo ti soovonyeya, moone, iyaaminelo iya sa ekereja. Owooniha wira ti yoovonyeya, nto awo aniira, "Ahe, hiyo nixuttihiwe wira naaminiki *yeela*." Moone, wa wuupuwela waka, awo—awo malaxi oowuuma, mwaasuwelaka vale enihimyaka, malaxi oowuuma a musika. Ayo, ti yeeyo. Awo khanwerya woona. Yesu iirale, "Nyuko, nyuko—nyuko khamunwerya woona, wira murwe wa Miyo mukhalane Ekumi."

<sup>118</sup> Aahikhala Nikotemo, mutthu oottittimiheya, mutthu muulupale, pixipu mukereja mwawe, mulopwana mmosa ooimmwa, oophentiwa ni atthu othene, nto aarwiye wa Yesu ni ahaasuvela hat'ethu ya Ekumi ovikana—ovikana hat'ethu. Owo aari oohisuwela saana ethu ya Yeeyo okathi Yesu omuulumenly'awe mwaha wa yeeyo, masi aari naxariya voophiyerya orwa. Akina aya nnakhala khiyarwiiye. Awo yaatthikenle okhala ottaiwene ni akhulupale a anamukuttho ni Pixipu *Lexe ni lexe ni Lexe ni lexe*. Munnona? Awo yaatthikenle okhala ottaiwene ni yaawo, yaapunti okuxa ilimalelo saya s'ahumu ohiya wiiwa Masu a Muluku.

<sup>119</sup> Vano, nyuko pooti waahimeerya, awo khanrowa wiiwelela yeeyo. Nyuko pooti vekeekhai... Mwaanwerya otthokelela... Miyo kinthuna kookoheni ethu emosa. Miyo nkinihimya ela vooveeha. Vano, axinna aniiwa efiita, miyo nkinihimya ela vooveeha. Mwaanwerya okitthokelela miyo kirowaka nno, nto—nto ephutu vamvirini enawerya okikoha, "Muneettelani siiso ntoko sineettaanyu? Kookhalana ekumi, miyo ka ephutu vamvirini va"? Owo onoowerya wooniherya wira wookhalana ekumi, masi ti ya muthinto woohiloka. Owo watthuna vale weettakasa, enamuna emosa paahi warowaayo okhalakhala weettaka, woona, olawiha, waapapela, woona wunkha ni wiiwa, vaakhanle wira owo waaniwerya olavula ni okikoha yeeyo, enamuna emosa paahi, owo waahaana oyariwa enamuna emosaru miyo kiyariw'aka. Amen. Owo khunkhalakhala osuwelaka eyo mwa enamuna ekina. Masi owo wayariwaru enamuna emosaru miyo kiyariwaaka, nto owo onoosuwela itthu sinsuwelaaka. Amen. Oh, wulu! Ayo, mulopwana. Khamukhanle oleelaka ephutu vamvirini moota hiyo oneettaahu ni okhala ookhomaala, waahaana waakhela muthinto ahu w'ekumi wira osuwele saana. Vamosaru ni Erooho! Ethu emosaru t'eryaaya ni Erooho, ahiiso khamunwerya osuwela saana Eyo. Khivantthunyea weererya osuwela saana Eyo yothene, murwe paahi wa Yoowo toko. Maana, "Vahikhanle wira mutthu onooyariwa vasya, owo hata khonwerya woona Omwene," Owo ohimmye wira, eyo ti, "osuwela saana Yoowo." Muhaana oyariwa vasya wira musuwele Owo.

<sup>120</sup> “Ahe,” nyuwo muniira, “Miyo kooyariwa vasya.” Nto khunakhootta Masu? Vanweryaneya sayi nyuwo oyariwa? Makhalelo anyu annoolipiheryani yeeyo, nikhuru nanyu nene muntakanxanaanyu, axipalame a mapururu mamosaru. Munnona? Mulipelele mpakha niphiyerye itthu iyo minuutu vakhani, moone.

<sup>121</sup> Enoorwa ni Erooho. Munwerya sayi waaleela atthu itthu sa Erooho ahiyariwe ni Erooho? Muhaana oyariwa ni Erooho wira musuwele saana itthu sa Erooho. E... Yesu ohimmye wira, “Ettheku enoopela ontthunaaya-wo, nyuwo khamunsuwela onkhumaaya-wo wala onkelaaya.” Munnona? Ti siiso aryaaya atthu othene ooyariwa ni Erooho, khanwerya wooleelani. Mutthu oniyariwa ni Erooho khonuupuwela, owo onimuhiya Muluku wuupuwela.

<sup>122</sup> Munuupuwela wira kaamuwerya weemela vaplataforma va, okhalana muupuwelo mmosa n’umuleela mulopwana mmosa ottuli iwe, “Nsina nawe ti *John Doe* ni owo onkhuma nipuro *khata*, owo ohiira *ela*. Ni owo oomuthela muthiyana mukina ottuli iwe, miyaakha miloko mili sivinre, ni aahikhhalana aana ni muthiyan’ola. Owo ohaana okuxa etthu *ela* ahokoloxe, ni wira *ele*,” nyuwo munona wira, miyo kuupuwelaka, kaamuwerya wira yeeyo? Khuuvu osuwela siiso mwa eyariweliwo ela nno elapo ya vathi wa yeeyo. Ti yoovikana eyo. Ehaana orwa okhuma Osulu. Vano mwayariwaru ni Erooho, Osulu, Ekumi yaari mwa Ole oirale itthu iyo, ohimmye wira, “Miteko Miyo sinvar’aka, nave-tho nyuwo munoovara.”

<sup>123</sup> Oyariwa wanyu ohaana orukunxiwa. Muhootothiwa. Khino nyuwo munnilavula ilavulelo, nyuwo pooti wira mutumphe-ene osulu ni vathi, nyuwo pooti wira mukhuwenle-ene, nyuwo pooti wira mwiirale-ene yothene *ela*, *ele*, *ekina*, nyuwo pooti mukhanle-ene me—mempuru ooromeleya. Nikotemu aari siiso, moone, masi waanimuhaleela oyariwa. Nto nyuwo mwaakhoottaka Masu, ophavela ohela Awo nipuro nikina ni wiiriha etthu Yaawo, ni omwarya Awo siiso, nto... Yesu ohimmye wira, “Ithoonyero iya sinimwaaththara ale anaamini. Murowe mulaponi mothene mwalaaleerye Ehapari yooreera soopattuxiwa sothene.” Vakhalaru wira Ehapari yooreera ennilaleiwa, ithoonyero iya sinoothharela. Mukileele nipuro Owo otonto awe okumiha eyo mukereja. Mukoonihe Yoolempwa vaavo Owo ohimmy’awe wira, otonto awe ohimya wira, “Ti ya okathi khata paahi.” Owo ohimmye wira, “Mulaponi mothene ni soopattuxiwa sothene!”

<sup>124</sup> Ayo, nyuwo mwaahaana waakhela muthinto w’Ekumi Owo aarin’awe, wira mukhale Ekumi Awe. Nto moonaru Ekumi Awe, vano munoosuwela Masu Awe. Ti yeeyo. “Okathi Owo,” nsina na mutthu, kahi muupuwelo, kahi waanyiherya, kahi eyoonelo wii, masi “okathi Owo, Erooho Yoowaarya, enrwaaya, Eyo enookuxa itthu iya Miyo koohimenryaakani, ni enoowuupululelani, ni

enoowoonihani itthu sinrowa orwa." Iwo ti oyariwa. Iwo p'umaliherya wira Awo Masu. Nto mutthu aahimyaka wira ookhalana Erooho Yoowaarya, nave khunakhootta Masu a Muluku ni okhalisha Awo nipuro nikina, vanweryaneya sayi Erooho Yoowaarya okhootta Masu Awe Yoowo? Vano mukoonihe mutthenkeso Mmasuni. Eyo eri vo. Munnona? Vaareera.

<sup>125</sup> Mwaanwerya omuupuwela mulipa a nakoso... Vano va ti enamuna ekereja ahu eryaaya ottuli. Mwaanwerya omuupuwela mulipa a nakoso ompacenrye nakoso nno, ti e... vekeekhai owo nakoso oninnuwa, ni ohaana ophwanya mukhaliheryo voowaakuveya, nto khunarowela nikuttha n'athu akhwiiye, mirutthu, nto khunaira, "Mwaamutthuna orwa okivarela muteko?" Khaarowa ophwanyerya hat'etthu.

<sup>126</sup> Mwaha wa yeeyo mutthenkeso ohinkhalakhalakaaya ovenyaka-tho. Munnona? Nikhuru na ohaamini nookhwa nithukumanaka vamosa ntoko Nimurodi, ntoko Kore, ntoko moovirani m'okathi. Enweryaneya sayi... Owo khonavareleke muteko, khonavareleke muteko mutthenkeso. Owo khokhanle wiiraka. Eri ota wa otthuna wa Muluku, woovira ovikana eyo. Eri voohiphwanyaneya, eri ota woophavela.

<sup>127</sup> Mwaarowa owerya sayi orowa wa mutthu ohinwerya wittikinya, muru, ntata ni nnawu soorakala, omuleela wira munthuna wira owo otthimake ni inawu wa nyuwo, otthimakele muteko n'uvilela, ohiya... Munnona? Owo aarowa owerya sayi wira mutthu uwo ohiweryaka wiittikinya, owo t'orakala? Nyuwo muhaana okumiha orakala iwo mwa yoowo, toko, nto owo onoowerya otthimaka.

<sup>128</sup> Ti yeeyo mutthenkeso ontthun'aya, ovoniha wa Muluku. Oh, wulu! Kinroromela wira nkimpchwanya... kheniiweya ntoko wuulumela. Moone, nkinuulumela, masi eperekü yaahikhomakeliwe enookhuma vookhweya-vo. Munnona? Mwaha wa yeeyo Erooho Yoowaarya ehinwery'aya orumeela muromolelo. Owo omalakaru...

<sup>129</sup> Muupuwele, kinnaamini wira Martinho Lutero aahikhala Erooho Yoowaarya. Vekekhai. Khino kahi mwa ekappati Eyo ery'aya olelo, okhala wira Eyo khiyaavahiwe. Ninniviraka mwa yeela, nyuwo atthu a otapernakulu, va vakwaaturu. Masi owo aanimwaamini Muluku, "ni ole onaamini ookhalana Ekumi ehinimala." Miyo nkinatoko wuupuwela wira aahikhala mutthu aamini iyo ntoko miyo, mpakha voosi'sula, kimwiwalyaaka Charles Fuller okathi waarowaaka. Owo onnaamini, nave, wira oyariwa vasya khuhiyo opatiiso wa Erooho Yoowaarya. Oyariwa vasya onkhala oyariwa. Erooho Yoowaarya ti opatiiso. Munnona? Vaareera.

<sup>130</sup> Vano ninniphwanya wira mulopwan'ola aahaana oyariwa vasya wira okhale ookhomaala. Vaareera, oyariwa wa erutthu, nto munkhalana osuwela wa mulaponi. Nto osuwela wa

mulaponi onimwiwelela mwiixuttihi aya a erutthu. Khweeli. Vekeekhai mwaha wa yeeyo mutthu ohirina oyariwa vasya, ni omuleela Masu a Muluku, awo anrowa omwiwelela pixipu aya, humu aya wala mutthenkeso aya, ohiya Masu a Ekumi. Mwaha wa xeeni? Khonsuwela hat'etthu ekina woohikhala yeeyo. "Vano, moosuwela, nihiku nlo miyo pooti okhala humu." Vano, Nikotemu aari mwiixuttihi. Eyo yaari yoonvikana humu, owo waari onvikana pa—pa—pastore, eyo yaari ovikana, owo aari mwiixuttihi wIsarayeli. Munnona? Ayo, ni owo aari mutthu muulupale, owo aaniira mpantte wa nikhuru nla nave khaasuwela hat'etthu ya Muluku. Munnona? Sothene owo aasuwelaawe aari wahala vakhani.

<sup>131</sup> Oniphwanyihani yooreera Muluku a ehantisi Owo aahikhale mmosaru olelo? Oniphwanyihani yooreera Muluku a Moise vaari wira Owo kahiyu Muluku mmosaru olelo? Oniphwanyihani yooreera Muluku aawerya omoopola mutthu vamwiikimanyo ahaawerya omoopola mmosa a mukhalelo mmosaru olelo? Ntoko kweekwe sinihimyakaaka, "Eniphwanyihani yooreera onvaha xirikhu anyu inuku sooreera ni ivitamiina, wira mmwiirihe owo okhalana mapupha a ikuru ni ooreera, nave khinamuhela mukayelani?" Nkinsuwela. Ophavela omuleela sa Muluku oowerya n'itthu siiso, vano omukeliha mmutthenkesoni hata ohinaamini ethu iyo. Munnona? Eri ota voomalela. Mwaha wa yeeyo envonyaaya, ohookhwa. Khivanweryaneya ovarela muteko. Muluku khonavareleke muteko.

<sup>132</sup> Muupuwele paahi, Erooho Yoowaarya khenaireke, hata okathi mmosa, khenavareleke muteko mutthenkeso, hata nipuro mwa Soolempwa wala hata nipuro mwa wahala. Akhala mutthu mfiitani mu, wala ori vaava, onwerya okooniha nipuro Erooho Yoowaarya ekunxe-aya mutthenkeso khupaka mweettelo mulaponi, orwe okileele. Kintthuna wira nyuwo mukileele elivuru ya wahala okhummyaaya-mo. Nyuwo moosuwela wira khekhanle muhina mwa Soolempwa, vano miyo kintthuna nyuwo mukoonihe wahala owo okhummyaaya-wo. Muluku khonavereleke muteko ethu ntoko eyo. Owo onimurumeela mutthu mmosa, kweekwe.

<sup>133</sup> Vaareera, oyariwa ni Erooho. Vano, oyariwa wa erutthu, ni okhalana osuwela wa molumwenkuni, osuwela onrowa omwiwelela mwiixuttihi a erutthu. Oyariwa ni Erooho onkhala waamini ni wiiwelela mwiixuttiho wa Bibilia, ni Erooho Yoowaarya. Nto mutthu oniyariwa ni Erooho onimwiwelela Masu a Muluku voohicala ethu xeeni elimalelo enimuleelaaya. Ti yeeyo paahi. Nyuwo munooyaripa-tho, mwaha wa yeeyo munoon'anyu. Wira mpantte wa mutthenkeso, ohela miroromelo sanyu sothene mwemmo...

<sup>134</sup> Vano, miyo nkinihimya wira atthu mmutthenkesoni khayariwe vasya. Vano, kinoophiyerya yeeyo muhina mwa minuutu vakhani, Apwiya yaththuna vale. Vekeekhai, awo

aayariwa, masi awo t'atthu v'omeekha. Mutthenkeso khoyariwe vasya; atthu mme aayariwa vasya. Masi mutthenkeso onoonvalaaniha paahi ni Muluku, ti yeeyo tu oniir'aya: ovalaanya. Vaareera. Vanaamwi eruthu, muromolelo wiixuttihaka eruthu, okathi wothene ti woovirikana ni otthuna wa Muluku.

<sup>135</sup> *Oyariwa vasya* enihimya okhala “ooyariwa okhuma Osulu.” *Vasya* enihimya “okhuma Osulu.” Kinoona wira munnisuwela eyo, moone. *Oyariwa vasya* enihimya okhala “ooyariwa okhuma Osulu.” Vano, moone, musomeke mwathhuna vale, eleexiku. Moone, enihimya “oyariwa okhumme Osulu.” Okhala wira, nyuwo muyariwe *nno*, vano oyariwa vasya muhaana oyariwa okhuma osulu *Nno*, wira muyariwe vasya. Vano Omwene ole ori osulu saana ovikana omwene ola, muulupalex a ovikana omwene ola, mpakha omwene ola okhanlyaya ololo wa Ole, ni Ole ololo wa ola.

<sup>136</sup> Ntoko sinihimyakaaka imaara sinci-ene, miyo n'amwaar'aka nno woohikhala khalayi naarowa othuma soolya kamosa-kamosa, miyeeri vakhani sivinre, nto naahimoona muthiyana mmosa aawanre esaaya. Nto eyo yaari etthu yootikinhaxa naatonko ahu woona mwa okathi munci-ene.

<sup>137</sup> Ahe, voosiis'ula, miyo nkinihimya ela ntoko oveeha, kihiiwa mmosa wa mitthenkeso suulupale soosuweliwa. Nto mwan'aka mwamuthiyana ni miyo naamwiwa raatiyu okathi waarowaahu ovahererya ekereja. Nto nsipo awo yiipaaya, muthinto mmosa wa etthu ekina ni *Lexe ni lexe*, wiipa iwe vakhani w'oratta oniiweya wa miyo ntoko athiyana anttiyaaya iphumu mpakha awo oripelela wiitho, vano nto ni wuupuwela wira iwo wiipa. Iwo osonya. Okisivela wiipa wooreera wa Pentekosite, okhuma mmurimani mwanyu. Mwaahiweryeke okuxa nsipo mmucomani wa makhala, masi nnakhala vo munimwiipa, mwiipaka ni waatthapela Apwiya. Kinoona wira eyo ti ya erooho. Okisivela eyo. Masi ottiyela iphumu sanyu iwo mpakha okhala ooripelela wiitho, ni okhwa vano nto otthika, t'ani... Nyuwo hata khamunsuwela mmansinyu etthu muniip'anyu. Munwehererya sayi mutthu mukina osuwela? Ti yeeyo. Yesu ohimmye wira, “Hiyo ninlavula itthu iye hiyo ninsuwelaahu.” Eyo ekeekhai. Ti yeeyo. Etthu yaatthuneya hiyo wira wiipa etthu ensuwel'ahu mmurimani mwahu, ele enoon'ahu.

<sup>138</sup> Nto vamalinhe-aya, mwan'aka mwamuthiyana onsoma muusika, nto owo khwira, “Munna,” owo khwira, “ole vekekhai waari wooratta.”

<sup>139</sup> Miyo khwira, “Ayo, masi akavi wa nikhuru nle noowiipa n'atthu oophiyaka miloko mithanu munnuupuwelaanyu wira yaahikhalaana asikaro moomumulani mwaya? Akavi a nikhuru nle noowiipa munuupuwelaanyu, wira nsana ohiyu okhalaka ohiyu wa Saapatu, khiyaawunrye yoowurya y'epatthani?

Athiyana akavi mmwe yaarina maihi oometthiwa? Akavi yaaipintanri, okathi pastore a ekereja aahimmy'awe mahiku vakhani avinre, ‘Muluku aahipaka olumwenku wooreeraxa okathi Owo opakaly’awe opintari?’” Hiyo, nisuwenle-ene wira ori muthiyana mmosa mBibiliani aapintanri wiitho wawe, nto Muluku khimukhuuriha alapwa. Nto hiyo, khula mutthu onsuwela ethu ya ekereja ni w’apakawu, onnisuwela wira opintari enamuna y’epakawu, kweekwe ennikhalaka. Nave, nnakhala vo, athiyana anniira. Ni alopwana envuraka sikaro, awuryaka, yiiraka itthu soonanara. Nto yeemelaka vale ni wiipa, masu ntoko yaawo. Ninoophiyerya yeeyo minuutu vakhani vaava va. Vaareera. Wiira mpantte wa mutthenkeso, okathi, onoorowa okhala ovirikanyiwa Woolamuliwani, wuupuwela waka.

<sup>140</sup> Oyariwa ni Erooho, onkhala waamini ni wiiseettiha mwa Erooho, onkhala osuwela ni waamini ni murim’anyu wira Yesu ti Kristu ni Ala Masu Awe, wira khaavo moolumo makina akhanle waacereriwaka-Mo wala okumihiwa-Mo nsina nanyu nihikumihiwe Muliivurumi mwa Ekumi. Eyo yaari yoolipa. Mwaacereraru ethu emosa Mmo, mwa ilimalelo sanyu, wala okumiha etthu emosa Mmo, ahe, Kristu oohimya, Mwaneene, “Nsina nanyu ninoofuciwa Muliivuruni mwa Ekumi.” Vano, mphwanye mutthenkeso, muromolelo mBibiliani. Nyuwo munootthyawa! Vaareera. Voohicala erutthu, wiixuttiha wa muromolelo ti woovirikana ni Bibilia. Ayo. *Oyariwa vasya* enihimya “Oyariwa vasya okhuma Osulu; ooyariwa Osulu.” Vano hiyo ninkhala ookhomaala mwa itthu sa Osulu. Oh, wulu! Okhala wira Awo ti Mwaneene airaka muhina mwa Masu Awe mwa nyuwo, erintta Awe, wa Mwiri.

<sup>141</sup> Mwaha wa yeeyo Yesu ohimmy’awe wira, “Kaahivareke miteko s’Atithi Aka, muhikaaminiki.” Oh, vekekhai! Owo ohimmye wira, “Khaavo owenle Wirimu ohikhanle Ole okhurunwe Wirimu.” Nkanweheni Owo omureherya Nikotemo va, okathi Nikotemo... Nyuwo moosuwela, awo yuupuwela wira, Owo oryeene Mutthu, khivaaweryaney Owo okhala Muluku. Nto Owo khwira, nto vale Owo khwira, “Khaavo owenle Wirimu ohikhanle Ole okhurunwe Wirimu, ori Mwaana a mutthu okhanle vano Wirimu.” Eyo yaahimutepela owo. Vaaweryaney sayi Owo, Mwaana a mutthu, okhuruwa Wirimu, *okhuruwa* Wirimu, aari mmosaru yoowo *owenle* Wirimu, mmosaru Yoowo eemenle va vasulu v’empa ela, aalavula ni Nikotemo, aari vano Wirimu? Ahe, owo aahaana wira oonne wira aari Muluku. Owo t’okhala mapuro othene, mapuro othene! Munnona? Masi owo, mwa ilimalelo sawe, khaasuwela eyo. Owo khaari a mupuwelo wa muroohnoni. Muupuwelo wa mw’erutthuni, nto khaawenrye ovaria eyo.

Owo onihimya wira, “Atthu aniira wira Miyo Mwaana a mutthu ki pani?”

“Akina aniira, ahe, ‘Owo Mwaana a Davidi.’”

<sup>142</sup> Owo khwira, “Vano xeeni Davidi mwa Erooho aamwiihanenle-awe Owo ‘Apwiya,’ wira, ‘Apwiya ahaahimeerya Apwyi’aka, “Mukilaathi moono Aka woolopwana, mpakha waakkaliha awan’Inyu ntthatto na inawu”?” Owo onkhala sayi oowaili Yoophuwa ni Osuulu wa Davidi; Owo aari Davidi ahinathhi, Owo aari Davidi, ni numala Davidi. Munnona? “Owo ti Yoophuwa ni Osuulu wa Davidi,” Bibilia ohimmye siiso, oowaili Yoophuwa ni Osuulu wa Davidi. Vaaweryaneya sayi Owo okhala Mwan’Awe nto? Vaaweryaneya sayi Owo okhala Apwyi’awe? Bibilia ohimmye wira, “Okhuma vano mpakha oholo awo khiyaamukonhe Owo hat’ethu.” Kinoona wira yaari etthu yooreera, nave. Ayo, mulopwana. Vaareera.

<sup>143</sup> Ooyeriya vasya okhuma Osulu. Vano ninkhala ookhomaala, ookhomaala mwa itthu sa Osulu, nto, maana Ekumi Awe eri mwa hiyo, akhanle Masu Awe alipiheryaka Masu Aneene. Erooho eri mwa nyuwo ti Masu oowiipaka erutthu mwa nyuwo. Erooho ennikhapelela Masu, ni ti yookhomaala elipiheryaka Masu.

<sup>144</sup> Vano, Erooho khenkhomaala mwa hata muromolelo. Eyo khencaliwa ni opaka mutthenkeso, okhala wira Erooho Eneene ti yoovirikana ni mutthenkeso. Mitthenkeso simphavela itthu sa molumwenkuni, muupuwelo wa molumwenkuni, ni awo ampaka ipa moolompa suulupale ni itthu sooratteliwa, ni mitthenkeso suulupale sooratteliwa, alaleyi oorattihiwa, ni sikina siiso, ni muxovo w’atthu woomalela oreera mpooma. Vaavo, Erooho emphavelaaya ophwanya mirima sa xariya vaavo Erooho eryaaya yoophavelaxa wooniherya ni olipiherya wira Masu othene a Muluku t’eekkhai. Munwerya sayi nyuwo, vanweryaneya sayi Erooho ovara muteko mmuthenkesoni owo okhoottaka, okuxaka iyaaminelo ohiya Masu? Khekhanle wira. Tivo, moone, ohookhwa. Muluku khonrowa muthinto owo wa mapuro ophwanya Yawawe, ni-nikhuru n’athu wira envarele muteko Yoowo, okhala wira awo ahookhwa. Awo t’alipa-oohaamini Masu, ahiiso khiyaarowa okhala mwemmo. Munnona? Vano, hiyo nookhomaala mwa itthu sa Osulu. Vano, Erooho ennikhapelela Masu. Vano, eyo eekkhaii, okhala wira Erooho ennivaha Ekumi Masu. Munnona? “Yoolempwa enniiva; Erooho ennivaha Ekumi.”

<sup>145</sup> Vano, miyo kaamoorwa olelo, kiwehaka miri suulupale sooreera mutakhwani mmwe, matumuxa maalupale, ookhwila, a nceno, makukhu ooripelela oohimora oomwaramwareya mwemmo. Miyo khwira, “Nyuwo moosuwela exeeni ile?” Miyo khwira, “Ninoomalaru ophwanya okhwa, vano Muluku khukumiha ehupu Awe ya ithutu, khuhela mmatumuxani. Awo maluwa a woosikhani. Ekumi yoothikela mutthayani. Muluku oroosikha ipyo Sawe sothene sa maluwa ni itthu, oroosikha-tho, nto Owo khuphuwiha ehupu Awe ya ithutu. Owo onweha elapo ya vathi okhala wira awo maluwa a woosikhani. Masi nsuwa

naaphattuwaka-tho, epyo eyo enookuxa-tho ekumi.” Amen. Vaareera.

<sup>146</sup> Erooho ti yoocaliwa olipiherya Masu. Nto vakhala wira nyuwo mukupanli elimalelo ohiya Masu...Vano, nyuwo muniiira, “Ahe, hiyo ninnaaamini Awo othene, masi, Munna Branham, koosuwela wira hiyo khinnaamini *Ila*.” Nto vaavo ti nipuro muneemelaanyu.

<sup>147</sup> Nakapela aahikileela emaara emosa wira owo...wira ka—kapitawu mmosa iirale, ahiiso kookupali wira aari mukhulupale a anakhotto, iirale, “Nakapela, murowe iwe, ookhala kapitawu mmosa onkhwa. Owo orimoopeliwa.”

<sup>148</sup> Owo khurowa iwe, nto kapitawu amwiilipiha. Awo khumpurulela muheemani ya Mwiikimanyo Wooxeerya, nto owo khwira, “Kapitawu.”

<sup>149</sup> Owo khuweha opwaphwaruwa wa ephome, nto owo khwira, “Ayo, mulopwana.” Nto owo khwira, “Nyuko mwa nakapela.”

“Ayo.” Owo khwira, “Nyuko munookhwa, kapitawu.”

Owo khwira, “Miyo koosuwela.”

Owo khwira, “Nyuko mwa muKristu?”

Owo khwira, “Miyo kaanikhala.”

<sup>150</sup> Khwira, “Nyuko mmuhin’ye vayi Yoowo, kapitawu?” Owo khwira, “Munomphwanya Owo vaavale mmuhin’ye anyu.” Voolikana.

Kapitawu khwira, “Nkinwerya wuupuwela.”

<sup>151</sup> Nakapela khwira, “Vannireerela, khamurina woohikhala minuutu miili-tho, moota muniilipihaanyu.” Eyano etthukuwaka, ephome ekhumaka mwaano mwawe ni mmaaruni, ni ipholovolo sa kapwithi siryeene mwa yoowo. Khwira, “Vanreerela mwaakuve, masasu anyu anoosarya.”

<sup>152</sup> Nto kapitawu khupacerya weettasa, ommaathale-ene vale okathi owo aailipih’awe. Otheya khurwa owiitho wawe, khwira, “Miyo koosuwela vano.”

Khwira, “Nyuko mmuhin’ye vayi Yoowo? Mpacerye vaavo.”

<sup>153</sup> Owo khwira, “‘Vano kinimumpaathi kirupe.’” Ti vaavo aamuhin’yaawe-vo Owo, ti vaavo owo aamphwanny-e-awe Owo.

<sup>154</sup> Mutthenkeso anyu waaixuttihaka etthu yoovirikana ni Masu, nyuko munimuhiya Owo vaavo. Mutthike, okhala wira Owo onikhomaala olipiheryaka ni okhalihaka Masu ekeekhai. Ti yeeyo Yesu aary’awe, okathi wothene airaka otthuna w’Atithi. Munnona? Vaareera.

<sup>155</sup> Vano, moone, osuwela wa mutthenkeso wa Nikotemo khiwaahimya hat’etthu wa Muluku. Vano, khivancala vakhala wira aari mutthu muulupale, ntoko siniihan’ahu, mmutthenkesoni, mwiixuttihi wIsarayeli, osoma wawe wothene

ni akhili khiyaahimya yeeyo [Munna Branham onrumiha ikatha sawe—Mol.] okathi owo eemenly'awe oholo wa Kristu, opwapweliwa omosa paahi wa yoowo. Vano, miyo kinnitthokelela atthu othene wira "Tiithi Oowarya, Nikotemo. Tiithi Oowarya, Nikotemo. Hiyo ninnuurama oholo wanyu, mulopwana." Masi okathi Yesu, owo eemenlyaawe oholo wa Muluku, Owo aahimpwapwela mwaha w'ohisuwela wawe. Tivo, munnoona vammaleaaya yothene eyo, muliyale! Rwaani, nirowe wa Muluku. Ti yeeyo. Vaareera.

<sup>156</sup> Nnakhala osuwela wuulupale wa Kore khiyaahimya etthu, wala wa Atamu, khula mmosa okhoottaka Mutthaka woolipiheriwa wa Muluku. Vano nrowe niwiriyane oratteene vano, ninrowa okela mmaasini moorakama muhina mwa minuutu mmosa. Moone, khula mmosa a yaawo, ethu awo yaakelenlyaaaya mmulattuni, Nikotemo, Kore, Nimurodi, ni akina, okhala wira awo khiyaamusuwenle namiththaka a Muluku ni Masu oolipiheriwa a nihiku nle. Vano, khula mutthu onnisuwela eyo. Vano, naamuwerya okhala vaavo okathi munci-ene. Masi Muluku onoohimya khalayi ene ni ohimya ethu enrowa wiiraneya, mutthu ompaka mitthenkeso, onoomukhaliha mutthu wiivarela voolikana. Awo yaanaamini wira aahikhala Mesiya aarowa orwa. Oh, aYuta ale, oh, wulu, vekeekhai! Masi okathi Yesu oruuly'awe enamuna Owo iiraly'awe, awo yiirale, "Khivanweryaneya okhala Yoowo." Awo anoovonya osuwela saana Masu. Vano, Yesu khaarwiye voovirikana ni Masu (Owo aahirwa?), masi Owo aarwiye voovirikana ni otaphulela wa mutthenkeso wa Masu. Moise khaarwiye voovirikana ni Masu, owo aarwiye voolikana ni Masu; masi Kore khuvonya woona. Nto mwa evirelo y'okathi yothene enkhalaka siiso.

<sup>157</sup> Vano nkawehani. Mutthak'ola wa nihiku khivanweryaneya paahi okhala etthu yiiraka "nookhalana Ekekhai ni nookhalana ela, ele," ehaana ohimmwa khalayi ene mwa Masu Awe! Vano nto Masu vanruuhiaaya, ehaana okhala yoolipiheriwa oratta-ene ni Masu.

<sup>158</sup> Yesu aahilipiheriwa oratta-ene ni Muluku, ni Masu. Owo iirale, "Mwaamusuwenle Moise, mwaamusuwela nihiku Naka." Maprofeta yaahilavula saana sa Yoowo, maprofeta othene yaahihimya saana etthu Owo aaryaawe. Nave nnakhala vo eyo yaahaakhaliha oohoona, awo khiyaawerya osuwela. Munnona? Masi Yesu aari... Ni miyo nki...

<sup>159</sup> Kintthuna kihimeerye ela efiita, ni nyuwo, nave. Moone, namiththaka ni Mutthaka wa nihiku!

<sup>160</sup> Vano, nyuwo mwarowa vale, Ativentista A Seetimu tiiya aniira, "Hiyo nookhalana, musukeke nihiku na Saapatu paahi!" Mukoonihe yeeyo mwa Soolempwa. Muhanu Eddy Baker ohimmye wira aahikhala. Mukoonihe yeeyo. Anamoona

a Yehova ahimmye wira awo yaahikhalana. Mukoonihe. Munnona? aMetotista anihimya wira awo aakhalana yeeyo. Mukoonihe. aPatista anihimya wira aakhalana. Mukoonihe yeeyo. Mukoonihe khula mitthenkeso. Miyo kiniwooniheryani wira awo ari, khula mmosa, ota wa otthuna wa Muluku. Khula mmosa wa seiyo soovirikana, siixuttihaka ilimalelo s'atthu ohiya Masu a Muluku. Miyo nkinsuwela hata mmosa wa seiyo waarowa okupali itthu silempwe mBibiliani vekeekhai ntoko Owo silempwalyaawe. Ti yeeyo. Masi mutthu aarwaaka ni wira, "Miyo kookhalana Mutthaka wa nihiku," owo ohaana wooniwa oratta-ene toko ni olaleeriwa khalayi ene orwa.

<sup>161</sup> Okathi Yohani Mpatisa aaphiyalyaawe vale, awo yiirale, "Nyuko mwa Kristu?"

Owo khwira, "Nkiihiyo."

Khwira, "Mwa—mwa—nyuko mwa Eliya?"

Owo khwira, "Nkiihiyo."

Owo khwira, "Nyuko mw'ani?"

<sup>162</sup> Owo aaniwerya wiisuwaneyeiha mwaneene, owo aahikhalana Mutthaka w'okathi. Owo khwira, "Miyo ki nsu na ole onikhuwela mothakoni, ntoko saahimme-awe profeta Yesaya. Vano, vakhala wira oyariwa waka ni makhalalelo aka khanlikana ni yeeyo, muhi—muhiakaakhele."

<sup>163</sup> Okathi Yesu orwiiyaaawe, yaari etthu emosaru, etthu emosaru. Naminthaka orina Mutthaka, ohaana okhala Mutthaka w'ohimmwa khalayi ene ni Muluku. Vano nto Muluku, alavulaka mwa namithaka ola, onnilipiherya wira eyo Ekeekhai. Munniwi saana? Munniwi saana? Mwiiwe saana! Ehaana toko okhala SIISO ANIHIMYA T'APWIYA, woohimmwa khalayi ene. Vano nto namithaka orina Mutthaka, ohaana okhala yoolikana ele Muluku aahimaly'awe wira yaamwiiraneya okathi yoowo.

<sup>164</sup> Ti siiso Moise aary'awe. Mwaha wa yeeyo owo aamonryaaawe aipopheelaka vathi oholoo wa Muluku, khwira, "Muluku, Nyuko mukirumme."

Owo khwira, "Mwiivalaanihe nnikhuru nle."

<sup>165</sup> Munnoona enthunaaka ohimya? Eyo kweekwe t'enkhala etthu yaavirikanaye muupuwelo wa mutthu, khwaakumiha mwa otthuna wa Muluku. Vano muupuwelo, yoohimmwa khalayi-ene ni Masu Awe ni yoolipiheriwa oratta-ene ni Masu Awe. Vano, Yesu ohimmye wira, "Kaahivareke miteko...sa Muluku, weeso muhikaaminiki. Moone, Miyo kaavonyaka...Khwira, t'ani a nyuko onwerya okihimyana etampi Miyo? T'ani a nyuko onwerya okooniha wira Miyo ka mulipa-oohaamini?"

<sup>166</sup> Nikotemo iirale, "Hiyo noosuwela wira Nyuko mwa... Rabbi, Nyuko mukhumme wa Muluku, okhala wira khaavo aarowa owerya wira itthu iye ehikhanle wira Muluku ori ni

yoowo." Munnona? Vano eyo yaahooniherya wira Owo aari mulipa-oowaamini.

<sup>167</sup> Vano, hiyo nimmusuwela wahala a ekereja. Vano nwarye ixapheyo sanyu so wuupuwela. Khivaxiye nlelo, moone, vano nwiriyane oratteenexa vano nto kinimwiilipiha wira kikhale oowaakuva ntoko sinwery'aka. Miyo—miyo kintthuna... Nwiriyane oratteene efita. Vano, khula mutthu otonko omusoma wahala a ekereja, onnisuwela wira emaara yoopacerya oKristu otonko aya otthokihwa, yaari ekereja Katolika y'oRooma. Vano, waatonko ene okhala okathi eyo ehinatthi, kintthuna wira mutthu amuruuhe wahala ene akoonihe. Miyo ka mpathhani a vatthirima a Paul Boyd, atthu oomusoma wahala anci-ene aalupale. Miyo kookhalana moosoma waka vale, *Muthukumano wa Ohoo lo w'oNicea, Muthukumano w'oNicea, Axitithi a oNicea*, soolempwa sothene sooreerihwa sa ekereja,kinsuvel'aka. Miyaakha miloko miraru ni miraru koosoma iyo, kihuuluula oweha. Khonakhaleke mutthenkeso mmosa. Ekereja Katolika ti mai a mutthenkeso. Hiyo noosuwela wira eyo ekeekhaii. Khenakhaleke ekereja yootthokihwa, okhalana muromolelo, mpakha ekereja Katolika. Nto nuulumo *katolika nnihimya* "ya elapo yothene." Nto awo aakhaliha etiini ya ekereja ni ya estaatu, ni khukhaliha vasulu va oruma wothene wa oRooma, ni yaarina voophiyaka e—epantte yooreeraxa ya molumwenkuni yooxinttiwa okathi uwo. Yaari ekereja ya estaatu, nto ale yahaarowa wiwelela yaaheliwa mookhwaani. Muthukumano w'oNicea, mahiku muloko ni mathanu a ekhotto y'oyeehi ephome, okathi maprofeta eekeekhai a Muluku, okathi awo yeemelenly'aya osulu iwe mmwe...

<sup>168</sup> Ekereja Katolika, vano eyo yaaroopacerya toko, vano, hiyo othene noosuwela eyo, miyo kihixuttiha vaava. Moota, vekeekhai, Akila ni Prisila aari pastore, Akila aari pastore a—a ekereja y'oRooma. Okathi Erooho Yoowaarya yaakhurunwe—aya oPentekositeni, Eyo yaakhuruwenle aYuta a wakhula elapo vathi v'erimu. Masi mahiku vakhani nuumala yeeyo, Petru aahikhala yoovoona vataratoni, wira orowe owannyawee Kornelio, muRooma, mulopwana mmosa naxariya, nto owo khuvekela vano Erooho Yoowaarya khimukhuruwela. Nuuvira okathi vakhani atthu oottittimiheya khupacerya waakhela Yeeyo. Akila ni Prisila khurowasa o—oRooma vano awo khutthokihwa, ahiiso, khanaththokihaseke, masi okhaliha orattene ekereja yoopacerya y'oRooma. Nto, awo vairanse-aya, awo yaahikhalanasa a—axinn'aya alopwana n'athiyana.

<sup>169</sup> Ni Klawutiyu, moomwene awe, aahiwoomola aYuta othene oRooma. Nto owo p'ukathi ene yoowo ekereja Katolika y'oRooma yaahimmye-aya wira Petru aari oRooma. Mukoonihe Yoolempwa emosa vaavo Petru otonko awe okhala oRooma, wala khula wahala onihimya wira owo aahikhala. Owo khaakhanle, voothariha Masu a Muluku, ni Ti yeeyo kinaamini

aka. Ni vaaweryaneya sayi Petru, muYuta, ovilela okokhorela w'ethiru ni itthu awo arinaaya, so waakokhorela a muluku eethiru ni itthu? Vaavo...Munnona? Owo aarowa orowa sayi avirikanyaka mwiixuttiho awe yoowo va? Ethiru. Voohivikana ele akhanlyaaya aPrustante nave. Mulipelele, ninoophiyerya yeeyo nuuvira okathi vakhani, oholo, Apwiya yaththuna vale. Nwehe. Nwehe vano, hiyo ninnoona wira okathi ene yoowo ekereja enihimy'aya wira Petru aari oRooma, wahala onihimyra wira Klawutiyu (ni Bibilia oohimyra) aahiruma wira aYuta othene ekhume oRooma.

<sup>170</sup> Nto Paulo aahivira wEfeso khurwa mpakha muttetthe w'osulu iwe, owo khwaaphwanya awiixutti ala, nto owo aahikhala weiwe omuxekuryaka Akila ni Prisila. Nuumala orowasa, nto axinna a oRooma ekereja ela khupacerya okhaliha miyuupuwelo saya axineene, vano awo khwaacererya okokhorela w'ethiru. Vano nto Kostantino, yoowo ame awe yaari muKristu eekeekhai ni yaaroromela wira mmiravo aya aamukhala, masi owo aari mulipa a poliiitika. Ni owo aahoona wira epantte yoowaatta ya Rooma, wala epantte yuulupale ya weiwo, y'atthu oohaawa, yaahaakhela woopowa mwa Kristu. Vano nto awo yaahipacerya okhala oosuweliwa, okhala wira yaamukuruxa Veenusi ni onwelihha Maria, ni omukuruxa Yupitere ni onwelihha Petru, n'akina siiso n'a—n'awiixutti, nto eyo yaari etiini yoosuweliwa saana. Ni awo yaari oominyala. Awo, aKristu ale yaamukhwa!

<sup>171</sup> Nto ekereja Katolika khwira, "Hiyo naari epacerelo." Eyo ekeekhaii voolikana, ekereja Katolika epacenrye Nihiku na Pentekosite. Masi ela t'ile ekumihale: eyo erimwiiththokiha ni khukeliha (mwa Masu) makano. Nto nikano nookiserya, nyuwo atthu oovikana miyaakha muloko munooowerya wuupuwela nikano nookiserya: owela wa Maria, miyaakha soophiyaka muloko sivinre. Nikano nikina naacereriwe mukereja. Ohiya Yoolempwa, nlo nikano! Nto awo animoosuwelihani naanaano va, awo "khancala ele Yoolempwa enihimy'aya, t'ile ekereja enihimy'aya."

Awo, namukuttho ole aahikileela, khwira, "Muluku ori mukereja mw'Awe."

Miyo khwira, "Muluku ori Mmasuniwe mwAwe."

<sup>172</sup> Owo khwira, "Ahe, Bibilia owo wahala paahi a ekereja Katolika yoopacerya."

<sup>173</sup> Miyo khwira, "Vano miyo ka muKatolika oopacerya." Miyo khwira, "Eyo ennikikhaliha muKatolika woovikanani nyuwo, mukhanle phaatiri." Munnona? Miyo khwira, "Yaari yeeyo, weeso miyo ka yoowo." Miyo khwira, "Moone, miyo kinaamini v'eekekhai eththu arummwa yiixuttih'aya. Nyuwo munaamini eththu mutthu okelinh'awe-mo." Nto eyo vekekhai t'inamuna

eyo yiireiye-aya. Tthiri, ti yaaryaaya. Yaari yeeyo, vekeekhai enamuna yeeyo.

<sup>174</sup> Vano nwehe, wahala, nto awo khupacerya waacererya makano, nikano, nto okathi Paulo oruuly'awe, hiyo noosuwela, voomutthariha wahala, wira owo hata khaaxekunrye ekereja ele yoopacerya, okhala wira owo khaakhanle ovilelaka okokhorela w'ethiru. Ni owo aaxeckunrye ekereja ya neenli yeeyo awo yaakkhalihalyaaya, ekereja ya neenli ya oRooma.

<sup>175</sup> Nto orwiiyaaya Muthukuman'ole wa oNicea, weiwo Kostantino oonalyaawe akhili wo wiiraaniha omwene awe. Etthu ene emosaru Akhabi iiraly'awe ni Yesapeli, athelaka iwe. Munnona? Nto voonalalyaawe okathi wo owiiraaniha atthu awe ni opaka elapo yuulupale yoowerya wa yeeyo, owo uupuwela wira awo yaamphwanya etiini aya, tivo owo aakhalinhe-awe awo etiini ya ekereja ni estaatu. Nto okathi awo yaarinaaya Muthukuman'ole w'oNicea, nto sookoha iya khukhumela sinto aari Muluku mmosa, wala araru; sinto yaahaana opatisa ni Nsina na Yesu Kristu, wala Tithi, Mwaana ni Erooho Yoowaarya; sookoha iya sothene sikina khuruuha e-eyooniheryo vale. Nto, vairaly'aya siiso, amosa-amosa wa maprefeta ale a khalayi yaarwiye vale ni hat'etthu woohikhala esapala ya epwittipwitthi yiivitikelenle-ene, elyaaka malaxi. Khweli! Masi atthu ale aalupale oottittimiheya yaahiikeliha mukereja, khwaamaaliha ni akhili a molumwenkuni. Masi awo yaahikhalaana SIISO ANIHIMYA T'APWIYA. Eyo khukela mw'epiphini w'epakawu mwa miyaakha soophiyaka ekonto emosa.

<sup>176</sup> Masi eyo khuphuwa-tho, wira ethapuluwe. Ti yeeyo. Khamukhanle wiiva Eyo. "Miyo kinoohokoloxa, anihimya t'Apwiya, miyaakha sothene itthu iya silyiye-aya."

<sup>177</sup> Miromolelo iyo saacerenrye nikano. Nto wira yeela, waacererya nikano, enamuna emosa paahi ekereja, enamuna emosa paahi vanweryaney'aya khula muromolelo wiihuluxa Masu a Muluku, onkhala waacererya nikano ohiya Soolempwa sooreerihiwa, onkhala weererya okhaliha ilimalelo sanyu wala mwiixuttiho wa ekerej'anyu, onaamwi oryeene woovirikana ni Soolempwa. Vano munwerya sayi wuulumela ekereja Katolika, nyuwo mwiraka ethu emosaru awo yiiralyaaya? Munniwa saana? Vaareera. Okathi, vano muupuwele paahi, Soolempwa khasikhanle ovonyaka! Makano woothaa, opacerya wene. Nto okathi munikupalyaanyu muromolelo, muhaakhela nikano, okhala wira eyo ethu yaacereriwe. Eyo khekhanle mwa Soolempwa. Eyo khekhanle mwa Soolempwa.

<sup>178</sup> Khiivo etthu ene eyo ntoko mutthenkeso. Yesu khonahimyeke wira, "Miyo kinoorumanzi orowa mulaponi mothene, mwapake mutthenkeso." Nnari, mulopwana, khiivo etthu iyo! Wira yeela, onkhala okhootta Soolempwa

sooreerihwa. Okathi ela yiiriw'aya, yaahirukunxiwa "Ekereja mwaha wo oyariwa" khukhala "ekereja mwaha wa makano ni iyaaminelo." Kahi *ekereja*, mukithuniherye oveka muswammaha; elooca! Nyuwo muniyariwa Mukereja, masi muniitakanxa mulooca. Kahi ekereja Patista, ekereja Metotista, ekereja ya Pentekosite. Eyo elooca Patista, elooca ya Pentekosite, ni elooca Metotista, nyuwo munniitakanxa. Khamukhanle wiitakanxa Mukereja. Khiivo ethu ene eyo. Nyuwo muniyariwa Mwemmo. Nikotemu aahileeliwa yeeyo. Vano nyuwo munnoona vatthu vary'anuy? Oh, wulu!

<sup>179</sup> Mwaha wa yeeyo miyo kiry'aka oovirikanya eyo. Kahi nthowa n'athu mwemmo; miyo kinvirikanya eyeettiheryo. Okhala wira awo khanwerya... Mmosa wa ahumu awo wala ethu ekina, emosa wa ikereja iyo yalaleya ethu eri mBibiliani ekhanle yoovirikana ni mwiiuttihoo owo, yoorumma ele awo arinaaya mukereja mmo, owo onimoomoliwa siiso. Ayo, mulopwana. Amosa-amosa a yaawo oophweeliha saana hata ahinrowaaya ohiya muhakalaliho orwa ekereja ekina vahikhanle wira ti mmosa w'atthu aya. Vano, awo t'o...

<sup>180</sup> Mutthu mmosa emaara emosa aarowa onvaha mulaleyi... Wenne nno elapo yeela, mulaleyi mmosa mwaamukhaani eemenle nno mphironi, okhuwelelaka ni oxonttelaka orukunxa murima, ni airaka, "Murwe, mmwaakhele Kristu, musarihiwe Erooho Yoowaarya," n'itthu siiso. Nto mutthu a mutthenkeso wa Pentekosite khurwa khunvaha etoolare emosa mulopwan'owo mmatatani mwawe, ni aahaana olapa okhala wira owo aarooraruwela ekereja awe. Waalavulaka aKatalika! Ti yeeyo. Ni nyuwo moosuwela ethu enihimyaaka, nave; wala ekerej'ela eniiraaya, khula enamuna. Vaareera.

<sup>181</sup> Wira yeela, okhootta Soolempwa, okathi ela eniiriwaaya, enoorukunxiwa nto okathi munaacereryaanyu nikano ni wiitakanxa ni mutthenkeso, nyuwo mookupali nikano nanyu noopacerya vaavo vene, okhala wira kehiyo Yoolempwa, vano ethu yaacereriwe. Ni nikano ethu yaacereriwe, "okuxa nipuro na," ninkuxa nipuro na oyariwa. Mwaakupaliki muromolelo, muhaacererya nikano. Vaareera. Okathi eniiriwaaya yeela, vano enoorukunxiwa okhuma "Ekereja mwaha wo oyariwa" khukhala "elooca ni nikano wala eyaaminelo." Maana, moone, nlo nikano nneene, mwaha woohikhala Yoolempwa.

<sup>182</sup> Vano, Yesu khonahimyek wira, "Murowe mulaponi mothene mwapake miromolelo, murowe mwaathukumanye atthu vamosa." Owo ohimmye wira, "Murowe mwaakhalihe awiixutti." Munnaamini? [Muthukumano oniira "Amen."—Mol.] Amen. Tivo, moone, nyuwo muri ota voomalela.

<sup>183</sup> Nwiriyane, nwehe va. Nrowe nimalihe mwa ethu ekina va, nikhomakele ethu okathi ene yoola. Akavi arina eleeksiko y'eKreku, *Emphatic Diaglott* ya elepeloy khalayi,

Ekreku? Vaareera. Musome, mumphwanye khula musomi mummutthun'anyu. Murowe mulooca mwa iliivuru mphwanye eleeksiko, eleeksiko y'Ekreku. Musome Wiisuupulula 17, nto mwasoma vo, Etaphulelo ya King James va enihimya wira, nto ela, "Nlo naahikikuxa Muroohoni; nto kaahimoona muthiyana aakilanthe vasulu va nxeni naawanrye sooxeerya, oosareya ma—masina a oveeha." Vano, ti yeeyo King James ohimmy'awe. Masi otaphuleliwa woopacerya ohimmye wira:

...naahikikuxa      muroohoni...nto      kaahimoona  
muthiyana...oosareya masina ooveeha,...

<sup>184</sup> Wookhala ovirikana vanci-ene wa "masina a oveeha" ni "masina ooveeha." Vano nwehe. Hiyo othene ninnisuwela ni noosuwela wira ele yaari ekereja y'oRooma ekilaanthe vasulu va miyaako mithanu na miili, yeettiheraka owerya wa molumwenkuni. Vano owo iihaniwa "namuttompe," ni owo aari "mai a anamararuwa." Exeeni? Exeeni namararuwa? Vaamuweryaneya okhala mulopwana? Ohaana okhala muthiyana. Tivo vakhala wira owo muthiyana, ehaana okhala ekereja; owo aari mai a anamararuwa, siiso ntoko owo saary'awe. Nto nkawehani, nwehe, "Mwa yoowo!" Ekele. "Mwa yoowo yaahikhala masina ooveeha." Exeeni iyo? Vano, arumeyi va mufitani, nrowe nimaale. Exeeni masina awo ooveeha? Metotista, Patista, Prespiteriyaano, Luterano, aPentekosite, makina. Masina ooveeha, okhala wira iyo mitthenkeso, enamuttompe wa Muluku, siiso ntoko owo saary'awe.

<sup>185</sup> Nto awo, muhina mwa makhuru awo, atthu aniira, "Vano, owo Mmetotista, ni wira *ela*. Owo muPentekosite, ni oniira *ela*. Owo ti muPrespiteriyaano, ni oniira *ela*." Awo anniira sothene mukalentaariyuni, nyuwo moosuwela eyo. Nto exeeeni iyo? Awo masina yaatthunyea okhala ntoko Kristu ni wiihaniwa ni nsina na muKristu, nto masina ooveeha! Iyo khasihiyo ikereja. Voowoothererya iyo siniihaniwa "ekereja." Iyo ilooca! Vano munnoona mwaha wa xeeni miyo okhanlyaaka oovirikanya mutthenkeso? Kahi atthu, eyeettihelo ya mutthenkeso, moone, nsina, masina ooveeha (nwehe) a ilooca, siniihaniwa ikereja voowoothererya. Ekereja Metotista, ekereja Patista, ekereja Prespiteriyaano, ekereja ya Pentekosite, ekereja Luteraana, Ekereja y'Axinna Oowiwanana, khekhanle ethu ene eyo. Eyo ti yoohilempwa.

<sup>186</sup> Eri Ekereja emosa paahi, ni khamukhanle wiitakanxa Yeeyo. Nyuwo munooiyariwa-Mo. Nyuwo munoothomeliwa wa Yeeyo. Erutthu ya ethiru ya Yesu Kristu...Erutthu ya siiri, kiireke, ya Yesu Kristu elapo ya vathi va, ni Masu yooniheriwaka. Aana alopwana n'athiyana a Muluku, awo khaniira mpantte wa hata emosa. "Mukhume eriyari aya," Owo oohimya. Ayo.

<sup>187</sup> Nwehe, naakuvaka vano. Miyo nkintthuna owooceihani, masi mwakivahru minuuutu vakhani paahi vano, kinoorowa

kaakuvaka ntoko sinwery'aka, masi kintthuna wira mukupali wira munimwiiwa saana, wira muhihalele. Munnona?

<sup>188</sup> Muupuwele, mai Rooma, yaahiphwanyiwa mwa yoowo, oosareya masina ooveeha, mai a anamararuwa. Vano, vakhala wira awo t'anamararuwa, exeeni namararuwa? Namuttompe exeenii? Etthu emosaru ntoko namararuwa. Owo muthiyana onikhala voohirromeleya ni natiri awe a moothelanani. Ni khula ekereja enihimya okhala Ekereja ya Kristu, ni okhootta Masu a Muluku, eyo enikhala voohirromeleya ni natiri aya a moothelanani! Vano eyo enooraruwa mwaha wo waacererya nikano, onamuttompe ni olumwenku ni osuwela waya, ohiya omukupali Kristu ni owerya w'ohihimuwa Wawe ni Erooho Yoowaarya. Ni owo ti mai a anamararuwa iirale etthu emosaru. Mwaapu khoniihana epirkha "yoouna," moosuwela; moone, thanu na mosa ya emosa, ni etuusiya nuusus ya ekina. Athtu kamosa-kamosa ala animweetta paahi yaatheyaka aKatolika, ni yiiraka mpantte w'etthu emosaru yaawo ene. Owo aari mai a opatiiso woowootha mmaasini. Owo ti mai a eyooniheryo yoowootha ya Erooho Yoowaarya, ni nyuwo munoomutthara paahi. Vano nrowe noone.

<sup>189</sup> "Eyo ekeekhaii, Munna Branham?" Mukhale oomaala okathi vakhani paahi.

<sup>190</sup> Moone, owo ti mai a masina ooveeha, a illooca athtu anitakanxaaya, ni oruuha oveehiwa, okhala khula enamuna, waawara akaputtula, athiyana ni maihi oometthiwa, oowiipintari, anipa mukoraaleni, anaavura asikaro, anaakhela ekomunyawu, inamuna sothene sa itthu soonanara sa molumwenkuni, nto nlo nluku nookwattula wa ole oohaamini. Timoteyo khohimmye yeeyo, Erooho Yoowaarya? Nwehe. Moone, owo, Rooma, ti maama a khula mmosa wa seiyo. Munnona? Nyuwo vekeekhai mwiirale mmutthenkesoni mwanyu siiso ntoko owo siiraly'awe, okeliha makano ohiya Masu, okhala wira nikhuru n'athhu arookhalifa, mahumu ni mapixipu n'akina khwira wira yaahaana okhala *siisa*, nto ti yeeyo vekeekhai yaairaneiye oRooma. Nto nyuwo mweehererye o, munn'aka pastore, okupali Masu a Muluku othene, nto, nwehe otthu onrow'anyu, ota wa mukhora! Vano ninrowa woona sinto Muluku ohaaleela wira yiire, wala nnari, muhina mwa minuutu vakhani. Munnona? Vaareera.

<sup>191</sup> Moone, owo ti maama a khula emosa, okhala wira owo t'opacenrye okumiha ilepelivo sa Soolempwa ni waacererya nikano, okhala wira owo ohaakhotta maprofeta oottikittheliwa yaarina makhalelo oolipheriwa, ni Masu. Mwaha w'osuwela waya, mutthu mulavilavi, Mamwene aRooma, ni sikina, yaakupanli oKristu, masi antthuna...okupali mwa enamuna aya yaawo. Munnona? Ti yeeyo. Awo antthuna eyo mwa enamuna aya.

<sup>192</sup> Nahama aatthuna wiihuluxa maretta awe mmaasini a elapo awe, owo khiyaamusivela maasi a marove a Yordani. Masi vakhala wira owo aahinto wiihuluxa maretta awe, owo aahaana orowa iwe mmaroveni mmwe siiso ntoko profeta saamuhimenry'awe. Moone, Muluku khommuthanla mutthu.

<sup>193</sup> Nwehe, owo aari muromolelo woopacerya. Nkaaweheni an'awe axithiyana, yaahiira ethu emosaru, khwaacererya iyaaminelo ni makano ohiya Masu. Muhikileele; mukoonihe emosa ehikhumme wa Yaawo. Mukoonihe pastore mmosa onrowa okupali Ekeekhai, awo ahinrowaaya owoomolani mwaha wa yeeyo, vahikanle wira munokhala oosuweliwa wira, moosuwela, awo ahaana woovarelelani mwaha wo osuweliwa wanyu wala ethu. Vaareera.

<sup>194</sup> Vano nkawehani Wiisuupulula 18, minuutu vakhani paahi, eversiikulu enttharelana, ekapiitulu enttharelana, vaamanlyaaawe Wiisuupulula 17 waavyavya ni—oonihalyaaawe mwiiriirya wa Muhanoo Papiloonya ola. Kapiitulu 17 ya Wiisuupulula onnileeliherya wira eyo ekereja ekilaantthe vasulu va miyaako mithanu na miili, Muttetthe wa oVatikano, eyo enaaruma mamwene othene a mulaponi (eyo vekeekhai t'ile eri yoolikana), ni Makhulupale nave, n'akina. Uh-huh. Tivo, masi eyo eri iwe, evarelaka muhakhu wa molumwenkumi mmatatani mwaya. Eyo ekeekhaii. “T'ani onwerya owana ekhottu n'uwo?” Ti yeeyo. Hiyo othene noosuwela eyo. Masi xeeni mwaarowaanyu wira mpantte ni ethu ephitaanne n'uwo? Vano nwehe kapiitulu 18, ekapiitulu enttharelana mwiiriirya awe vammalaaya oleelikeriwa. “Onikilaathi mpaani mwa Muluku.” Vano, nno, nihiku nlo...

<sup>195</sup> Zella Braitman, muri vaava ohiy'ula, Zella? Owo ooruuhu, eri mpaani mmwe naanaano, *Muletto Ahu a Ttiminku*, epaphelo ya ihapari y'eKatolika. Nto epaphelo y'eKatolika yaamwaakhula murumeyi mmosa. Khwira, “Muhimmye, reverendu, wira e... Mwa mammeru a oRooma oVatikano, ahiiso veehiceni va Paapa, elempwe, ‘Vicarivs Filii Dei,’ yeeyo enihimya, wira eyo,” mutiyoseese eeKatolika mme, “wira nle nu—nummbero na nxeni na Wiisuupulula?”

<sup>196</sup> “Vano,” owo khwira, “vekeekhai, ti siiso. Vekeekhai ti siiso, nintaphuleliwa imiya thanu na mosa ni miloko mithanu na mosa ni thanu na mosa. Vekeekhai ti yeeyo.” Nto tiyoseese a oRooma onnikupali, wira ti yeeyo. Masi va eri yoowaakhula aya, oocencera, oosareya osuwela, khwira, “Masi, moosuwela, nsina nanyu mwa nttaava khata pooti otaphulela ethu emosaru.”

<sup>197</sup> Mulopwan’ola khwira, “Nawaka, ntoko ethu emosaru mwa nttaava nimosa.” Owo khutaphulela. Khwira, “Moone, kiri ntoko imiya thanu na mosa ni miloko mithanu na mosa ni thanu na mosa, nave.” Khwira, “Annikhala imiya sene a yaawo.” Khwira, “Khula okathi ethu enkhumelelaaya, ookhala mutthu

onkhalana imiya thanu na mosa ni miloko mithanu na mosa ni thanu na mosa.” Nto khwira, “Reverendu, mwaahisuwela wira mwa nttaava nimosa nsina nanyu pooti ohimyaka nwanani a Kristu?” Khwira, “Muniweherya-ni itthu iyo?” Nkawehani osuwela.

<sup>198</sup> Masi Erooho Yoowaarya ennisuwela oratta-ene. Nwehe. Siiso eyo ekhalaka, nsina naka pooti otaphuleleya imiya thanu na mosa ni miloko mithanu na mosa ni thanu na mosa, masi nkimmaliherya sootthuneya sikina. Miyo nkinkilaathi vasulu va mwaako. Nkinihimya itthu *iya*. Miyo nkikihiyo kuvernatooro, moone. Ti yeeyo. Owo t'ule Owo onimuhimyaawe. Vano osuwela wanyu wa molumwenkuni kah'itthu, mulopwana, ti yeeyo, Ohoolo wa Erooho Yoowaarya. Miyo nkimmaliherya sikina saya, masi owo onnimaliherya. “Onikilaathi mpaani mwa Muluku, aisonnihaka wira owo Mulukuu, ni onikilaathi vasulu va miyaako mithanu na miili.” Nkinkilaathi vasulu va miyaako mithanu na miili, vakhala wira entaphulela imiya thanu na mosa ni miloko mithanu na mosa ni thanu na mosa. Miyo nkimmaliherya iye sikina, masi owo onnimaliherya. Moone, eyo eri vo. Munnona? Tivo mulipane Erooho Yoowaarya paahi, “Muhivelavele etthu enrow'anyu ohimya, okhala wira khamuhayo nyuwo munrowa olavula; t'Atithi.”

<sup>199</sup> Vano vanweryaneya sayi osuwela wanyu ni Oyariwa wanyu vasya okhuma Osulu ophiyerya olikana ni itthu iya mulaponi mu, ala—anamaxinta ala oowerya mwa yeeyo? Vano, awo annisuwela khula ewokelo ni nlootho. Aawerya sayi Moise weemela okathi owo waatthanre-awe Sooruma sa Muluku, wira omurihele ttootto awe vathi khuthatuwa enowa, nto va khurwa anamaxinta khwiira ethtu emosaru? Masi Moise aari oomaala, osuwelaka wira aahitthariha Masu a Muluku, nto enowa awe yaahikhura iye sikina. Munnona? Vano nyuwo mwaiwelelaru ni khukhalana... Exeeni aakhanlyaaawe wiiraka okathi waaweeettihenrye-we muttetthe wa natiri, ni yaahikhala Ephareya Yooxeerya yaakuttelelaka, masi ephiro ya Muluku yaahivira mwa yeeyo. Amen. Khwira, “Mmaale, moone Ovuwa wa Muluku!”

<sup>200</sup> Yakhalaru eththarihaka muteko, wo otthara Masu, mukhale vaavo nwehe ethhukuwaka. Amen. Miyo kirina iyaakha miloko mithanu ni ttharu, kinnimurumeela Yoowo iyaakha sophiyaka miloko miraru ni ttharu, kaaniththuna kirine-ene iyaakha imilyau muloko wira kimurumeele Yoowo. Miyo nkinatoko omoona Owo ovonya nlelo, Masu Awe yaasukiwaka. Ti yeeyo.

<sup>201</sup> Vano nkawehani, naanaanoru vatthenke-awe, isiiri sawe saahisuweliwa. Ninnikhalanaka eyo okhuma khalayi, hiyo noosuwela.

<sup>202</sup> Vano ekapiitulu entharelana, nkawehani Wiisuupulula 18. Mukitthuniherye paahi kikhunle minuutu mmosa paahi.

Pooti okhala etthu yooreera, khenrowa onikuxa masi minuutu vakhani paahi tho, ni pooti woohimeeryani etthu yaamukhaani. Kinroromela wira enimwiira.

<sup>203</sup> Vano nинноона va, kapiitulu 17, versiikulu 5:

...vayuuci vawe naahilempwa-vo nsina,  
MWIIIRIIRYA, PAPILOONIYA MUULUPALE, MAI A  
ANAMARARUWA, A SOONANARA S'ELAPO.

Ni nwehe.

*Ni kaahoona wira muthiyan'owo* (ekereja) aahihapaliwa ephome y'atthu ooreera murima, ni ephome y'anamoona a Yesu:...vamoonale-aka, *kaahitikinihiwa kixanka vanci-ene.*

<sup>204</sup> Moone, omoona, owo aari etthu yuulupale yooreera. Ni owo aari mai a anamittompe, etiini namittompe, miromolelo, vekeekhai etthu owo iiraly'awe, moone, okhala wira awo yaakeliha-mo makano siiso ntoko owo siiralyaaawe. Vano nkawehani, nkawehani Wiisuupulula vano, eyo ekapiitulu 17, enimalela ni eversikulu 18. Vano nwehe.

...nuumala itthu iya (nuumala mwiiriirya awe osuwelihiwa), nuumala itthu iya kaahoona nlaikha nikina nikhuruwaka wirimu, naarino owerya uuulupale;...

<sup>205</sup> Vano, va onoorwa namitthaka mukina okhuruwaka, ekapiitulu enttharelana, mwiiriirya awe waahisuwelihia. Vano, nno vano osuwelihiwa wa mwiiriirya awe ni mwiiriirya w'ana awe. Moone, hiyo ninnisuwela vano oratta-ene exeeeni emukhalinhe namararuwa: okhala wira owo orooraruwa voovirikanya Masu a Muluku. Nto ti yeeyo emukhalinhe mutthenkeso. Owo khaakhanle okhalaka ekereja ya Bibilia ni okupali iyo. Ni khonwerya hata mutthenkeso ohinkuxa Masu othene a Yaawo (ntoko Awo silempwaly'aya) okhalakhala okhalaka ekereja ya Bibilia. Ni khuovo hata mmosa wa seiyo siiso, miyo ensuwel'aka etthu, nnakhala mmosa. Tivo vale, moone, owo omalakaru wiithokiha, etthu oiralyaaawe, (mwa Soolempwa ni mwa ekeekhayi) owo onookhwa vaavale, owo onkupali nikano. Vano nkawehani, vano eyo t'ile yaakhumelenle.

<sup>206</sup> Muluku aahiveleeliha, kapiitulu 18, nlaikha na ikuru, nuumala mwiiriirya owo osuweliwa, nlaikha na ikuru, ahiiso, namitthaka. Nkawehani va.

...nuumala itthu iya kaahoona nlaikha nikina nikhuruwaka wirimu, ni owerya uuulupale; nto elapo yaamwaleeliwa ni nttittimihonaya.

*Nlo naahikhuwela...ni nsu noowiituperya,...  
Papilooniya (evitikavitika) muulupale oomora,...  
ni oothatuwa opuro onkhala axetwani,...nikhuku*

*na irooho sothene sootakhala, ni ntthyawelo na othene ooreerela ni onnyokha...axipalame a mwiikho oohiirya.*

*Ni maloko othene aawurya eviinyu ya oviruwa ya oraruwa wawe, ni mamwene a mulaponi...aarraruwa ni yoowo, nave alipa a nakoso a mulaponi aathaaciri epweteyelo awe yoowaatta.*

<sup>207</sup> Nkawehani, naanaanoru vamanlyaaaya osuwelihiwa mwiiriirya awe, ole aaryaawe, ethu owo aary'awe, ale yaari an'awe axithiyana, mwiriirya woosuweliwa, vano Muluku aaveleelinhe nlaikha, namithaka wira (exeeni?) wiitthanelota, "Mukhume!" Mutthaka w'okathi!

*... Mukhume eriyari aya, atthu aka, wira muhaataane ihasara sawe...*

Owo onoorowa omutakhalih. Nwehe.

<sup>208</sup> Mukhume wa yoowo! Muluku oveleelinhe nlaikha noowerya, ahiso, namithaka. Ni Waarya wawe kхиwaari vanloothoni, Owo waamwaareenle mulaponi mothene. Mukhume mwa yoowo! Exeeni? Owo, n'axinn'awe athiyana, nave. Wira omwaleele elapo ya vathi, ni owiihane atthu Awe okhuma-mo. Vano, nyuwo moosuwela wira eyo Ekeekhai. Namithaka aaveleelihive okhuma Wirimu, wira owiihanele atthu a Muluku ota wa oPapiloonya. Ni Waarya wawe waahimwaleela elapo, Erooho Yoowaarya yuulupale.

<sup>209</sup> Nwehe, Bibilia ohimmye wira, "Owo ntthyawelo, ni ohaavara axipalame, oohiirya a mwiikho." Kahi axawawe, vano, nnari, nnari, nnari. Amarepo, "axipalame a mwiikho, oohiirya," ti yeeyo owo onvaraawe varyaawe. Owo ntthyawelo noosareya yaawo, ekayela yothene yoosarya. Ni exeeni? "Masina ooiveeha," voovirikana ni Soolempwa. Timoteyo Aneili 3 ohimmye wira, Erooho Yoowaarya elavulaka, "Mahiku ookiserya awo anoohiya Waamini ni animwiiwelela irooho soowoototha." Owo nave-tho ohimmye wira, Erooho Yoowaarya yoolavula: "Wira mahiku ookiserya awo yaarowa okhala oothipelela, owiisoona." Oonyokha: "Attottopeliwe Muluku, nyuwo muniira mpantte wa hiyo, wala nyuwo khamurina nsina nanyu muliivuruni mwahu, moopweteya." Hmm. Oohiirya! A mwiikho! Hmm. Miyo kinroromela wira nkinsikulih, miyo kinroromela wira kiniira yooreera. Axipalame oohiirya, a mwiikho, owo aaniwaakhelela.

<sup>210</sup> Muupuwele, Muluku Xawawe. Owo Mwaneene ohiisihana Xawawe. Ni Owo aamwiihanne Yakope xawawe. Ni hiyo n'a axawawe Awe axikhaani. Amen. Owo oowiihana maprefeta Awe "axawawe." Nto nlaikha nla nirwiise wira noonelihe ni wiihanelota.

<sup>211</sup> Ntoko mutthaka aka mwaamukhaani wa *Xawawe Ontannya Epuru Awe*. Xawawe ole mwaamukhaani aamuttharelela

mwalyakhu ule mweehilini okathi wothene, arettehaka, masi khaawerya olya itthu iye aarinaawe, s'epatthani, ni athiyana oowiipintari wiitho, maihi oometthiwa, ni akaputtula. Owo khaawerya wira yeeyo. Masi khaasuwela hat'ethu ekina woohikhala oretteha wa mwalyakhu ule muulupale. Masi nihiku nimosa maama xawawe khumphwanya. Owo aahikhuwela, amwiihanaka wira okhume, khwira, "Mwan'aka, nyuwo khamuhiyo mmosa a yaawo. Khumanu wa yoowo!"

Khwira, "Maama, kiireke exeeni?"

<sup>212</sup> Khwira, "Mmane mapupha anyu mpacerye." Otupha woopacerya, owo aamanne nipotto, eriyari ene ya mutthenkeso. Khwira, "Mwan'aka, muhaana orwa osulu ovikana eyo ahiiso nkinwerya woovaranu. Kihaana okumiha inawo sanyu vatthayani." Owo onrowa omukuxa moovavani. Owo khusuwela wira aaniwerya ovava. Owo aarimoorwa omwiihanela ota. Ti yeeyo.

<sup>213</sup> Masi Maama ola Papiloonya owo aahiivarela nikhuru n'alyakhu, alyakhu axikhaani oothererya, oowiipintari, maihi oometthiwa, aniisihana "aKristu." Owo aahikhalaana ekayela oosareya yaawo. Nyuwo alaleyi muneemela vapulputu ni waahiya athiyana awo okhuma ni yeeyo, wuuliha muru, wira mukhalihе muromolelo anyu woowaatta. Muluku onimoovekelani eyo mmatatani mwanyu. Mukhume mwa yeeyo! "Ipwittipwitthi Saka sinniwa Nsu Naka." Ntthyawelo n'ale ootakhala, oothipelela, owiisoona, oosiveliwa itthu sa vathi ohiya osiveliwa ni Muluku, yaarowa othanla okhala ntoko olumwenku ohikhanle okhala ntoko Kristu. Nyuwo mwaamoonaka muthiyana oisoottihale-ene itthu soowaatta, eyo ennooniherya wira owo t'ohikhala'ethu muhina. Owo t'wootohererya muhina. Eyo ekekhaii voolekana. Muthiyana a... Miyo kaahimoona mmosa nihiku nikina, ni maihi ooripelela, ti yeeyo, ni etthu ile yothene yooripelela mmwe mmaithoni mwaya.

<sup>214</sup> Vano, nyuwo mwa—mwa—mwahaarina hata maihi, ni—ni munathuna owara maihi, yaamukhala saana, masi, nware ale ankhala ntoko mutthu. Ni nyuwo mwahaarina hata makwarikhwa, nto—nto munathuna okhalana makwarikhwa, muhiphwanye ale ntoko fixawu ootteela, mphwanye—mphwanye makwarikhwa eekekhai. Mwaahikhalaane hata emosa wa itthu iya, vaareera. Mwahikhalaane hata niino, mphwanye mwapakeliwa vale, mukuxe. Masi muhikhule maino anyu nvahiwanyu ni Muluku mwaha wo wira aroothetemana vakhani, ni maino ooreera, wira mphavele makina. Muhipintari maihi anyu, wala etthu, ni okhala ntoko etthu ekhumme vamaroveni nipuro nlo. Muhi... Mwaahikhalaane nthepa, ni munathuna wiikhaliha ntoko wira mookhalana nthepa vakhani, vaareera, kinnithokelela. Masi muhiikhalihe oolikana ni Yesapeli, ntoko muruttu nipuro nlo onipintariwa.

<sup>215</sup> Ni nyuwo axinna aPentekosite, munaahiya athiyana awo omettha maihi aya, Bibilia ohimmye-ene wira nlo ntittimihi nawe! Ni ti yoohilimaleuya hata owo olompa ni maihi awe siiso. Nave nnakhala vo khunamuhiya orwa vapulpitu n'ulaleya Ehapari yooreera, wiipa mukoraaleni, oxuttih exikola ya Ttiminku. Wuuliha muru! Mwaahaana wuuliwa muru mmansinyu. Xeeni miyo ovirikanyaaka mutthenkeso? Nyuwo munuupuwela wira khaamukhalakhala kiweryaka okhaliherya ethtu siiso? Miyo koosuwela mwaha muniirelaanyu, munna. Nyuwo munnisuwela saana, masi mwaixuttiharu voovirikanya yeeyo, munoovalereriwa nipuro nuulupale, vano awo anooowoomolani. Avuwihiwe Muluku mwaha wo ominalya wanyu mwaira vale. Ti yeeyo. Muluku onimoottimihani.

<sup>216</sup> Nlaikha nla naahimmye exeneen? “Mukhume!” Ayo, mulopwana. Nlaikha nla naaruule mulaponi, nto nlo naarwiyye oruuha Waarya, nto nlo naahaariha Waarya mulaponi mothene. Nlo naari nlaikha na ikuru. Ni nlo naarwiyye olaleya Mutthaka wa “Mukhume oPapiloonya! Muhikwannye itthu sawe soonanara!”

<sup>217</sup> Ookhalana ekayela yothene yoosareya yaawo. Khwira, “Owo ntthyawelo n'axipalame othene oohiiry.” Ayo, owo orina ekayela oosareya yaawo vano, Mwaataano wa Ikereja sa Mulaponi mothene, ahiiso ilooca. Owo orina nikoto nothene oowaleliwa vano, awo othene anootakanxana. Owo ohiikhaliha ekayela, vaareera, oosareya axipalame oohiiry. Ti yeeyo. Mweehererye olavula ni mmosa aya emaara emosa, mweehererye paahi, mmiravo, oocencyra mwa akhili a mulaponi, masi ahinsuwela-tho sa Muluku onvikana namarokolo onsuwelaawe ixapattho sa nnakhetuni. Ti yeeyo. Paahi, ti yeeyo paahi, moone, sothene ansuwel'aya akhili kamosa-kamosa anweryaaya ohela *ela* ni wira *ele* muhina mmwe. Masi yaaphiyeryaka omusuwela Owo? Huh! Ayo, aavaririwa mukayelani mwawe ni makano awe. Ikereja prustante soapacerya yeeyo, sookhala an'awe axithiyana, ahiiriha yeela mwaha wo okhoottaka Masu a Muluku. Owo onikhooottaawe. Owo onikhoootta Masu. Nto nyuwo mwaakupaliki ethtu ekina ohiya Masu, yeenyu munikhoootta Yaawo. Nto nyuwo mwaaitakanxaka emosa wa seiyo, ni nyuwo mookhoootta Masu. Muluku khonootthunani siiso, khanivo nipuro na yeeyo mwa Yoolempwa.

<sup>218</sup> Nwehe, nla nlaikha na Waarya, muupuwela, nlaikha nookiserya, nlo nlaikha mokathi wa ekereja wa Lawotiseya. Owo namitthaka a Lawotiseya, wira, nlo ti nookiserya, okhala wira ekapiitulu enttharelana ti ekapitulu 19, okhanle Mwaakameliwa onoorwa. Nto ti yeela, mwa Yoolempwa, nlaikha nookiserya naarwenle oruuha Waarya ohinatthi orwa wa Mwaakameliwa wira orowe akumane ni Kristu. Waari Okathi wa Ekereja ya Lawotiseya, nto. Aaira exeneen namitthaka a Okathi wa Ekereja ya Lawotiseya? Owiihana okhuma oPapiloonya!

Nkawehani! Ikereja soovariwa mukayelani mw'awe ni yoowo, ni makano awe, okhoottaka Masu ni okupali makano. Nla nlaikha na Waarya wa ekereja ya Lawotiseya yaamukhontte Kristu ni Masu Awe, mwaha wa nikano, khunhela Owo ota. Nto Owo aari vamukhora, amanaka nsele, atthunaka ovolowa. [Munna Branham ommana vapulpitu—Mol.] Munnona? Okathi wa ekereja waahimukhotta Kristu, ni Kristu ti Masu, nto waahimukhotta Yaawo, nto Owo aari ota. Okathi mmosa paahi wa ekereja hiyo orinaahu wa Kristu ota, omanaka nsele, otthunaka ovolowa. [Munna Branham ommana vapulpitu.] Nto Mutthak'ola wa nlaikha, namitthaka aakhumme wa Muluku, aathikela arumihaka Mutthaka awe mulaponi, wira "Mukhume oPapiloonya! Mukhume mmithenkesoni!" Erooho Yoowaarya olelo, wiisooniherya wa Erooho Yoowaarya ti nlaikha nenlo niphavelaka waaruuhu atthu olipiheryaka makano, kхиivo ekumi mwa yaawo. Eyo ti Ekumi. Nwehe, Okathi wa Ekereja ya Lawotiseya yaahimukhotta, khimukhotta, ni awo yaamuhenle Owo ota.

<sup>219</sup> Nwehe, nlaikha nla ti namitthaka ookiserya ohinatthi orwa Kristu mukapiituluni 19 ya Wiisuupulula. Nsu na namitthaka ola! Nawehe vale, okathi ovahalyaawe Nsu nawe mulaponi, naahikhala Nsu naalavunle-tho Wirimu, eversiikulu 4, mwatthuna osoma, vaareera, eversiikulu 4, kapiitulu 19. Namitthaka ola mulaponi aari oolikanelwa Muluku mpakha, okathi olavunlyaaawe elapo ya vathi, Muluku aahitthikela ethhu emosaru Wirimu. Exeeni otaphuleliwa iwo wa versiikulu 4? Eyo enihimya exeeeni? Nsu na Muluku nilavulaka n'atthu Awe ootthommwa, niiraka, "Mukhume mwa yoowo!" Vekeekhai yeeyo naari Nsu! Owo ookhalana atthu mothene eyo muhina mmwe, oPapiloonya wothene. "Mukhume wa yoowo, wira muhaataane n'itampi sawe," ayo, mulopwana, ota wa makano awo ni iyaaminelo, mukele mwa Masu ookhalihwa Erooho ni Ekumi. Amen.

<sup>220</sup> Nwehe, ekapiitulu 19 ti yootharelana, "Nuumala itthu iya." Mooweha va ekapiitulu 19, "Nuumala itthu iya"? Nwehe exeeeni? Nuumala exeeeni? Nuumala Mutthaka wa "Mukhume mwa yoowo!" "Nuumala itthu iya," nwehe, "okhuwela wa atthu oowaarya a Mwaakameliwa, ni Mutheli, onrowa Woethelanami wa Mwaapwittipwitthi." Naattamenle sayi hiyo nto, munna? T'uvu okhanle wiihana wookiserya? "Mukhume oPapiloonya!"

<sup>221</sup> Vano, axinn'aka, mwaha wa yeeyo kikhanyaaka oovirikanya. Ti yoohilempwa. Ti yoohilikana. Ehooniheriwa okhala yoowootha. Muluku khokhanle mwa yeeyo, Owo khanakhaleke, Owo khonrowa okhalakhala okhalaka. Vano, nkinihimya wira khakhanle atthu mmithenkesoni iya, ti mwemmo ekereja epakiwaaya. Masi, mwaakhalakharu muhina mwa eyeettihelo eyo, nyuwo mwa epantte ya yeeyo.

<sup>222</sup> Kakhalaru oStadu Unidu, miyo ka mutthu a wAmerika. Vakhalaru wira ka nammuttettheni wala mutthu a Estadu Unidu ula, miyo ka epantte ya yoowo. Karowaru wAlemaanya n'ukhootta omempuru aka nno, ahiiso onammuttettheni, kinkuxa onammuttettheni wAlemaanya, nkihiyo-tho mutthu a wAmerika, miyo ka mutthu a wAlemaanya. Ni karowaru oJapawu, wala khula nipuro, Ruusiya, miyo kinkhala nammuttettheni iwe.

<sup>223</sup> Nto nyuwo mwaitakaniharu ni nammuttettheni... eyeettihelo, ni munakhala nammuttettheni a eyeettihelo yeeyo, munooniherya ele mukhanlyanya. Nto mahiku ala ookiserya, Muluku oniwiihana atthu okhuma mwa yeeyo. Bibilia ohimmye siiso, "Mukhume mwa yoowo, wira muhaataane n'awo, nto Miyo kinoowaakhelani. Muhikwannye ithru sawe soonanara, moone, nto Miyo kinoowaakhelani. Ni nyuwo munookhala aana alopwana n'athiyana wa Miyo, ni Miyo kinookhala Muluku wa nyuwo." Munnona?

<sup>224</sup> Mwaha wa yeeyo kinlavulaaka kipwapwelaka ekereja, e—elooca. Nkikhanle wihanaka ekereja. Eri Ekereja emosa paahi, ekhanle Ekereja y'Erutthu ya Kristu. Masi ilooca iya siniihaniwa "ekereja," Bibilia aka onikileela wira awo masina ooveeha, sothene iyo, mitthenkeso sothene. Awo anveeha exeeni? *Oveeha* onkhala "okhala oovirikana ni," wala, "olavula voovirikanya." Muluku aahimyaka wira, "Murwe tuyariwe," vano awo anira, "Murwe mwiitakanike." Munnona? Okathi opatiiso wa Erooho onkuxiwaaya voowoothererya nipuro na oostiya mukereja Katolika, ovahana ntata mukereja Prustante, ni wuukhuwa mukereja Pentekosite, ohiya oMutthu wa Kristu orwaaka ni otekiwa wothene iwe wa epiraamite naarin'ahu nihiku nikina.

<sup>225</sup> "Mwaacererye mowaaminini mwanyu, ikuru," ni sikina, sothene iya mwa Petru Oopacerya, 1...Petru Aneili, kookupali, ekapiitulu 1, vaavo sothene sinaacereriwaaya moowaaminini mwanyu, ithu iya sothene, othunku, ni oreera murima, ni ereerelo murima, ni ithu sothene, vano nto munootthittiwa ekanyeryo ni Erooho Yoowaarya.

<sup>226</sup> Masi eri ntoko mutthu awo...atthu anihimya wira aakhalana ela ahirina, okhala wira awo axuttihive voowootha. aMetotista ankhalanana moonelo wootkinihia, yaakkhananaka, ni othukumela vakhani, wala—wala wiina Muroohoni. Apentekosite anlavula ilavulelo, wala—wala wira ethu emosa voowuukhuwa. Miyo kinnaamini ithu iyo, vekeekhai, masi ithu iyo sihirina iya sikina khasinreerela ethu.

<sup>227</sup> Ntoko saahimalyaaka nihiku nikina, enkhala ntoko mulalampi...wala mwaapalame ooriipa eereryaka owara mapururu a mulalampi mwa yoowo, wala nrepo eereryaka owara mapururu a epompa. Awo khanameleleke vale, owo orimwihela mmansawe. Awo aarophatteiwa, awo muromolelo.

Masi okathi Muluku onihel'awe etthu mmo, ti y'ephattu. Nyuwo muniihimyha wira, "Miyo kihitakanaha mukereja nsana ohiyu. Nkikhanle orowaka-tho, nkikhanle owuryaka-tho, nkikhanle wiiraka *ela*. Miyo kihitakanaha mukereja." Moone, nyuwo muneererya ohela mapururu a mulalampi mweerutthuni mwanyu ya nrepo. Ti yeeyo. Munnona? Munnona? Muhaana oyariwa vasya! Muhaana omwaakhela Kristu. Nto mwamwaakhela Kristu, khamukhanle omwaakhelaka Kristu muhaakhlanle Masu Awe, okhala wira Owo ti Masu. Nto nyuwo mwakhalaru owoooneya ntoko oothunku, n'ukhoutta Yaawo, vano miyo kinnitikiniwa. Munnona? Nto nyuwo nlelo pooti wira mpantte wa mutthenkeso wothene munthun'anyu ni wooneya ntoko oothunku, nave nlelo muhirina Eyo.

<sup>228</sup> Vano, eyo vo, apatthani. Vo eri etthu yothene. Muluku ooreeriheni. Muluku ookhaliheryeni. Miyo nkinihimya ela wira kikhale oovirikana. Miyo kiniitaphulela mmansaka. Okhalaka wira ala mahiku oomaliha ekhotto, miyo nkimpaka mwaataano wa murettele ni nyuwo arumeyi, hata vakhani, miyo kinoona wira nyuwo mwaahaana orwa ovarihana ni miyo; kahi ni miyo, masi ni Muluku, Masu. Ti yeeyo. Ti yeeyo. Muhimye ele Bibilia enihimy'awe, muhimyeke Eyo enamuna Eyo enihimy'aya. Okhala wira Bibilia ohimmye wira, "Ole onrowa okumiha wala wuncererya mwa yaawo." Nto moone, mutthenkeso ti woohilempwa, nto okathi munaakhelaanyu nikano noopacerya vanreerela mutthike voomalela, okhala wira mootupha mukaano vaavo vene. Mwahokolowela vale oyariwa vasya, vano munoorowa weetta mwa Yoolempwa.

<sup>229</sup> Vano munookela mmuromoleloni, eniiriwa, "Miyo koosuwela, wira khaninaamini *Ila*. Mapixipu ahu mukereja mwahu anixuttiha wira hiyo na emosa wa ikereja sa khalaixa. Hiyo khaniniixuttiha..." Miyo khenikicala etthu awo ahiniixuttiha-aya. Vakhala wira Bibilia onniixuttiha, Erooho Yoowaary awo nyuwo Eyo enrowa olya Masu. Hata wira mutthu ori oosuwela moota xeeni ni moota owo okhanlyaaawe weereryaka otaphulela Yaawo, awo anweryaaaya otaphulela. Mutthu oohaamini onniwerya omukuxa Bibilia ni omutaphulela oohuluxakani wa Muluku.

<sup>230</sup> Tivo, khaavo mutthu orina ehaakhi y'olaleya Ehapari yooreera ehikhanle wira aahikhala, ntoko Moise, ottuli wu vamithaakani vale sooreerihiwa weiwo owo aaryaawe ni Muluku paahi, mpakha mutthu oyariwa vasya ni weemela vale niitho nniitho ni Muluku, ni osuwela. Khokhanle hata mutthu oohaamini, kхиivo hata pisikoloxiya, kхиivo hata etaphulelo, khuovo hata musomi mulaponi onwerya okumiha Yeeyo mwa nyuwo. Nyuwo mwaari weiwo okathi yiireiye aya! Ayo, mulopwana. Moosuwela yaakhumelenle.

<sup>231</sup> Nto nyuwo muniira, "Miyo kaahikhalaana enamuna yeele ya musuwelelo, ni miyo kookhalana erooho mwa miyo." Nto

owo wakhoottaru Masu mwa khula enamuna, nyuwo murina erooho yoovonyeya. Nyuwo munira, "Miyo—miyo nkikhanle wiiraanaka ni etthu ela ntoko Yeela. Miyo koosuwela, masi ekerej'ahu..." Uh-uh, yookhala erooho yoovonyeya. Vo ti vari ekanyeryo anyu yo osuwanyeihwa-no. Kayini, nyuwo mootthittiwa. Ayo, mulopwana.

<sup>232</sup> Hawa aahovenrye paahi Nuulumo nimosa naamukhaani; kahi othene Muluku aahimmyaawe, Nuulumo nimosa naamukhaani paahi, nto eyo yoopaceriha khula owereya murima ni oxanka, ni okhwa, ni etampi, ni ikhotto, ni itthu sothene sikina, khula ekhapuri, khula ampulansiya otonko wunla, khula exipiritaali etekiwe mwaha w'arettta. Ohoverya wawe omosa vakhani Nuulumo nimosa naamukhaani na Muluku, yoopaceriha etthu yothene ela. Nto owo khuheliwa ota, okathi ela nnakhala yahaarowaaya wira yiiraneiye. Munrowa okela sayi, muhoverryaka Nuulumo nimosa na Yaawo? Munira, "Koosuwela wira Awo anihimya *Yeeyo*, masi Awo..." Awo anihimya Yeeyo tu!

<sup>233</sup> Vano nkawehani. Muluku ohaana olamula olumwenku n'itthu. Khivanweryaneya nyuwo okhalana olamula voohikhala wira mookhalana nlamulo toko. Ehaana okhala etthu, muhaana ohonona etthu wira mulamuliwe. Munnona? Vano nto khivanweryaneya okhala olamuliwa, voolikana-ene, ehikhanle ehukhumu. Vano, moone, khamukhanle okhalanaka nlamulo mpooma nnihimya wira "muulutha wa itoolare thanu mwaha wo onvira luuxu ooxeerya," nto nlamulo noottharelana wira "nnari, owo pooti orowa vootaphuwa." Moone, khamukhanle wiiraka yeeyo. Tivo khivanweryaneya okhala malamulo maili ankhala okathi mmosaru. Nto nri nlamulo nimosa, Muluku mmosa, Eliivuru emosa, Kristu mmosa. Ti yeeyo tu. Waamini omosa, nroromelo mmosa. Ti yeeyo tu. Owo Bibiliaa, Kristu.

<sup>234</sup> Nwehe vano, mwa yeela, vaakhanle-ene wira ekhale etthu enaacereriwa mwa Yeela, ehaana waacereriwa ni mutthu. Khekhanle okhalaka-tho ovikana...

<sup>235</sup> Nto vakhala wira Muluku onrowa olamula olumwenku ni ekereja, ntoko sinihimy'aya aKatolika, vano ekereja Katolika xeeni Owo onrowaaawe olamula-no? Sookhala sinci-ene saya; yookhala emosa, y'oRooma; emosa, Ekerek; ni, oh, sookhala mithinto sothene soovirikana. Ekereja Katolika xeeni Owo onrowaaawe olamula-no? Wala, khino Owo onrowa olamula ni Luteraana? Ahe, nto, ni khino Owo onrowa olamula ni Prespiteriyaano? Munnona? Owo onrowa wira exeeni? Owo khonrowa olamula ni ekereja. Owo onrowa olamula ni Masu Awe. Ahe, nto, Owo khona...

<sup>236</sup> Moone, Owo khokhanle osukaka nikhuru n'atthu, ntoko yoovoona ya munna muthiyana ohiyu mukina, Erooho Yoowaarya yaamwarenlyaaaya-mo, Eyo yaavinre olukama

ekaaxa ele. Tthiri, kхиivo envarelela Eyo. Ti mutthu mmosa. Eyo envaheriwa oreeriha ekereja, masi khonwerya ovarelela Eyo. Khuovo mutthenkeso onwerya ovarelela. Ti yeeyo tu. Khekhanle wiiraka tu. Mookhalana sothene mwemmo, nave khamunwerya wira. Mutthenkeso khonwerya wira. Masi ti mutthu orina Erooho Yoowaarya. Vano nwehe.

<sup>237</sup> Vano vakhala wira Muluku onrowa olamula olumwenku ni Masu Awe, nto Owo vekeekhai ookhapelela Awo ni oosuka Yaawo vooreerela. Wala, vakhala wira Othene tootepanyeya, Owo onrowa oruuha sayi ehukhumu? Munnona? Ehaana okhala etthu. Ni Owo khonahimyeke wira, "Ole, ni ekereja." Owo ohimmye wira, "Ole onrowa okumiha Nuulumo nimosa mwa Yaala, wala waacererya nuulumo nimosa mwa Yaawo, yoowo onoorowa okumihiwa (mpante awe) muLiivuruni mw'Ekumi." Vano, wa miyo, ti Muluku, Masu Awe ni ehukhumu. Vano, miyo kalamula ni okupali Masu, ni woona wira Kristu ookikhwela, vano kinoovekela wira Ekumi Awe ekele ni ekihoolele. Nto vakhala wira Ekumi Awe ti Masu, ni Owo oolepa Masu, vanweryaneya sayi Ekumi Awe okhala mwa miyo, ni miyo kihimyaka wira kookhalana Erooho Yoowaarya, ni waacererya makano ohiya Masu? Khiyaarowa ovaru etthu tu. Kinwerya sayi miyo waacererya muromolelo Owo okhanlene oovirikanya, ni oolipiherya, ni ohooniherya moovirani mwa wahala, wira khula okathi awo aniiromola-aya awo animookhwa, muroohoni? Oh, awo annaacerereya mamempuru, vekeekhai. Eyo ekeekhai. Awo annaacerereya mamempuru. Masi, muroohoni, awo khanrowa hata nipuro. Mukoonihe, mukileele mwa wahala vatthu ekereja etonko... Nuumala wiiithokiha, eyo ekhwiiye vaavo vene, Erooho Yoowaarya khuhiya. Khasivo-tho miiriiryu ni ithoonyeryo, vano eyo erookelela oholo paahi ekelaka mweevitikavitikani paahi.

<sup>238</sup> Vekeekhai ti yeeyo yiireiye ni ikereja sahu sa Pentekosite. Iyo siirale siiso ele maama aya iiralyaawe. Wopaceryani, awo yaahikhuma, atthu yaakhoottale miromolelo. Vano, akina wa nyuwo axinna muniiwa efiita ela, akina wa nyuwo alopwana atokweene, moosuwela wira miyaakha sivinre, miyaakha miloko mixexe, miloko mithanu sivinre, awo yoohimeenryeni sa mutthenkeso, nyuwo mwaamuhimya wira waari oveeha. Masi olelo nyuwo muniiira mpante wa etthu nyuwo muupuwelaanyu wira waari oveeha. Nyuwo axithiyana munimetha maihi anyu n'upintari wiitho wanyu, amey'anyu yaari oovirikanya eyo, santu ule—mupentekosite mulweene ooreera murima. Exeeni yookhumelenleni? Paulo ohimmye wira, "Nyuwo mwaanithimaka saana, exeeni yookhoottinheni?" Munnona? Ottuli wu nyuwo mwaari ootaphuwa wa itthu iyo, masi mwaaththuna okhala ntoko akina aya.

<sup>239</sup> Siiso ntoko Samuweli aahimmy'awe. Isarayeli aahikhhalana Mwene, nto owo aari Muluku. Nto awo khwira, "Samuweli,

nyuwo munimuuluvala. Munithanlele mwene, nintthuna nikhale ntoko atthu akina a molumwenkuni. Nintthuna nikhale ntoko ilapo sikina. Nimmuthuna mwene wira aniroiheke okhottoni, nimmuthuna mwene onwerya owana ikhottto sahu.” Vano eyo khiyaamusivenle Samuweli.

<sup>240</sup> Owo khwira, “Kootoko okuxa etthu p’itthu wa nyuwo? Kootoko okuxa musurukhu anyu wa nyuwo? Kootoko woovekelani enyompe wala etthu p’itthu? Kootoko woovekelani etthu?”

Awo khwira, “Nnari. Nyuwo khamunatoko onivekela hat’etthu.”

<sup>241</sup> Wala wira, “Kootoko olavula etthu p’itthu mwa Nsina n’Apwiya yahaatonko wiiraneya?” Eyo ekekhai? Owo khwira, “Vano muhimwaakhele mwene owo, okhala wira onrowa okhala mattattha wa nyuwo.”

<sup>242</sup> Vano kintthuna kookoheni etthu emosa, Tapernakulu Branham. Munihalela wunnuwa wira mukhale etapernakulu yuulupale vano. Miyo pooti okhala ottaiwene okathi vakhani. Miyo pooti orowa nipuro nlo. Ti voolipa ohimya vatthu Apwiya anrow’aya okiihana; khino okikumiha vanlakani, khino otthikela vapuwani, khino Awo pooti okiihana orowa mothakoni. Nkisuwenle nipuro Awo onrowaaya okiihanelawo mpakha Yesu orwa. Kintthuna kookoheni etthu emosa. Kootoko woovekelani etthu? [Muthukumano oniira, “Nnari.”— Mol.] Kootoko woovekelani musurukhu anyu? [“Nnari.”] Miyo kootoko wooleelani etthu p’itthu, wa itthu ikonto sene miyo koohimenry’akan i mwa Nsina n’Apwiya, masi, ehinatoko okhumelela? [“Amen.”] Vano muhikhalkhale mwiitakanxaka ni mutthenkeso. Ti woovirikanya Masu a Muluku. Mukhume-mo vakhala wira muri mwemmo, ni mwiivalaanihe mwaakhele Masu a Apwiya.

Nrowe nuuramihe muru ahu.

<sup>243</sup> Muluku muulupale a maprofeta, Muluku a Abrahamu, Isakhi, ni a Isarayeli, muncererye ikuru, Pwiya, Mutthak’ola mwaamukhaani woothkilaseya waari vamurimani vaka okathi munci-ene, wira orowe w’axinn’aka. Anci-ene wa awo ari ota iwe, Pwiya, arina moonelo woovonyeya wa miyo. Awo anuupuwela wira kintthuna kikhale oovirikana. Awo anuupuwela wira kineererya okhala namasuvela sothene. Awo annaaleelaka atthu wira miyo kinaawoka atthu, vancienexa wa myaha iyo ntoko *opatiiso wa mmaasini* mwa Nsina na Pwiya Yesu, ni *epyo y'enowa, namararuwa muulupale*, ni mwa ififta iyo sinci-ene sinkhuma ni hat’etthu woohikhala Ekekhai yoohihononiwa. Ni kinnaavekelaka awo, “Amosaa-mosa a nyuwo murwe mukoonihe nipuro vanttheka-aka, wala ohaamini wala otaphulela voovonyeya Masu.” Ni khaavo mmosa okooninhe. Miyo kinoovekelani Nyuwo, Tithi, mwaaththuniherye

atthu ala esuwele wira anoovonya woona ewoora. Awo anoorowa olipelela voolekelaxa, awo yaahiwehe vale. Awo, khula mmosa...

<sup>244</sup> Pwiya, miyo kookupali ela, murim'aka waamunyaanyeya Yoolempwa ela yahaakhanle y'ekekhai wa miyo, okathi Nyuwo muhimaly'anyu wira, "Othene ole Atithi akivahaly'aya, onimoorwa. Ipwittipwithi Saka sinniwa Nsu Naka." Vano, Pwiya, kinoona wira Omwene vekekhai ti siiso Nyuwo muhimaly'anyu, koosuwela wira ti siiso, ori ntoko mutthu aakunxe ntthavi khurowa onthiyani, khuriha ntthavi khupurula khula muthinto. Yaahikhala, vekekhai, ihopa soothola, yaahikhala akasa, aranttasi a mmaasini, inowa, itthu sothene ntthavi na Ehapari yooreera naatontte-aya. Masi vookiserya, oholo waya, mwiikhampa waahithikela okelatho mmaasini, kasa aahihuluwa, enowa yaahoopa muturi khutthikela mmwiitheni mwa marove, ntoko mwalapwa vamarapheyoni vawe wala ekuluwe entthikela vamaroveni vaya. Masi yaahikhala ehopa y'ekekhai vale, Pwiya. Nto miyo kookhalana ohakalalihwa nno, w'osuwela, wira hata ntthavi nihinathi waarowela, iyo saari ihopa nto. Iyo saari ihopa, sooyariwa soothommwa. Nto ti siiso nikhanlyaaya ntthavi na Ehapari yooreera ninvara mmihakalalihoni. Nyuwo munnaasuwela Awinyu. Ethu emosa paahi erin'aka othokorerya, Tithi, ntoko sinsuwel'aka, okhala ooromeleya ni Masu ala. Nyuwo mwa Ole onihimya t'ani okhanle aani. Ni koosuwela wira kasa khaakhanle orukunuwaka khukhala nikhupa, siiso khaakhanle mulopwana wala mutthu, orina maaru oohiiwa wa Ehapari yooreera, aarowa okhalakhala osuwelaka Ekekhai. Maana Atithi yaahoona ela khalayi ene, ni Nyuwo moohimya wira othene ole Awo yoovanhe-ayani Nyuwo aamoorwa.

<sup>245</sup> Tithi a Wirimu, miyo kinnoovekelani Nyuwo wira khula mutthu oniiwa Mutthak'ola mwaamukhaani, wira Waarya olaleeriwaaya-mo, ni yoohimya erinaaka mmurimani mwaka wa mukhwaaka, atthu Nyuwo mwaakhwenle-anyu... Nto atthu, akina wa awo ota iwo, Pwiya, ntoko nikhuru na Kore, atthu ooloka, ooweetttheriwa voootha, ni muhasa wa erupani wooreerihwa mmatatani mwaya, masi yaahipweteya. Vano, awo khiyatthuniherya hata muhasa wa erupani ovolowa ni yaawo; mwaana a Aroni, Eleasar, aahaana okuxa. Vano awo yaahipaka epantera ya waltaari ni makapu ale, nikula, wira yooniherye, ni okhala muupuxeryo wa ethu ile yootakhala, Kore erenryaaawe opaka niira nootthokihowi noonvirikanya namitthaka a Muluku. Ekhale ottaiwene wa hiyo, Pwiya. Erooho Yoowaarya okathi wothene enikhapelele.

<sup>246</sup> Hiyo ninnooxukhuruni Nyuwo, Pwiya, wira ekerej'ahu yaamukhaani, esantuwaariyu ela yaamukhaani yooreerihowi. Miyaakha sinci-ene sivinre, miyaakha miloko miraru n'itthu, miyo kaahikokhora vantthiyani va voosareya malaxi ni

otothowa, ni hiyo naahivahererya ethaya ela wa Nyuwo, ethokihelo ela yaamukhaani. Ni vanloothoni vale va etapernakulu eri yoowoona yeeyo. Yeeyo yiiraneiye voolikana. Nlelo vaavale. Awo khanrowa opwexakasa, Pwiya, awo anrowa paahi o...nlo ninkhala na khalayi, ni awo anrowa paahi osuka elhela nimosa vasulu vaya. Muluku, nvaherye wira Ehapari yooreera ela ya weero elempwe mmakukhuni va, Eyo ehikhalkhale ekhumaka ekereja ela yaamukhaani mpakha Kristu orwa. Wira khula mempuru, khula mempuru a Erutthu ya Kristu, awo anrwa mu okhuma elapo yothene ni molumwenkuni mothene, wira khula mmosa a awo yaakhele Waarya, Ehapari yooreera, ni yeetteke mwa Yoowo nto ni emwaakhele Kristu.

<sup>247</sup> Ni wira ekhale y'ekekhaixa wira Masu Awe yiiraneye, "Miteko Miyo sinvar'aka, nave-tho awo anoovara. Ole oniiwa Masu Aka, ni onimwaamini Ole okirumme, ookhalana Ekumi Ehinimala." Nto okathi Ekumi Ehinimala enkelaaya, awo aniyariwa okhuma Osulu, ni miteko sa Muluku sinimwisooniherya mmansaya, okhala wira Ekumi emosaru yaari mwa Yoowo. Khekhanle wiiraka ethu ekina.

<sup>248</sup> Tivo Tithi, ekerej'ela ehilipiherye ekiseryo aya Yoohimala vasulu va moonelo wii, vasulu va mutthenkeso, vasulu va etthu p'itthu ohikhanle Kristu Mwaneene okhalaka mwa yaawo, olipiheryaka Masu Awe mwa yaawo ni natiri Awe. Wira, okhuma mwaana mwaamukhaani va ohiy'ula, mpakha mutthu oowuulavalaxa, aakhele musuwelelo ola. Ni wira khula mulopwana wala muthiyana, mmiravo wala mwaaruusi, oniiwa efiita ela, ekhale siiso ni yaawo, Pwiya, ni mwaavahe osuwela saana wira miyo kimphavela paahi olopola ni wiihanelia okhuma, maana ewoora ela ti vooxa ovikana sinuuuwelaahu.

<sup>249</sup> Ni hiyo ninnimoona Papiloonya, maama namuttompe, ni an'awe othene axithiyana anamittompe ethukumanaka vamsa. Muluku, hiyo ninnisuwela wira Yoolempwa enihimya wira nthakathaka mmatta mwa etriku ninrowa otthukiwa toko, mahuta. Nto awo ahiiththuka mahuta, yiisiihanaka masina ooiveha vekeekhai ahikhanle awaya, ahikhanle a Ekereja, hata vakhani; iyo ilooca, kahi ikereja. Eri emosa wa seijo, Tithi, nto eyo ti Emosa Nyuwo mukhwelenyaanyu.

<sup>250</sup> Nto kinvekela, Tithi, noonaka iyo sothene sithukiwaka vano mwaha wa mooro w'atomu vahilekenle, kinvekela, Pwiya, wira Nyuwo muhiye etriku ekhale yoosareya ni yoolemela. Munivahe, Pwiya. Wira ninnuwe ni naarye Waarya, ni nikhale ntoko Yesu, "Kaahivareke itthu Muluku okirumme-awe wira kivare, weeso nkirina Ekumi mwa Miyo. Masi Muluku aalavulaka ni wooniherya Ekumi Awe, vano Eyo ennivila Mmansaya." Munivahe, Pwiya. Miyo kinnivahererya Mutthak'ola wa Nyuwo, ni wira Nyuwo mukhapelele Yoola, ni waaruuhe ikonto miloko sene, Pwiya, wala, an'Inyu othene athhomeliwe Ehapari

yooreera. Mwa Yesu Kristu, Yoowo okhanle Masu, mwa Nsina Nawe kinnivekela. Amen.

Miyo kinnimphenta . . . , miyo . . .  
 Okhala wira . . . t'opacenrye okiphenta miyo  
 Nto oothuma woopowa waka  
 Vamwirini w'oKalvario.

<sup>251</sup> Kinrowa okoha ethtu. Akavi ohiy'ula vamuthukumanoni ola onooneya va, wa ekerej'ela yooreera yuulupale y'atthu, wala empa y'atthu, kiireke, nipuro nenla n'okohorela-vo, munaamini ni murim'anyu wothene, makhalelo anyu anniphimeya ni yoorama (nyuwo) ya Muluku ni Bibilia, ni munnaamini yeeyo, nwehaka makhalelo anyu, ni munnoona enamuna Erooho eneettaaya mwa nyuwo, wira ennaamini Masu othene enamuna Awo alempwalyaaya, ni ennisuka Yaawo? Munnaamini Yeeyo? Muluku ooreeriheni. Owo okathi wothene akhalihe Erooho Awe mwa nyuwo.

<sup>252</sup> Ni wa mpathhani aka mufiitani, kaanithuna nwenryeene oweha va vamuthukumanoni va ohiy'ula, kinoona wira ipursento miloko mithanu na mixexe s'atthu mano yaahivenxa matata, wira aamwaamini ni aanweha Bibilia, (kahi ele ekereja enihimy'aya) ele Bibilia enihimy'awe, (kahi ele elooca enihimyaaaya) ele Bibilia enihimy'awe, ni awo annoona Ekumi ya Kristu yoonihereyaka mwa Yoowo.

<sup>253</sup> Moosuwela, mahiku a khalayi awo ehinatthi okhalana ipa soototoxa-mo, mu—mulipa oohana eweero aamanaka ni enyutto. Kinoona wira nyuwo muhiwiyeeyo. Ehinatthi orowa wa mulipa-ooototoxa, awo yaammmana. Nto eweero ethtu yoolemelaxa, ti yoolemelaxa ovikana ecumpwi. Nto siiso miyo kootoko othokosa, nto nyuwo munowerya okuxa mmithaakani mmukhukwini mothakoni, ni ottikittha ntata nanyu vasulu va nthaaka, vano nto, "phew," wiiseela *siiso*, nto ntthupi ni itthu sothene sinoovava, maluku, masi eweero ti yoolemelia saana enoohala vaavo. Vano nto mwakuxa eweero eyo, eyo yoophirikeya vatthayani mpakha ethukumanyeiyeyaya vanci-ene. Ni mooviran i'okathi wa ivulkawu okathi yaathukumanyeayaaya, yookhalana marove ni sothene, epirita ya eyuuma ni itthu sikina sootakanxeya ni yeeyo. Mulipa-oomana aakuxa nipattuusa nla na eweero n'umana n'urukunxa, n'umana n'urukunxa, mpakha owo omama khukumiha ipaphala sothene. Nto moosuwela moota owo aasuwelaawe wira aahikumiha ipaphala sothene? Owo aaniwerya woona elatarato awe yoowo yooneelaka mwemmo.

<sup>254</sup> Nto ti siiso Muluku oniirih'awe Ekereja. Owo onoomana khula eyaaminelo, khula muromolelo, khula nikano noopakiwa ni mutthu, mpakha Owo wonna Ekumi Awe Yoowo wooneeleya mwa nyuwo. "Kaahivareke miteko s'Atithi Aka, muhikaaminiki." Munnona? Vakhala wira ele elaiheriwe

Ekereja, Ekumi yaari mwa Kristu khenooneeleya mwa nyuwo, muhikhale ooweemela mwaahikhala ovilela, ikuru, itthu iya sothene, ni wiisumaaliha, ni—n’itthu, ni othunku, ni oreerelana murima w’axinna, ni itthu iya sothene sinvekeliwa wa nyuwo. Hata wira mwiirale exeeni, hata wira mukhuwenle sayi, ikereja kavi mwiitakanxale-anyu, mapururu makavi mwiihelenle-anyu, muhiire. Mulipelele mpakha vooloka-vo, mmurimani mwanyu, nyuwo nwerye olevelela, mpakha mmurimani mwanyu mukhalane oreerelana murima w’axinna. Khivancala vakhala wira awo anooropocola nikuphwi na ireru epantte emosa, munooewerya orukunxa nlaku nikina ni mmaaleleyo, moone, mpakha maneema awo, hata wira awo anoohimeeryani exeeni.

<sup>255</sup> Okathi awo yaahenlyaaya nttapwatta wiitho Wawe khummana vamuru, khwira, “Vano, kinileeliwa wira Nyuwo mwa Profeta.” Vano khukumiha ntattapwatta mwa Yoowo, nto mmosa aya ovarenle-ene ekopo, khwira, “Taani a hiyo oomanne? Muhimye ni munileele, mwa enamuna ekina, nto hiyo nnoowaaminini wira Nyuwo mwa Profeta.” Owo khonatoko otthukula eyano Awe.

<sup>256</sup> Mwaamwiiwaka profeta ovenyaka, orina soowaakhula sothene sa khula ethepyelo mukhanlyanyu oruuuhaka, muupuwеле, owo kahiyo profeta. Olelo awo ahaana osuwela sothene, mwaarowaka okhalana owereya wa niino ni mwaarowaka okhalana owereya mmirimani, ni sothene sikina, ni woolelani sothene ya yeeyo. Owo kuhiyio mukhalelo wa Muluku ahu. Nkaaweheni maprofeta, nkanweheni Yesu.

<sup>257</sup> Nkanweheni Paulo, okathi owo aawerye-awe omukhalisha mutthu ohoona, ni omuhiya mulipa-oohana omoomola elapo eyo, “Kinoona wira owo waahimpweteya owerya wawe wo okhalisha ohoona.”

<sup>258</sup> Yesu, Yoowo aawerya waahihimuxa alipa-ookhwa, nnakhala vo khwira...Nakhotto namuhapaliwa aahisenyela wiitho Wawe, ni natoropa khusenza khurorpocola ireru wiitho Wawe, khummana Owo vamuru, ni nttapwatta anvitikelenle Yoowo, khwira, “Muhimye ni munileele oomanneni.” Ni khuhitthukula eyano Awe.

<sup>259</sup> Muhaawehe anamathepya awo othene. Masi muupuwеле, awo anoolavula paahi, etoolare yoowootherya enihimya paahi wira yookhala emosa y’ekkekhai nipuro nlo. Moonakaru ethu ila ya mutthenkeso yinnuwaka ni ekelelaka ohoolo, ntoko ehimalyaaya “woottha onimwaacerereya mmatatani mwawe,” muupuwèle paahi, yookhala Ekereja yaamukhaani ya Muluku nipuro nlo, vekeekhai ekhanle yoosareya Erooho Yoowaarya, yooloka, eneetta ewelaka exikatta. Muhiweheke mutthenkeso muulupale.

<sup>260</sup> Ekereja xeeni yuulupale enihimmwa mBibiliani ehikhanle okathi wa ekereja ya wEfeso? Nto okathi Paulo oviraly’awe

mmittettheni sa wEfeso, khurwa ekerej'ela, yaahikhala atthu muloko n'anli mwemmo. Ti yeeyo. Ni othene aya yaari atthu ooreera murima, yaanikhuwela ni yaaniviriha okathi muulupale, masi khyaakkhanle Erooho Yoowaarya nlelo. Paulo khwira, "Muhaakhela Erooho Yoowaarya okhuma okathi mwaaminni anyu?"

Awo khwira, "Vano, hiyo khanaasuwela wira yaahikhala Erooho Yoowaarya."

<sup>261</sup> Owo khwira, "Vano mpatisiwe sayi?" Vakhala wira khyavirikana, exenei owo aahimenryaaawe ekerej'ele iwe?

<sup>262</sup> Awo khwira, "Hiyo noopatisiwa ni mmosa w'axilopwana aalupalex atonko okhala mulaponi, Yohani Mpatisa, yoowo ompatinse Pwiy'ahu. Opatiso owo kuhiyo wooreera voophiyerya?"

<sup>263</sup> Owo khwira, "Nnari, mulopwana. Muhaana opatisiwa, okhala wira Omwene otthittiwe wa ethtu ekina." Nto awo vaiwaly'aya yeela...Khwira, "Yohani aapatisa mwaha wo orukunuxa murima paahi, kahi oleveleliwa wa itampi, ahimyaka wira mwaahaana omwaamini Ole aarowa orwa, eyo ti wii, Yesu." Nto awo vaiwaly'aya yeela, awo yaahipatisiwa-tho mwa Nsina na Yesu Kristu. Ti yeeyo. Vekeekhai. Awo yaahitthara Yoolempwa.

<sup>264</sup> Nyuwo moosuwela, woovahereryani voosiis'ula, Moise aatthanrinhe eththarihelo oonaly'awe Wirimu, nto khupaka eheema wira ethoonyerye. Okathi Salomoni aatenk'awe empa moolompa, owo (owo iirale exeenii?) aattharinhe eththarihelo Moise, ni eheema, asukaka Yoolempwa oratta-ene.

<sup>265</sup> Ni okathi Muluku onrwaawee Mpaani mw'Awe wa mahiku ookiserya, Empa yeela, Erooho Yoowaarya, "Nyuwo mookuupela erutthu," Erooho Yoowaarya yaahimora Nihiku na Pentekosite, mutthaka waari, "Murukunxe murima, khula mmosa a nyuwo, mpatisiwe ni Nsina na Yesu Kristu wira muleveleliwe itampi, nto munimwaakhela yoovaha ya Erooho Yoowaarya. Tthiri natiri t'awinyu ni awaya an'inyu, n'ale ankhala ottaiwene, othene ale Apwiya Muluku ahu antthun'aya owiihana." Nyuwo mwaththunaru omwiihana murumeyi anyu tothoro, Tothoro Simoni Petru aahilepa epaphelo ya murette, epaphelo ya murette Ehinimala. Ti yeeyo enaavoniha arettta.

<sup>266</sup> Mwaahiye akina w'anafarmaasiya awo oohimya-himya, ni muromolelo, ehele enamuna ekina, mwaha wa yeeyo awo arinaaya...Moosuwela, nyuwo mwaahaacererye e... mwaacereryaru voowaatta elepeliwo, nyuwo pooti... eveneno yoowaattaxa, pooti omwiivaka muretta. Mwaahihele woophiyerya, nyuwo...kahi wa murette, mwaahiire, khonimureerela etthu muretta. Meetiku anyu onnisuwela saana moota w'olepa murette.

<sup>267</sup> Ni Kristu, Erooho Yoowaarya, ti Mulipa-oolepa Murette, ni Owo oolepa. Muhaacererye-Vo wala okumiha-Vo, mukuxe paahi Murette ntoko owo siryaaya. Ti Openuwa wa iretta sothene. Muluku ooreeriheni. Nyuwo munnimphenta Yoowo? Amen.

Miyo kinnimphenta Owo, miyo...[Nipuro  
vahitthu mufiitani—Mol.]  
Okhala wira Owo t'opacenrye okiphenta miyo  
Nto oothuma woopowa waka  
Vamvirini w'oKalvario.

<sup>268</sup> Vano niipaka muhina-muhina, vano murukunuwe nvahane matata ni namwaattamanani anyu vo. Oh, owo nawetta nave, onivira.

Miyo kinnimphenta Owo, miyo...(. . . ? . . . eyo  
ti yuulupale.)  
Okhala wira Owo t'opacenrye okiphenta miyo  
Nto oothuma . . . woopowa  
(Murwe munvireloni mu. Ayo, kooxukhuru, munn'aka.)  
Miyo kinnimphenta Owo, miyo kinnimphenta  
Owo  
Okhala wira Owo t'opacenrye okiphenta miyo  
Nto oothuma woopowa waka  
Vamvirini w'oKalvario.  
Miyo kinnimphenta Owo,  
Nrowe niipe vano.  
Miyo kinnimphenta Owo  
Okhala wira Owo t'opacenrye okiphenta miyo  
Nto oothuma woopowa waka  
Vamvirini w'oKalvario.

<sup>269</sup> Vano nrowe nuuramihe muru, niphunye maitho ahu, ninvenxerye matata ni masu ahu Muluku vano, koovahereryakani wa pastore. Hiyo ninnitthapa okhala ni nyuwo va. Hiyo khanihiyo muromolelo. Hiyo khanrina hata nlamunlo woohikhala ophenta, hata eyaaminelo woohikhala Kristu, hata eliivuru yoohikhala Bibilia. Hata omempuru; opatthana paahi mwa Ephome ya Yesu Kristu ennirapiha ohaamini wothene.

<sup>270</sup> Vaareera, othene vamosa vano.

Miyo . . . , Miyo . . .  
Muluku ooreeriheni. Mutthike munixekurye-tho.  
Okhala wira Owo t'opacenrye ophenta . . .  
Vaareera, pastore. Moolikana? Muluku ooreeriheni.  
Ni . . .



*MWAHA KIKHALENLYAAKA OOVIRIKANYA  
ETIINI YOOTTHOKIHIWA EMK62-1111E*  
(Why I'm Against Organized Religion)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeettaka 11 mweeri wa Novembro, 1962, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanle, xontte mulavule ni:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)